

宋學士全集

二



1.2130

中央圖書館
中文書



宋學士全集
(一十二)

170
193/30

宋濂撰

宋學士全集補遺卷五

故江南等處行省都事追封丹陽縣男孫君墓銘

君諱炎字伯融姓孫氏金陵句容人曾祖某祖文嗣父顯卿皆爲儒母洪氏君身長六尺餘面黑如鐵一足偏跛於書少所不通善雄辨累累數千言常窮一座人人莫不畏其口長於歌詩元至正中天台丁君復同郡夏君煜皆以詩名君遊此兩人間日夜相切劘益得其旨趣下筆快掃百紙可立盡辭彩爛然驚動江東雅好飲酒常與夏君對飲賦詩各務出奇相勝每得一雋語槌案大呼諱聲撼四隣所與交皆當時豪俊間出遊四方既以氣自負常輕視章句儒衆中常自許曰孫炎豈齷齪輩伍耶然卒無容之者竟困而歸歲乙未今皇帝渡江來金陵開江南等處行中書省聞君名召見與語君陳元運將終勸上延攬智能士以圖大業上甚悅辟爲掾每問以事慷慨激烈所謀多合上心上愈嘉重以爲可用戊戌從征浙東以勞擢同知池州府尋改池爲華陽府卽拜君爲知府皆有聲明年十一月召爲省都事會處州降擇鎮安之者咸以處在江海間盜賊憑結非君莫可治上亦才君入省月餘遂命爲處州總制錢穀兵馬之柄悉委之不取中報且以省符未署者付之聽其自辟任君疋馬入處州時城外七里卽賊營老酋黠蠻狼嗥虎踞不奉官府約束君至坐廳事驅城中民踞階下諭以元將亡及上起兵意謂民奉法則生否必爲齏粉語甚剴切民皆叩頭流血誓不敢二心退則轉告其鄉民以爲孫使君仁且武不比舊官可玩狎

君亦下檄屬縣徧諭之。由是投兵來降者相繼于門。數月皆化爲良民。君復擇其驍勇者練爲兵。時時肄習之。拔其服衆者爲長。有寇則率以禽寇。事罷散歸爲農。有所警發馳一符立至軍門。無敢或後。姦吏巨族素驕橫者。斂手吐舌。畏之如神。不敢出聲語。雖在數百里外。皆縮氣屏息。如臨其家。郡民賴以安。皆謂得孫使君治郡晚。時上欲用人。而秀民有材能者。見方戰爭。勝負未分。皆伏匿山谷中。不肯出。君患之。鈞致一二人。問有材者爲誰。今皆安在。錄其姓名。爲書遣使者招之。而劉君基、章君溢、葉君琛尤爲處士所推。劉君最有名。亦豪俠負氣。與君類。自以仕元。恥爲他人用。使者再往返不起。以一寶劍奉君。君作詩以爲劍當獻之天子。我人臣不敢私用。封還之。爲書數千言。開陳天命。以諭劉君。劉君無以答。遂巡就見君。實酒與飲。論古今成敗。如傾河決峽。略無凝滯。劉君乃深歎服曰。基始自以爲勝公。觀公論議如此。基何敢望也。君旣以口舌安反側郡。上方征伐。無一兵與君。壬寅二月。苗將賀甲、李乙叛。襲君。而所練卒亦應之。君無援。被禽。幽空室中。列卒環守。脅君降。君紿之曰。若生吾。吾能成若事。賀、李知非其本心。恐留自遺。患遇夜。以燭鴈斗酒饋君。曰。以此與公訣。君拔佩刀割鴈。舉卮酌酒。仰天飲曰。嗟乎。丈夫乃爲鼠輩禽。然我死義爾。賊死肉臭。狗且不爾食。卒怒。持劍瞋目擬之。君飲酒自如。食竟。叱其解衣。君罵曰。此紫綺裘。乃上賜吾者。賊勿解。吾當服以死。引枕而臥。賊俟其睡。乃害之。時某日也。年三十又□。事聞。上嗟悼久之。是年某月日。以其喪葬金陵南門外聚寶山之陽。後二年。贈徵仕郎。戊申。上卽帝位。念君死仕之忠。追封丹陽縣男。仍命有司復其家。君先娶王氏。初國兵入金陵。不屈死。生一子毅。繼平氏。君事親孝。與人交。緩急

可仗有古烈士風。遭時遇變。所爲可稱道。守死不二。卒成美名。可謂俊傑。雖位不大。顯生不永年。然忠義之士。常與天地長存。不足爲君憾也。君所爲詩若干卷。門人蔣敬編次傳于世。銘曰。

元季政亂。盜若蠶。戈矛相剗。河漢紅。江淮中間。飛一龍。誰其輔之。惟羣雄。維時孫君。起章逢。齒牙差差。萬劍鋒。陛前論事。聲震鏞。帝一見之。爲動容。俾知大府。佐幕中。鋤姦剔蠹。別罪功。括蒼告降。內猶訶。詔君持節。總兵戎。疋馬三矢。韞一弓。徐行直火。如涉空。羣酋噤伏。偃且恭。大開城門。滅燧烽。口宣檄告。悛頑兇。敢有弗悛。屠其宗。銷兵鑄鐵。耕以農。生民有如魚。脫置。拔諸水火。哺殮。嬰苗。貉內蝕。據崇墉。乘其不備。襲且攻。君氣吞賊。兵力窮。長蛟在陸。制蟻蟲。仰天叱。日月爲東。義不負國。徇以躬。游魂上天。化白虹。下壓賊營。賊眼矇。大軍四來。若雷春。析骸解頤。殲蕪縱。死事上聞。帝哀恫。贈官復戶。頒爵封。生氣燁然。薄蒼穹。生爲偉人。死則忠。位卑壽裔。名譽豐。脫令耆艾。登侯公。死而無聞。鬼猶憐。取彼棄此。孰織洪。史臣焯行。鎮幽宮。名與天地期。無終。

元武略將軍荆王位下鷹房總管府副總管王府君墓志銘

初。上卽文華堂。教育英俊之士。余奉詔。據席爲師。太原王璉。繇流寓。試山東。行中書。以進士。貢上禮部。上奇其才。擢翰林國史院編脩官。俾就學堂中。則以其先祖墓銘爲請。已而除監察御史。超山西承宣布政。司右參政。復以爲言。未果爲。後璉再入爲御史。除福建按察副使。書來請曰。璉嘗獲受經。有師弟子義。先祖之銘。不於執事。是徵而誰徵。願弗辭焉。余重違其誠。乃序而銘之。君諱天錫。字良卿。姓王氏。其先居平

陽霍邑。至大父。徙太原。醇州武延之建國鄉。曾大父諱仲彰。大父諱寧。父諱輔直。俱善士。母崔氏。君少膺力絕人。善騎射。讀詩史。曉其大義。恢廓有氣度。家有田千餘畝。季父欲以硯瘠易其善者。君諾諾從其意。久之。易殆盡。卒無一言。人以問君。君曰。季父猶父也。子可與父爭耶。鄉里少年從君學射。君不肯曰。射不易學。苟非其人。祇足助虎翼耳。豎子不足教也。君居家。不問有無。日招善己者。飲飲醉無虛日。既而歎曰。丈夫不取封侯。佩銀印。死蓬蒿下。何益。跨一馬。攜長劍。入秦。遊延安。謁元荆王。以藝自薦。王語合。署鷹房總管。府副總管。階武略將軍。某年月日。卒于官。年若干。夫人范氏。生一子。中元。天長縣尉。一女。適汴梁翟鵬。孫男二。長卽璉。次琮。中以今某年月日。葬君子于某縣某山。太史氏曰。君子之觀人。於其器。不於其位。以位觀人。斯下矣。若君之器。豈非豁然偉丈夫哉。而所得僅若此。則璉之顯庸于今者。非君之餘德也耶。來者能勉於德。斯善爲君後矣。銘曰。

黃虬髯兮。力扼兕。佩利劍兮。挾長矢。騎騏驎兮。如龍射。封疆兮。殪豕。材旣具兮。善又多。位則卑兮。吁嗟奈何。身不享兮。報則在後。繼自今兮。寵光其加。

元故資政大夫江南諸道行御史臺侍御史周府君墓銘

公諱伯琦。字伯溫。姓周氏。饒之鄱陽人。其先居汝南。宋靖康末。有諱秦者。與宗人益。國文忠公。必大之父。從高宗南徙。實公之始遷祖。曾大父諱灼。鄉貢進士。大父諱屋。咸淳十年進士。某官。元累贈正議大夫。禮部尙書。護軍。追封鄱陽郡侯。父諱應極。有文學。仕元。歷翰林集賢兩院待制。出同知池州路總管府事。累

贈翰林侍讀學士中奉大夫上護軍追封鄱陽郡公曾祖母某氏追封鄱陽郡夫人母上官氏追封鄱陽郡太夫人公生十一年而侍郡公游燕京十五補國子生事吳文正公激鄧文肅公文原虞文靖公集于司業博士座下作野菊賦禮部尙書元文敏公明善稱之輒有名後五年積分如格陞上舍生又五年丁郡公憂泰定二年用江浙行中書省都事劉君致薦之京師禁林名卿咸欲辟公自佐公以大母春秋高不就十二月授將仕郎廣州路南海縣主簿天歷元年赴南海南海民歲轉輸秋稅于詔縣官督視之黠民賂憲府掾竄名佐吏籍來監稅大斛入小斛出竊其贏以自利及至詔往往不能登數督視官被箠繫移檄重徵於民民負荷補輸往來道路者半載官與民交病之忌掾威莫敢問者及公至捕竄名者實諸法不欲其跡入縣門令民多寡相資自輸于詔不遣一吏而稅先期以辦民樂稱便麥全等十一人以私鬻舶貨繫獄舊官求其賄不得誣爲強盜論死公讞囚察其寃遇赦出之二年以祖母喪解官歸大府不許趣還會夷獠反檄公捕至百餘人至順元年移攝番禺縣無籍吏五百人據縣啗民惡少年七十人並緣爲姦利公斷遣之一縣肅然不敢出聲語縣獄遂空已而江西行中書省漕糧八萬石于慶遠命公護其行公由肇慶臨封道廣西越梧潯象柳諸州水陸四千餘里謹防周慎升斗不耗二年返南海治妖僧獄出所誣平民二十二人是年秋受代去三年七月除太府監照磨兼管勾承發架閣階從仕郎元統二年入太府公慎簿書斂散之法稽覈詳密貪吏相弔太府之長以聞于上游賜衣幣明年重紀至元復有狐裘鞍轡之賜其冬以翰林學士張文穆公起巖歐陽文公玄薦遷徵事郎翰林國史院編脩官預脩秦

定帝寧宗實錄。后妃功臣列傳。六年。上進。四月。陞翰林脩撰承務郎。同知制誥。兼國史編脩如故。扈從滌陽。屢草詔命。賜文綺者四。六月。奉詔代祀孔子於曲阜。九月。還都。十月。追加明宗尊號。進寶冊。公奉勅篆寶文。未幾。親祠太廟。公與執事。賜衣三襲。至正元年正月。詔書宣文閣榜。擢授經郎。兼經筵譯文官。階儒林郎。十月。奉勅開宮學於玉德殿西室。授宿衛官。及翰林學士。承旨和尙等二十五人。經中貴人傳旨。命受經生北面行弟子禮。太官設饌。光祿進酒。朝廷公卿皆陪坐。時人榮之。十一月。講大雅文王詩於明仁殿。有貂裘之賜。明年四月。詔引和尙等講書。賜中統楮幣一百定。自是特命乘驛從駕。蓋異數也。三年正月。陞宣文閣鑒書博士。兼經筵官。明年九月。復兼授經郎。五年正月。進說虞書政在養民之言。時河南山東大饑。卽詔發倉廩賑之。後十日。復講旅獒。方作亭臺於上林。亦詔輟工。七月。除崇文監丞。兼經筵官。御史臺以嶺南有警。奏除僉廣東道肅政廉訪司事。進階朝散大夫。賜四品服。六年。至官。乘傳行海豐。揭陽。又南至海陽。程鄉。興定。長樂。河源。復東歷博羅。增城。東莞。又西至肇慶。德慶。踰年而還。周歷所部二千五百餘里。罷斥官吏污穢不職者一百十人。誅四十有八人。釋獄之無辜者一百十二人。疑事不決者。決之。州縣之獄。爲之一空。薦處士陳明等六人于朝。建豐湖。白鶴二書院。以祀蘇文忠公軾。羅文質公從彥。明法度。申教化。嶺海稱治。復上封事。請於南海設科場。以取兩廣之士。置尉捕賊。無以主簿兼而廢民政。及他不便者二十事。八年三月。仍前官。遷福建閩海道。未行。使者以翰林待制。兼國史院編脩官召。明年五月。進所脩國史。擢崇文少監。階亞中大夫。同檢校書籍事。兼經筵官。賜三品服。十二月。賜紫織金對衣二。

襲十年正月奉香幣及金織文神旛代祀醫巫閭濟瀆北海南至會稽而還十一年考試天下士拜翰林直學士太中大夫知制誥同修國史兼經筵官賜金織文對衣者二十二年四月改兵部侍郎尋拜中臺監察御史御史用南士自公始公言弭盜用人等十事賜黃馬一八月還燕都勾校百司刑政錢粟之籍糾劾者甚衆薦中外官一百二十七人舉士二十五人審審不阿大臣皆嚴憚之十三年四月中書奏改崇文太監兼經筵官階嘉議大夫詔奉祀江海神循江淮道閩越抵南海南北幾及萬里明年竣事遂丁母夫人之憂寓居姑蘇十五年中臺以東南方亂起公爲江東肅政廉訪使公三以憂辭乃起移治於徽明年徙建德又徙紹興又徙衢先是朝廷嘗虛兵部尚書位俟公道不通乃改浙西肅政廉訪使與江浙行省丞相達識帖穆爾俱守杭十七年丞相得承制行事假公參知政事時張士誠據姑蘇未卽順命廷議以重爵懷之公往授太尉誥諭以大義士誠稽首稱臣是年冬蠶書至拜公爲真仍賜金織文對衣十八年丞相以漕粟事屬公公分僚屬治姑蘇十九年江浙試進士公實臨考北士避兵江南者亦權宜取之或貧不能上禮部白丞相以學官祿之七月丞相復承制授公行省左丞分治于蘇二十年公運米十五萬石至燕都明年亦如之九年使者航海以同知太常禮儀院事徵公謝病不能赴二十三年真拜江浙行省左丞階資善大夫丞相自臨門趣公公強起視事數日卽引年致政閉門而臥二十四年九月特除資政大夫江南諸道行御史臺侍御史而時事已不可爲公憂憤絕食幾死者數矣後三年國朝禽士誠浙西平公稱病彌甚引歸鄱陽洪武二年六月某日卒于家享年七十又二某年月日葬於某山之原

公自諸生起家。祿食四十餘年。居朝最膺眷注。順帝常字稱之。博學能文辭。大小篆尤名于世。宮額寶文。多公手書。所著有堅白居士集三十卷。詩三十卷。說文字原六書正說共八卷。翰林志十卷。藏于家。始娶江氏。宋丞相文忠公萬里之曾孫。後娶錢氏。與國路經歷天祐之女。並封鄱陽郡夫人。子男四人。宗仁。台州路總管府判官。宗義。國子生。宗禮。江浙行中書省檢校官。宗智。兩浙轉運鹽使司照磨。宗禮。宗智。皆先卒。孫男四人。某某某。初公臥病姑蘇。濂以總裁元史被召。見公于逆旅。公老思歸。守臣留不遣。濂爲道。聖天子優禮舊臣之意。俾致公于家。公歸。遂卒。元史雖爲之立傳。恨不能知其詳。今宗仁以門人謝徽狀請銘。故不復辭。而備著之。使讀者可互見焉。銘曰。

維天生才。咸降之衷。豈以南北。而有不同。泰山徂徠。有樛有楓。江潭之間。亦產柏松。世之褊量。偏曲不通。互毀交戕。戾乎大中。宋遷三吳。多士景從。或夷大難。或奏駿功。偉碩光明。與汴俱崇。荆楚之西。越蜀之東。將相王侯。皆人中雄。曷不觀之。益國文忠。起大江西。輔相孝宗。有文旣宏。厥德亦豐。厥聲泝泝。銘于鼎鍾。惟侍御史。才瞻而充。古今雖殊。後先比隆。自爲小官。摧屠姦凶。持斧南巡。嶺海爲空。歸服豸冠。上達帝聰。風節巍然。與國齊終。匪不能言。時則弗容。就其所爲。則已顯融。我銘其封。以悼其庸。以悼其逢。惟味之攻。以昭于無窮。

故贈奉議大夫磨勘司鄭公墓志銘

溫之平陽。有剛毅之士。曰曲全公。諱采。字季亮。姓鄭氏。賦性介特。唯道之從。不屑屈人下。年二十。而其先

人捐館。州里羣少年，怙其氣勢，因公少孤，欲肆其狎侮。公奮然自勵曰：大丈夫有髯如戟，肯受狗鼠輩侵凌乎？束書出門，游浙河之東西，道經金華，金華爲部使者治所，使者聞公至，請見之。旣見，奇其才，將辟爲府史，公以爲辱己，力辭而出。時仲兄講授崑山，公趨就之。年已二十有四矣。仲兄勉公以學，公始肆力於六經。羣史間冬大雪，輒擁重衾厚幃而坐，夏熱蚊蚋且嗜人，則薰蒿烟驅逐之。夜參半，猶隱隱聞讀書聲。仲兄嘆其勤，每謂人曰：異日以文行亢吾宗，必吾弟也夫。科舉法行，公自度其學可用，投牒試場屋。司文衡者見其持論太高，黜去之。公退而嘆曰：試藝所以困天下英才，吾尙可溺而未省乎？遂絕筆不爲。改轍攻古文辭，積之旣久，其發也益大，以弘聞海虞。多佳山水，將卜居以卒業。海虞顧翁有賢女，久擇壻，無有常翁意者。一見翁，驩曰：才俊如此，郎氣局如此，尙有敵之者乎？竟歸之。公遂爲海虞人。公正直不阿，見諂諛取富貴者，人道其名，輒唾去。家雖匱乏，一髮不以干人，或勸其隨俗浮沉，公怒曰：我豈不知多田兒有粟，肩耶弗聽。後屢自懲創，取老子語以曲全自號，終亦不能改也。縣被水災，有司循故事，督賦甚急，民不堪命，公惻然憐之，率父老四三人往江浙行中書，泣白執政者曰：水潦殺禾，民已無食，又欲重徵之，數萬生靈將化爲枯骨矣。辭甚切直，不少貶，得獨賦一萬五千。縣令張侯某，思行均役法，問計於公，公曰：役未易均也。侯問其故，公曰：侯館人之家，其產最夥，法當居上上。侯果能平之乎？侯變色而作，後竟罷不行。宣城貢君師泰，中書右丞相脫脫公之客，來爲都水庸田使，公以其儒者，作長書贊之。貢君覽其文，論議英發，憚而不敢近。公遂不復上謁。君子多之。公雅好賓客，雖甚貧，必留連款洽，惟恐其亟去。顧氏亦能探

公志。鬻簪珥以市魚肉。不見其有難色。士窮無歸者。或館之終歲。衣且食之。無厭怠。年游饑。客持券謁公。公視其家。僅餘粟五斗。公貸其五之三。故人瞿氏子。將之淮南。囊橐爲羣盜所掠。裸跣走訴。公盡以衣衾巾履遺之。公消搖于門。見敝衣躡履而踏雪中者。公呼之前。予以泉布。終不問其氏名。鄰有錢叟。闔門病疫。無一治。醫事者。公命家人烹粥藥。日再啖之。皆得更生。公之急義。大率類此。然剛而能容。士有忌其才高者。搆爲篇章以詬。或尤公不之答。公曰。吾豈不能文哉。願所見與彼異耳。未幾。遇諸塗。邀與共飯。且贈以白金。其人大慙而退。仲兄以文雄于世。公實堪配之。公之子思先。嘗共編一帙。號爲聯璧集。濂序其首。評公之文。如齊魯大儒。衣冠偉然。出言不繁。曲盡情意。人以爲知言。鄭氏出光之固始。五季末。避亂遷平陽。曾大父某。大父黼。尙宋宗室女。未嘗挾貴勢驕人。其弟行曰九十。僉以九十佛呼之。父愉老。十三通五經。年稍長。遂應博學宏詞科。會宋亡。乃止。妣某氏。妻卽顧氏。先卒。男子四人。長思本。次卽思先。由儒生起家。累官資善大夫。福建等處承宣布政使。以文學政事聞。次思宗。次思祖。陶出也。女子一人。明月。適殷宗信。孫男二人。鵬。鶚。孫女二人。素瓊。素英。皆幼。公壽五十七。以至正乙巳十二月六日卒。以某年月日。與顧氏合葬海虞山西歸蘭若之原。公歿之十年。以思先貴。得贈奉議大夫。磨勘司令。顧氏贈宜人。濂官成均時。與思先有同僚之好。乃奉禮部尙書張籌所造事狀。徵濂爲之銘。濂嘗患士習之陋。志卑而氣軟。撫世酬物。一以詭隨爲務。公之剛毅凜凜。不逐物變移。其君子之人歟。雖然。申根親游孔子之門。尙不以剛許之。剛在古人。亦甚以爲難。有如公者。其君子之人歟。縱不得享人爵。以行其志。而天爵之在躬。固儼然無

愧也是宜銘銘曰

哲人立志以剛爲質。遵道而行。不詘於物。不屈者誰。東甌之賢。其賦自天。其直如弦。狗鼠肆欺。翩然東去。歷覽山川。發舒壯氣。繡衣使者。一見稱奇。爭言可吏。謝而去之。乃潛厥心。乃游六藝。乃聘辭章。聊以見志。俯徇繩尺。往試有司。意我矯亢。黜去不疑。大笑而歸。肥遯不出。英英白雲。生我几席。淫霖化水。殺我黍苗。生民嗷嗷。孰地可逃。走白上官。雙淚如注。中誠感通。卒獨乃賦。化此呻吟。而爲謳歌。仁人之言。計功實多。室如懸磬。心則好施。視彼顛連。如己顛躓。解衣恤寒。縮食濟饑。貪夫聞之。寧不愧而俗衰。民散。師道不立。宜留一鑑。爲世楷則。胡爲長逝。魂入九泉。獨留遺文。虹光燭天。餘慶所鍾。有子能令。出鎮方嶽。敷政一柄。隧道之章。載揚清芬。佞人讀之。當爲褫魂。

故贈承事郎浙東道宣慰使司都元帥府都事陳府君墓誌銘

世之爲人子者。未嘗不欲顯其親。欲顯其親。唯載諸史牒。可以傳於悠久。然史法有例。非顯官貴臣。及勛業殊異者。不書焉。於是往求辭章之家。採著行實。揭於墓門。及其至也。與史牒相爲表裏。庶或少慰念親者罔極之思。或者以諛墓譏之。此豈人之情也哉。台之黃巖。有隱君子曰陳府君。多馴行。年六十九。以至正甲午二月某甲子卒于家。其年三月某甲子窆于縣東龍壇山後。以次子昇貴。贈浙東道宣慰使司都元帥府都事。階承事郎。昇懼府君之行弗顯于世。使其子志持應奉翰林文字同郡楊君秉哲所爲狀。來乞銘。予雖非辭章者流。其忍拒昇之請。而拂其念親之至邪。狀言陳氏本居福之侯官。代有仕者。至樞密

直學士襄其名尤著。襄字述古。世稱古靈先生。古靈。宋慶歷中進士。自浦城簿遷仙居令。其子若孫因留家焉。厥後自仙居徙鄞。或徒黃巖。黃巖。則府君之系也。家乘屢毀于兵。不能言其實爲幾世矣。府君諱勝。祖自德茂。其曾祖某。祖某。宋朝奉郎。有恂恂長者行。父章甫。獨守遺經。朝夕潛玩。視聲利事恆澹如。晚歲尤能安貧。竈烟或終日不起。澄坐無愠色。府君奮曰。吾父固安貧。不思具滌灑以安親者。其人子也哉。於是操廢舉之方。手畫心計而經營之。未幾。貲財漸致殷裕。撫二弟甚至。爲之授室。嫁女弟者三於名閥。一不以經父意。唯日具珍饌奉之。猶恐失父之歡心。父喜曰。吾有子如此。吾將含笑入地矣。人稱府君爲能孝。父既歿。二弟求異爨。府君不能止。量其所存而三分之。曾不數年。皆蕩析無餘。子號寒而妻啼饑。府君惻然曰。兄弟一氣所生。榮悴頓異。吾有目能忍見乎。乃出所受產。復三分之二。人美府君爲能友。非特此也。族屬之中。若冠若婚。若喪若祭。府君無不助成之。鄉鄰有鬪者。多赴懇。府君。府君喻以利害。咸欣然悅服而去。府君生平。以材自負。遭時孔艱。不得展其用。當酒酣耳熱。輒登山臨水。從容嘯咏。以洩其孤憤焉。嗚呼。若府君者。其可謂有志之士。非邪。府君娶阮氏。封宜人。慈柔儉勤。婦儀母道。皆可法。先一歲卒。子男二人。長敬先。寧國路涇縣主簿。次卽昇。嗜學而知文。承直郎。浙東道宣慰使。司都元帥。府經歷。孫男三人。長志。卽來。速。銘者。好讀古人書。而精於科目之業。孫女三人。一適同邑戴韶。餘未行。曾孫男一人。文珪。予在禁林。銘賢士大夫多矣。其績用昭著者。易於言。而潛德祕行者。難於形容也。府君有才如此。使其從政。必粲然可觀。則予之所書。極於焜煌。當不止今之所聞列而已。惜哉。銘曰。

有材而無位。命也可傷。孝友行於家。孰謂非政之良。子令而仕。厥聲孔臧。於燁命書。下賁幽堂。龍壇之山。薦此銘章。過者必式。尙知爲陳府君之藏。

故承直郎刑部司門員外王君墓誌銘

予聞王君孟遠。名者頗久。恨弗之識。洪武庚戌秋。待罪詞林。聞有命徵孟遠至京師。召對謹身殿。授刑部司門員外郎。予悅甚。將修刺通謁。適修史事嚴。未遑也。孟遠尋被上旨。與監察御史。慮囚淮浙之間。及其既還。始胥會成均。孟遠曰。未見君子。悠悠我思。今既見矣。喜將何如。予曰。僕之心。卽孟遠之心也。孟遠大笑。已而別去。暨再見。又屬予曰。先人歿四年。墓上之銘未樹。已歷繁善行。成狀矣。旦夕重有請。願吾子昇之也。自是厥後。旅進旅退。於班行中。每遙見孟遠。各注目相視。彼此雖無言。而情好躍躍然也。當是時。孟遠貌羸甚。身弱。如不能勝衣。予頗疑其不久。樂人世者。復自解曰。昔張谷官河南。與尹師魯。謝希深。二公游。二公方康強。谷獨唾血垂斃。孰知二公既歿。而谷猶未死邪。此殆難以常情測也。辛亥夏。孟遠出爲鞏昌隴西縣令。復來與予別。惓惓以銘文爲請。予熟視孟遠。心益疑。雖自解如前。終不能釋去。因勉之曰。孟遠宜自愛。此別未知何時重見也。余方戴星出入。不能執一觴餞。至都門外。每一念孟遠。爲之戚然。弗寧。越三月。忽孟遠之子興來告曰。先君得腸癖疾。至泗州加劇。以五月二十六日死矣。予病瘍在告。聞興言。淚落枕上。嗚呼。孟遠固羸弱。豈應遽止於是乎。相聞餘十齡。而晤言不數四。豈意真無重見之期乎。賢者天而不賢者。或壽天之夢夢。抑自古而然乎。嗚呼。孟遠諱經。孟遠其字也。姓王氏。其先家鍾陵。宋初有諱。

忠者來撫州爲金溪場官。遂爲金溪人。曾祖榮彰。祖憲。父善。母曾氏。孟遠習科目之業甚勤。夜坐恆至四鼓。目睫未及交。而鷄已再號矣。亟曰。天其昧爽乎。復披衣而起。挾冊映簷光而讀之。尋患家居叢紛。遷於梧山。又遷於雲林。皆有別墅在焉。崖光澗影。飛落戶庭間。孟遠得以清其神思。益自放於文。沛然有不可遏之勢。松滋陳氏。建義塾曰墨濤。聘余太史貞爲五經師。松滋去金溪將二千里。孟遠徒步往從之。悉傳其二戴禮之學。他諸生所造經之大義。太史命孟遠竄定。且曰。是不異吾所爲者。人讀之。亦以太史言爲誠然。非溢美也。至正癸巳丙申科。孟遠兩以是經。取江右鄉貢文解。值天下亂。不得上南宮。退隱漆溪。芟禮記疏爲纂要若干卷。其於名物制度。多有折衷。入國朝以來。侯君元善。以重臣出膺重寄。屢欲辟孟遠。弗之就。已而歎曰。聖天子在上。我可終老山林邪。適徵命至。卽幡然而起。擢爲今官。詳刑鞠獄。人自不以爲冤。朝廷鋤剋吏弊。悉用儒術士。更張之。乃選孟遠爲令。方期孟遠有澤物功。柰何死之。柰何死之。同知泗州事樂景陽。通判王旭。亦哀孟遠之志弗展。共經紀其喪事。輿得以某月日。權厝州西大勝寺云。孟遠剛方人也。或有過。面折其非。視依阿取容者。賤之不與交語。母老。有疾且死。孟遠籲天。請損壽三齡。益之母。厥然而蘇。後三年終。人異焉。所著書有金溪縣志若干卷。唐詩評若干卷。雜詩文若干卷。其一卽纂要也。孟遠之年。僅四十有七。其配張氏。元蒙古字學教授某之孫也。生二子。長翼。次卽興。某月日。二子奉柩還葬金溪某山之原。乃以前禮部員外郎吳伯宗之狀。來徵銘。初。予與孟遠交。嘗許銘其父之墓。尙未及爲。執意先銘吾孟遠乎。人生非金石。歲月飄忽。誠不可以控搏。念之。令人內熱。然孟遠固死。其書可以行。

遠其子足以承家。其不死者固自若也。視夫泯泯莽莽。變滅無跡。類浮雲者。又將何如哉。銘曰。賦也既奇。學也又腴。發也孔時。胡不大其施。玉光之陸離。劍氣之參差。卒闕于斯。茲非人所知。實天之爲。噫。

元故延平路總管項君墓誌銘有序

處之麗水。有文學政事之儒。曰項君諱棣孫。字子華。幼肄業郡庠。終日掩扉習讀。不復踰戶限。時沈然若有思。縱出亦暗誦中途。口作噉喘勢。殊不能自覺也。及冠。用薦者爲本州青田縣學教諭。天歷庚午。遂擢進士第。授同知奉化州事。階承事郎。調福州路總管府推官。改興化路莆田縣尹。轉知福清州事。丁內艱。不赴。尋提舉泉州市舶司事。秩滿而歸。攝鄉郡貳守。累階奉直大夫。同知延平路總管府事。會朝廷遣重臣李國鳳。經略江南承制。陞君爲本路總管兼防禦事。歲餘。卽致其政。隱青田之萬藏山。以至正丙午八月十九日卒于家。享年七十又一矣。君在奉化時。州之女婦。歲以四月八日。羣聚大伽藍。飯僧誦佛書。以求利益。動以數千計。君以其男女無別。有傷治體。揭其事。廉衢禁制之。在福州時。有海賈林氏。嘗駕大舶行諸番間。舶上列旗幟。設金鼓。以備不虞。仇家誣其爲亂。事上。廉訪使者竟簿錄其家。君爲白之。活者數百人。周生用左道惑衆。日以烹煉金石爲事。愚氓無識。指爲周神仙。生藉是出入官署。莫敢何問。君叱縛之。坐以罪。且焚其書。譙樓火。役鉅事殷。連年不克就。君至。召豪右謂曰。臺門旅樹。古之制也。爾等有闔廬以居。坐視師帥於上。而弗遑恤。豈人情也哉。皆來赴功。不日而告成。在莆田時。俗悍而少恩。或有忿爭。輒

搯兒童吭而斃之。持牒訴縣。多陷人於辟。君登者艾于庭。諭以父子天性。縣延數百言。於是更相戒曰。是爲推官。而用法不阿者。慎毋輕犯。其風頓革。在泉州時。適丁歲儉。道殣相望。防禦卒出掠鄉落。或至殺人。君知事且急。往白郡守。俛玉立。共捐俸倡大商入金。易粟振之一郡。獲寧。至正癸巳。福安。羅源。古田諸縣。姦民林君祥等。囑衆爲變。招江西妖人數萬。圍福州。閩海廉訪使郭與祖。檄君集溫陵。興化二郡義兵爲援。君部署有法。分數不紊。帥之渡江。與延平。建寧兵會。城中聞之。士氣百倍。盜恐腹背受敵。中夜遁去。其攝二守時。青田寇吳德祥。鼓三魁五社民。蟠據險阻。官兵往往失利。君與大帥謀。高城深濠。極力備禦。仍命其婿祝彥方。直抵窟穴。歷諭之以福。旣德祥感悅。歸所執縣尹葉伯顏。縣尉薛徹。徹禿。詣大府以降。君爲政簡易。一以愛民爲本。未嘗求赫赫之名。至於忠義大節。持之益力。唯恐或失之。君子稱焉。君之曾祖某。祖某。皆不仕。父祥。奉化州吏目。以君貴。封某郎。麗水縣尹。母陶氏。封宜人。配吳氏。子男子五人。存誠。秉禮。遵道。率性。逢原。存誠。秉禮。率性。皆先後君卒。子女子四人。長婿卽彥方。次歸吳濟。二未行。孫男六人。浩。漢。潛。牧。敏。致。女一人。君卒之明年。實吳元年。丁未。十一月某日。葬君青田鳴鶴鄉文龍原。從先兆也。葬後八年。其甥祝金生。懼君行事日就泯泯。不勝凱風寒泉之思。乃奉叔舅遊道命。來徵墓上之銘。予聞福乃百順之名。宰化權者。其施之於人。甚者也。有如項君。以進士起家。歷仕縣若州。雖其末年數經兵亂。卒能動與吉會。優裕康樂。以考終其身。天之錫君蓋厚矣。況有仁政以澤民。詞章以垂後。實應銘法。予雖不及接君。遂按繁昌令趙叔懷之狀。而件繫之。且爲銘曰。智之營營。才之轟轟。孰能與福爭。矧文路以致榮。

政足以發聲宜鬯而亨文龍之垆有松列旌馬鬣其形過者必式知爲項君之塋

元故從仕郎興化路總管府經歷李公墓志銘有序

公諱約字審初姓李氏唐江西觀察使憲七十世孫而憲則西平忠武王之第七子也憲爲袁州刺史遂家屬縣之宜春五世孫服遷分宜之白芒里七世至時舉宋忠訓郎復遷吉之廬陵縣忠訓生舟迪功郎龍南縣尉龍南生允元允元生去邪去邪生則武則武生誼元初廬陵鳳山書院主領卽公之父也公有大志應進士舉不利卽棄去飄然游燕都達官貴人見其儀觀秀偉舉爲茂材異等署縉山縣學教諭未幾改龍泉轉太和州學正永州路太平寨巡檢江州路學教授廣東宣慰司辟爲令史以年勞上銓曹除贛州路總管府知事攝司獄之職廬陵歐陽某商番禺道出于贛必假館楊氏楊逋其泉久弗償歐陽與絕交楊銜之歐陽自番禺還贛值離險覆舟楊誣其詐不輸稅于官官下歐陽于獄公廉知其實白出之楊服罪張甲有妹歸李乙爲媼家兄弟甲與周丙共牛而耕丙僦乙屋以居已而甲因他事持刃自刎死乙與丙不相能陳丙殺牛而甲不從遂見害丙不禁撈掠自誣服公徵其牛牛存遂釋丙非辜乙抵罪富氓賴氏兄弟無嗣弟產二兒曰邦獻曰邦毅弟以疾卒瀕卒請於兄曰願以邦獻爲兄後邦毅弱未有知幸司其業勞俟長遺之越數年兄亦卒邦獻欲乾沒之邦獻所繼母心爲不平悉取授邦毅邦獻訟弟與母媵人私遂盜券去吏持爲奇貨久不解公召其兄弟于庭泣謂之曰官政成卽代去兄弟垂白相與居與其殫財而健訟曷若分財以全骨肉乎兄弟皆叩頭請自新且致二鹿加厚弊爲公壽公卻之兄弟

請益切。乃受其一。轉興化路總管府經歷。階從仕郎。其爲政如贛州。民寃得直者。多請浮屠誦佛書。徵福于公。公不顧也。屬縣仙游。令馬某。虐用其民。民不堪。陳一壺謀變。焚其官署。馬趨匿山澤中。大府檄公捕一壺。仙游民聞公至。皆執刃驢呼。共縛一壺。實檻車。縣境帖然。部使者謂非公攝縣事。不足寧民。強起公赴之。民復驢曰。父母來矣。公至未久。馬遽出視事。公辭歸。老父百十人。列訴部使者。願留公。使者曰。李公義士。爾能固請。必不忍棄汝。翌日。老父剪綵爲旗幟。銜使者命。往迎公。不得已從之。燕香遙拜者。前後數十里。馬慚其庭中人。以語侵公。公正色曰。仙游本良民。汝旣激之反。乃嫉人撫摩之邪。明當訟汝矣。馬俯首不敢言。會亢旱。公徒步雨舍。禁雨於龍湫。或曰。山高氣寒。非挾纊弗可。公不從。旣而大雨。公遘疾。趣具湯沐浴。正衣冠而坐。呼其次子屬曰。今日午時。吾將終。還家可語同氣。宜以忠厚存心也。言未畢。公所乘馬淚下如注。公遂逝。日薄暮。民髻髻見公乘白馬。揚青旂。疾行道上。騶從甚都。冉冉入城隍祠中。咸異之。馬幸公死。夜使人投石。公家爲妖怪。民忿之。列梃爲備。馬乃止。一日。馬同其黨五人。禱城隍神。五人者拜起。見公據神坐。其色毅然。驚怖而出。未幾。皆暴卒。馬亦爲盜所殺。云。公壽六十三。至正癸巳五月十五日卒。丁酉三月。充奉柩還鄉里。某年月日。葬于東向山之原。娶郭氏。男三人。長徵。次卽充。次永。女二人。適宜春彭琪。吉水楊致道。孫男四人。誠。諒。謙。諒。諒卽來速銘者。孫女五人。皆未行。予聞天地正氣。人藉之以生者。存則爲良臣。殞則爲明神。此無他。浩然不屈。運行於冥冥之中。誠能福善而禍淫也。鄉先達喻公良倚。爲台之臨海丞。有仁政。其卒也。人競夢爲其社神。列旌旗。鳴鉦鼓而去。自時厥後。屢著靈嚮。其事與公頗

類人心天理焉可誣也。法當銘。銘曰。

浩然之氣塞乎玄黃。君子養之。至大至剛。生爲良臣。死爲明神。有光燉燉。亘古弗泯。猗歟李公。爲政孔仁。滌滯洗冤。以子遇民。逆雖無知。公往捕之。民競而趨。縛致檻車。孰焉夢夢。激此禍凶。不以爲勳。覆忌於公。民之戴公。不翅慈父。翩然遐征。我民心苦。白馬青旗。騎從師師。入于神祠。十目所窺。嫉惡剛腸。死亦不渝。廟食有嚴。生氣凜如。銘以昭之。偉哉丈夫。

元故處州路總管府經歷祝府君墓銘

濂朝京師。麗水祝君彥方。以萊州通判引年辭歸。詣濂請其先府君之銘曰。昔季父公榮之墓。辱表而銘之矣。先君政事文行。君子稱之。而銘闕未具。敢復持狀以請。濂受而諾之。未遑也。及歸羅山。彥方復命其子金來。速曰。葬距今五年矣。銘其可後。願終畀之無讓。按國史編修吳從善狀。府君諱大明。後避國號。更之爲大朋。字公亮。勇於爲學。古今載籍。皆探索其大旨。元延祐初。受薦爲武義儒學教諭。以出粟賑饑。陞吉之層山鎮巡檢。吉俗多喜譁訐。女婦童子咸習法律。如老吏。府君至。召耆老子庭。告之曰。所貴乎美俗者。以人有忠厚長者之風。今閭閻細民。不務掩匿人過失。惟以機穽相傾擠。俗之詭薄。孰加於此。此固耆老不能教誨之失也。吾竊爲諸君恥之。於是父兄訓其子弟。使爲道篤。姦妄帖息。既而以親老。自免歸。用事者惜府君才。復起管勾台州杜濱鹽場。場課額固重。鹽廩又瀕海。海潮溢。損鹽以千百計。竈氓鬻家貲。償官猶不足。相率遁逃他邑。前吏莫敢爲計。府君言於朝。得減額三之一。及罷章安。牛頭諸屯民賴以寧。

轉處州司獄。改永嘉鹽場司丞。歲終課增倍。都轉運司才之。俾兼督隣邑五場。有能聲。至正十二年。盜起龍泉。江浙行中書命攝處州路錄事。從擊賊。真授從仕郎。潭州路錄事。未幾。辟爲掾。屢受丞相命。贊諸將幕府。多出奇謀。尋與大將語不合。去。十八年。使者經略江南。最其勞績。承制擢承直郎。處州路總管府經歷。府君捐貲財。助守臣石林忠愍公。築處州城。明年。敵兵破樊嶺關。關吏率兵遁。道過府君里。府君怒。與少子桐山巡檢。執兵當道。呼曰。國家養若曹。以備難也。今敵來。不戰走。將何爲。請亟返。潰兵不聽。刺嶽。嶽死之。城破。府君不復有祿仕意。築別業以居。服隱者服。日與士友遊眺。賦詩爲樂。所爲詩曰。樵隱集。凡若干卷。如是者十有七年。年八十二。以國朝洪武八年正月四日終。是月某日。卽葬焉。先是。彥方自安陸同知歸省。府君謂之曰。吾以六物步之。當終於卯歲。若歲行在卯。其死矣夫。彥方泣識之。旣而果然。府君容貌凝重。人望而畏服。事母呂氏能孝。呂多病。湯藥必手製。乃進。日侍牀下。忘盥濯之節。垢積如漆。弗顧也。呂好佛。老家書。曲承其意。同孝經刊梓。摹印千餘卷。以傳。及卒。刻木爲像。率家人事之。若平生。撫二弟有恩。其一公榮。名載元史。孝友傳中。公榮病。躬薦于祖考。請假其壽。其一公旦。早卒。遇三孤兒。與己子無異。事先尤致謹。先塋在良山。月朔望。走謁。至老不廢。建舍塋側。分田爲祠祀之資。佛老舍近塚墓者。亦割田與之。祝氏散居他郡。歷訪其傳序之詳。列於家牒。里有官橋。水漲輒奔悍。民頗病涉。府君造舟以濟。斥田遺操舟者。使歲繕之。府君嘗創義莊。合族以居。建學以淑鄉之子弟。志之所存甚遠。舉其著者。其餘可類推也。府君娶林氏。宋戶部侍郎覺之諸孫。母儀。婦道。皆可以無愧。前一年卒。葬于良山。而府君與之同。

穴男三人長嵩處州路松陽主簿其次名岑彥方也今以字行仕都邑二十年以政事稱少子卽嶽孫男八人鐵鋪金錠鉉鐘鉞鐵黃陂縣主簿鐘泗州判官一女適陳慶曾孫男八人濟潛濬漢濠濠淵源曾孫女三濠昔銘公榮墓嘗備載其先官諱里居固知祝氏之積累者深遠矣府君之行於家於邦無不可稱述不亦善爲人後哉府君父紹祖之琦曾祖詢宋潭州司戶參軍其始遷麗水之祖曰實以子坦爲兵部侍郎贈金紫光祿大夫司徒河南郡公其墓在今宜慈鄉之杉坑至府君凡一十四世云銘曰祝氏之傳自軒轅譬如江漢遠有源光初受地爲封君後徵并齊宗始分巡更晉亂遂南奔宣城徙家居信安唐衰五季相噬吞光祿始基赫有聞麗水之族久愈蕃孟縣死邊炳焯勳後生綿延于子孫惟君嗜學賢且文初爲求盜化凶歸奸譎爲止風還瀉海潮駕風圯鹽困鹵丁號泣訴秋旻騰書滅徵達天關遁逃復返歌至仁兵興屢參大帥軍指捕山寇如殪豚破家築城酬寵恩國難是赴寧顧身大兵西來捷如神守戍夜遁不敢胸君聞怒視手握瑾舉家障道遇且言國何負若棄不援海內旣宴棲丘園目視利祿如浮雲匪惟有政可著論孝友內充外行教人有其一且難臻矧茲章明非昧昏史著厥弟此其昆比德無愧銘宜均紀揚始終表茲墳宰木有朽名長存

贈承事郎知吳縣事周君墓銘

蘇之吳縣有士曰周君諱文敬字敬之少攻詩書法律食吏祿於潮河東西晚爲平陽州吏目滿歸元末盜據吳遂居崑山年七十四以至正壬寅十一月十五日終有男二人克讓備女四人初君之夫人張氏

以先十五年戊子八月十八日年五十而終。君擇地於吳天平山陰之龍池塢。將葬之。卜於玄武神。自始擇至啓壙。三卜襲吉。其繇曰。利爾後人。忠孝且賢。遂葬。及君卒之明年。克讓將合葬。復卜得前繇。乃以某月某日。穿壙葬焉。元亡。國朝有天下。次子備。以才薦爲和順令。三遷爲通政司經歷。得推恩贈君承事郎。知吳縣事。張氏爲孀人。於是咸謂玄武之繇有徵也。備詣余。泣告其故。且曰。先君之善甚衆。備不能詳。其居家。妻子未嘗見其過行。接士大夫有禮。字矜寡有恩。嘗教備曰。吾惟不思自立。以陷於吏。耄老無所成。惟脩身治人。恒道莫大於儒。爾其勗焉。以顯爾前人。否亦足爲善士。無效吾爲也。備謹服于心。不敢怠。至于今。藉以祿食于朝。皆先君之訓。而先君已不逮養矣。今旣被寵命。爵爲鄉邑大夫。倘不刻文于墓。何以修國恩。而昭先德。願畀之銘。余曰。吳縣君生雖不遇于時。然善格鬼神。而告以吉壤。德遺于後。而享茲寵贈。其得於天者。不亦厚耶。爾後人能繼忠孝。以承以昭。斯可以銘矣。君曾祖某。祖某。考必亨。孫男曰庠。孫女二。一適顧某。一在室。銘曰。

挺挺令士。世不祿之。巍巍佳城。神具告之。世雖爾遺。神不爾欺。厥膚孔良。榮命是推。善格于天。亶若著龜。有不信者。來考豐碑。

元故靜江路大墟務稅使王府君墓誌銘

王府君諱善。字復善。其先由鍾陵徙金溪。自曾大父重。大父榮彰。父寔。雖無仕者。皆以徽行聞於人人。府君成童時。人試以屬句。脫口成對。比物別類爲精。已而學爲詩。輒取能聲。年十三。父喪。去御家事。尋操奇。

羸之術。游七閩。家乃大穰。自歎蚤廢學。力迪其子。以經術築精舍一區。聘碩士居之。朝夕策厲。若斯須不
忘去者。俄俾從師二千里外。膏梁之饋。絡繹道塗。曾不以爲煩。及見長子經。用禮經連。領鄉薦。喜曰。有子
能通經。吾雖廢學。政復何憾。至正中。天下兵動。江右化爲盜藪。府君室廬盡燬。崎嶇攜家走山澤。能以智
取。下帖帖然寧。且資用亦無乏絕。智者心服之。先是有授府君南豐醫正者。府君以醫爲一藝。弗上方。嶽
大臣又薦爲靜江大墟稅使。亦不就。至是。愴然自放。山水間。舉觴屬客。撫脾高歌。遺落世事。或飲至一石
不亂。未幾。以疾終。壽六十三。實洪武戊申五月十五日也。卒後三年。當辛亥某月日。葬柘步山中。禮也。府
君娶曾氏。子男三。曰經。承直郎。刑部司門員外郎。曰綸。金溪醫學教諭。曰慶郎。蚤卒。女一。胥豫其壻也。一
夭。孫男五。曰翼。曰翼。曰憲。曰德昌。曰有慶。予嘗聞經言。府君之善行不止是。其事親尤孝。視聽恆在形聲
之先。奉繼母亦如之。遇羣季。多友愛。人取以爲法。嗚呼。若府君者。其所謂一鄉之善士。非邪。銘曰。
孝聞于鄉。道則允臧。闕不自耀。唯子之教。彼遺金籙。我以一經。賢愚殊軌。曰圖其始。學之爾惇。足昭乎文。
吁其死矣。不復還矣。孰廓其潛。太史氏濂。

元贈進義副尉金溪縣尉陳府君墓銘

予在禁林。四方賢士大夫咸辱與交。多以塚上之文爲請。予憤蘇氏矯枉過正。以銘墓爲嫌。每詢孝子慈
孫之志。輒濡毫爲之。江右陳聞。時客授丞相府。亦持國子助教。曾君士勗所爲狀。來謁銘。嗚呼。聞遇予特
厚。何敢靳一辭。不發其先德於幽潛耶。按狀。府君諱天錫。字國範。姓陳氏。其先出陳宜都王叔明之裔。有

諱伯宜者。辟地泉州。已而自泉徙江州之德安。子孫同居十餘世。旌號爲義門。九世祖城。又自德安徙撫州臨川之安寧鄉。其里曰唐正。曾大父宋鄉貢進士以忠。再遷鄉之槎溪里。祖鴻翼。父從龍。母李氏。府君生三歲而孤。依母夫人以居。暨長。氣貌雄偉。不屑爲流俗娼娶事。出言持論。意度豁如也。元至正十二年壬辰。大盜起江漢間。郡縣相繼陷。聚落民爭揭竿爲旗。以應寇。府君頓足曰。事急矣。奈何。卽躍馬入郡城。白監郡完者帖木兒曰。天錫先世以義聲著吳楚間。今天下大亂。賊以紅帕首呼嘯成羣。所蹴踏處。絕無一人禦者。天錫雖不才。誓竭忠以報國家。自度鄉里健兒。一呼之間。可得千人。甲冑糗糧。當一一自給。不以煩縣官。教其坐作擊刺進退之法。可用。或守。或攻。惟明公所命。監郡爲之驚喜曰。此奇男子。此奇男子。卽署文牘。遣府君問道白江西行中書時。司徒道童爲平章政事。卽從所請。獎勵者甚力。府君還。朝夕聚兵訓練。如前謀。五月二十四日。帥之以援郡城。敗劇盜胡志學於城西白鷺渡。六月四日。進賢寇大掠城東桂塘。府君分兵設爲四覆待之。期以鉦鳴爲候。伏盡起。先令騎兵餌敵。敵至。卽退二里。所賊果追擊。交戰方酣。鳴鉦一聲。伏兵突出。賊後殲戮無餘者。省憲二府。益奇府君之才。檄靖安尹黃紹。與府君同討賊。二十二日。府君與紹次進賢縣直隲鄉。鄉有韓家峇。寇之窟宅。堅深未易拔。雖攻以銳兵。每不利。府君欲以久困之。紹曰。鼓行氣壯。將寇是剪。公欲坐老我師耶。遽揚旛挑戰。府君止之不可。仰天歎曰。師出以律。今戰不擇利。雖頗收不能建功。吾不知死所矣。賊見官兵新至。人馬俱疲。鼓譟爭四出。府君注矢彎弧。獨當一面。賊至。輒殪之。轉鬪田間。時秋禾垂熟。馬餓亂走。府君中流矢。亟下馬拔刀。與賊步戰。連斫十餘人。

乘賊易府君之獨也。急趨之。府君欲退。爲禾穗所罾。遂遇害。年始五十七云。事聞。特贈金溪縣尉。階進義副尉。府君讀書。務通大義。不專辭章浮藻。嘗語人曰。君子當真知實踐。喋喋空言。何補於事功。當時公卿大夫咸與之遊。而揭文安公僎斯尤號爲知己。而遠近名士若同郡孫君轍。危君素。葛君元哲。番陽李君存。祝君蕃。豫章楊君鑑。皆使諸子執贄往從之。游期學必成乃已。府君家雖豐。輕財好施。與州里有空乏者。必周卹之。未嘗有德色。聞府君之歿。識與不識。皆潸然出涕。府君夫人進賢楊氏也。諱叔真。世爲儒家。其曾祖仲博。與子龍尾同舉進士。祖天璧。父居仁。母支氏。九歲失所恃。卽歸于陳。其姑鞠育之。夫人天性慈順。事姑以孝聞。姑年八十而終。夫人亦年垂六十。痛姑死。幾不能喪。雖丁兵戈殘毀之餘。棺槨衣衾。皆極其精緻。且曰。老姑以女遇我。其歿也。敢不以喪母喪姑之禮兼報之乎。君子以爲賢。常府君之歿。夫人痛不得屍還葬。欲自盡者數矣。重以姑在。不忍言。夫人旣葬姑。乃聚府君衣冠爪髮。藏諸櫝中。泣謂諸孤曰。汝父存時。吾侍巾櫛。一爪一髮。未嘗敢棄遺。爪髮之存。卽汝父體魄之存也。待吾他日身歿。當并冠衣與吾同穴葬。庶幾後世不以汝父爲虛墟也。諸孤亦泣而識之。今洪武四年辛亥七月九日。夫人年七十七。亦以一疾卒。六年癸丑正月四日。聞遺命。合窆于烏槎原水口山祖塋之側。去家不二里。而近府君生三子。長式。次庸。舉茂才。爲柳州路儒學正。皆先卒。次卽聞。通尙書。以文詞德行。有名于時。孫男九人。曰崇。先卒。曰石。曰棟。曰謀。曰位。曰儉。曰倣。曰旣。曰鑑。孫女六人。適胡琮。饒鶴。萬梓。文彬。黎應辰。胡泰。曾孫男九人。曰括。曰援。曰鄧。曰拂。曰挺。曰回。曰授。曰拱。曰申。如曾孫女十一人。適王某。王某。王某。周某。餘幼在室。

嗚呼。君子之澤。何其演迤而深長哉。府君之先。能以義聚族而居。聲聞赫奕。光照史冊。世之相去雖遠。子孫復能推義爲忠。期與國家殄寇。則其所志甚大。非直欲保族里而已。其功之不成。則天也。昔人有云。作文當有關世教。有如府君之行。其謂之無關於世教可乎。是宜銘銘曰。

天地大經。曰義與忠。丕建人極。廓牖民衷。前聖敷訓。爲世鉅防。孰遵行之。其道彌章。九江有陳。合族而食。流澤沛滂。炳煥今昔。元季政靡。亂生楚疆。絳巾跳眼。執戈以狂。有烈丈夫。乘氣飛獐。嚼齒罵賊。誓不俱生。躍馬入城。揖拜上官。披陳肺肝。肯避險艱。赤手一呼。從者及千。獸盾蛇矛。勢將壓山。揚旗出逐。寇駭而奔。是屠是劉。勇氣益振。疇昧先幾。謀或非違。我以死抗。我志敢墮。人誰無死。死能爲國。不忝厥家。身又惶郵。其氣之雄。不隨物遷。營魄來歸。有風冷然。爪髮雖微。與四體同。旣樹而封。松楸鬱葱。巫陽下招。勿之四荒。幽宮是藏。有永其康。

故吉安府安福縣主簿潘景嶽甫墓銘

嗚呼。是惟景嶽潘氏之墓。潘氏遠有世序。其居鄱陽郡城者。曰某。曰某。宋嘉定間。聯捧貢書于鄉。有司榮之。爲易所宅之坊。爲擢秀。至景嶽。凡十有三世云。景嶽諱樞。景嶽其字也。少刻厲經史學。及長。思以才自表見。朝夕芒角。撐觸心胷間。不吐出不已。元季干戈倣擾。吉安爲劇盜李明父子所據。椎埋之徒。相推爲雄長。蠶食十餘州。各置僞帥。統之。而自指吉安爲窟宅。當是時。安福罹屠剝者尤酷。至正甲辰冬。王師下吉安。明父子宵遁。安福歸于職方。有薦景嶽於上者。召見與語奇之。擢安福州判官。乙巳春。景嶽獨署州

事蚤夜出入士馬間。食不暇下咽。初李寇俘掠男女數千。軍卒將滅獲之。景嶽白主帥鄧衛公曰。將軍奉揚天威。削平大慙。渠魁遠竄。人心未寧。子女係累者。將軍當一切釋之。方契伐罪弔民之義耳。辭氣激烈。聽者悚畏。持槩之士。或怒視於傍。景嶽神色自如。不爲動。衛公獨欣然曰。微爾言。吾不能知也。卽令騎兵大索。下令曰。敢有囚吾民者。斬。民爭去縛趨景嶽。景嶽真空舍。戒勿出自坐舍外。日設淖糜食之。女婦稍黠者。俾以塵土洗面。衆卒銜憤。議乘夜劫舍中。景嶽偵知之。授以計曰。脫有宵警。當同聲疾呼。已而果然。聲聞于外。衛公驚起。使人問其故。景嶽具以實對。衛公擒其首惡者。鞭之流血。咸噤不敢譁。景嶽度道塗遠近。次第放之。其無家者。與居旁縣者。召其戚屬辨識而歸之。大兵還。戍安福者僅五百。而降卒居其半。潛與李寇通。晝夜鈔掠爲姦利。民訴于庭。景嶽遣人臨跡之。乃自西門入。景嶽懼爲變。愈傷民。不敢何問。乃如所失償之。兵後遺氓。烏形鵠面。遞入荒茅中。城無吠犬。虎狼之迹。交道自景嶽之至。流亡漸集。樹苦廬以居。會歲儉。將有溝壑憂。景嶽以計貸粟於民。活者幾萬。景嶽方喜。可以行政。降卒終不悛。搆永新寨丁二萬。鼓譟西下。新附戍將賈某。首鼠觀望。欲下城門鍵鑰。不聽民出避。景嶽說之曰。國家兵威之盛。公所知也。李明旣順。復逆。其滅亡可待。固不必汚齒牙。頗聞宋將岳飛能獲宜興民。至今尸祝不廢。公能行之上。必以公爲飛矣。公其有意否乎。賈感悟。乃開北門縱之。吏民知寇勢張甚。乃擁景嶽詣大府乞師。先是景嶽嘗上疏陳利害于朝。至是命大將王國寶帥師至。與賊大戰嘉林渡。賊大潰。景嶽還州。州民見之。有泣下者。且曰。潘判官在。吾屬無患矣。已而中山侯湯公統大兵壓境。景嶽走轅門獻計。公納之。秋毫無

犯大兵攻永新。景嶽集千夫轉輸芻餉。夫苦重不前。景嶽白于湯公。特減輕之。與戎馬參錯行。無敢侮者。別隊卒過郊。斂人貨泉。景嶽屬吏取之。卒刺以矛。景嶽曰。是不可一朝居也。將上其事。軍帥懼。痛懲卒。令謝過而去。自後恒帖帖。指其城曰。中有健吏。慎勿犯。或欲循舊弊。抑農爲兵。景嶽泣告湯公。湯公曰。此與山寨何異。咸罷之。民大悅。景嶽遂卽州署。釋奠孔子。復於殷仲堪讀書臺設學。以淑俊秀。月旦十五日。敷釋經史。孳孳弗倦。洪武戊申。改州爲縣。署爲縣主簿。階將仕郎。前後在官凡九年。治爲江右諸邑最。朝廷嘉其能。召赴闕下。未及用而歿。時癸丑十一月二十一日也。年五十一。其子桓。權厝于京城之南。以甲寅十又二月。奉柩葬鄱陽某鄉先墓之次。禮也。景嶽曾祖子培。祖志道。考希古。妣胡氏。希古有文學。善推易數。元陰陽學教授。號東湖適士。一旦病疫。將革。胡氏拔髮毛祝天。期以身代。翼日而夫愈。後五日。胡氏果終。東湖遭大亂。誓不與賊同汗。後遇寇將加害。景嶽及弟槐。楫柄爭欲代死。寇憫而釋之。人爲作五義士傳云。嗚呼。君子之學。在存心澤物而已。有如景嶽。退然如不勝衣。至臨大事。以一夫而當萬夫之勇。不顧死生利害。卒生民人。真無愧奇男子也。傳有之。活千人者。其後必封。當於其子孫望之。予雖不識景嶽。據江西顏文鈞黃虛所錄狀。具著于篇。而繫之以銘。銘曰。

元季釋騷兮。妖民夜呼。焚毀城邑兮。是劉是屠。勢如狂瀾兮。簸盪失滯。真人龍飛兮。奉行天誅。維此安成兮。莽爲盜區。亦旣稽首兮。入我版圖。帝掄良材兮。往佩縣符。我民曷依兮。曰父母且。彼饑吾哺兮。危則我扶。拔於水火兮。眞諸康衢。一身之弱兮。心雄萬夫。死生不顧兮。唯義是趨。志不盡展兮。隕魄黃墟。聞者酸

幸兮。淚與涕俱。鄱陽之山兮。降勢縈紆。薦此石章兮。過者下車。

元故湖州路德清縣尹陳府君墓銘

吏部主事陳咨詣予言曰。咨試藝京畿時。先生實爲主司。屢欲求銘先府君墓。已而授河南行中書檢校。官書有程。竟弗獲遂前志。及仕銓曹。而先生謝事東歸。晝夜恒懸懸入思。今逢先生朝京師。敢奉同郡字。文材所撫事狀以請。惟先生界矜之。予按狀。府君諱嗣乃。字仲貞。姓陳氏。世居湖之長興。其先出自漢太邱長寔。寔傳若干世。曰某。宋臨安丞。臨安生某。遷居郡城之南。以貨雄于鄉。年九十乃終。生某積學勵行。有聞于時。自號爲庸齋。庸齋娶施氏。無子。擇從子爲之繼。惟府君風指孤鶩。足以當其意。因後之。府君性軒豁。開口吐肝膽。好傾貲結賓客。或有急難。輒捐金以濟之。既而曰。人不可以無教。不教。惡足以明彝倫。乃建義塾。聘致名師。州里子弟願從者。悉聽其入。材多有成。元季。汝穎兵發。蔓延浙水西。髡鉗盜販者。相挺爲變。府君椎牛醞酒。聚年少健兒。授以控扼之策。盜不敢侵其境。會朝廷遣使者。詔民入粟拜爵。府君慨然曰。國家有急。豈臣子顧私時邪。首往應詔。輸粟二千斛。使者大悅。卽以上聞。署府君德清縣主簿。德清湖之屬邑。府君素知其土俗。視事始閱歲。吏懾人懷。曾未幾何。張士誠據姑蘇。兵陷湖州城。守臣退居德清。府君曰。杭爲東南方面之寄。德清實杭之北門。德清破。則杭無實足之地矣。宜急保之。遂與上下謀。竭力死守。軍食或不繼。以身任之。江浙行省平章政事買尤丁。方總兵事。上其功狀。陞爲尹。達識帖木爾時以行省右丞相承制行事。欲招士誠降。命府君持檄諭湖州僞帥。以離其黨。與府君慷慨請行。既至。僞

帥延之上坐。府君爲敷陳大義。何者爲順。何者爲違。逆則禍。順得受福。繩繯千餘言。僕雖不覺屈膝。城遂來歸。丞相大悅。而府君不幸。以母憂去。自時厥後。府君度時事不可爲。累辟不起。以至正某年某月日。卒于歸安縣之寓舍。享年四十又五。以某年月日。葬于烏程縣三碑鄉賢子塢先塋之次。娶吳氏。有賢行。頗涉獵書史。至於陰陽醫卜種樹之書。皆通其義。後府君若干年卒。遂合葬焉。子男子四。長卽咨。次某某。次某。孫男二。某某。嗚呼。府君以卓犖之才。少見諸用。已焜燿鏗鎗若此。况使盡其所蘊者乎。然而炳於幾先。長往山林而不之返。非賢而能爾乎。今逢六合載清。禮樂文物之盛。比隆唐虞。而府君已逝。不及見君子。寧不爲之太息乎。雖然。府君有子。以科目入官。政跡昭著。府君雖死。其不死矣乎。銘曰。天之生材。或塞或通。祗繫於時。所以不同。有倬陳君。氣岸弘整。表裏一如。錙銖無隱。里有急難。捐金如泥。蹈彼水火。必思救之。欲明彝倫。我建我塾。載揚師訓。開其耳目。元季致亂。亂如沸羹。浙河之疆。烽火煌煌。奮襁大呼。聚厥勇士。持爾干戈。捍我鄉里。出粟補官。勾稽簿書。隱維堅城。寇不可踰。封豕長蛇。據我大府。奉檄往諭。氣可偪虎。義嚴辭勁。直中其機。不覺屈膝。請降恐遲。相臣嘉之。謂爲俊傑。軍威大振。孰得而遏。君則曰噫。此胡可爲。大廈將傾。一木莫支。尋以憂去。遂臥不起。朝餐烟霞。暮采蘭芷。令終于家。州里咸嗟。有材莫展。時乎命耶。靈風肅然。吹彼墓樹。魂兮來歸。安此幽隧。

故民匠提舉司知事許府君墓誌銘

濂在詞林時。聞有衣冠之胄。許其氏而進其名者。宦游于外。不勝其思親之情。春華之朝。秋月之夕。恆至

於瞻望隕涕。鄉友王內翰徵濂爲辭。以少慰其深衷。後四年。與進會南京。進乃言曰。昔者思吾父而不獲見吾父。固無恙也。而中心猶怛怛然。今父則逝矣。屢欲相從於泉臺。恐乖以死傷生之訓。輒苟存視息。以迄于今。然則何以自靖其心哉。惟墓門有石。可以鑰遺行而敷休聲。夫子嘗厚我矣。敢緣此故。稽顙再拜。以請。願夫子終惠之。謹按歐陽時中所爲狀。府君諱嗣宗。字原仲。姓許氏。其先洛陽人。有諱叔向者。仕唐爲某州刺史。生安福。令嶽亂。值黃巢亂。棄官歸袁之萍鄉。萍鄉之有許氏。自此始。安福生二子。曰宗。曰載。皆多孫子。宋時以文學自奮。爲郡僚屬。及縣令長者。前後相望。家牒燬于兵。咸無所徵。曾祖某。祖季謙。某年進士。某官。父斗祐。府君生有異質。嗜學弗倦。取六經百氏。晝夜探其精微。已而嘆曰。爲學貴行。不行而能言。雖如簇錦。將何施邪。益博心家政。旁及樹藝之事。久之。費若產。超於前人。遂以事親訓子。姓爲務。家西百餘步。斷土爲臺。引清流遶之。奇葩叢篁。環列於左右。樓英涼翠。蓋鬱然云。府君建聚景樓。其間翼以衆芳。俯清天心。水面諸亭。幽靜軒敞。一塵弗侵。府君奉板輿游其中。俾童冠者。隨薦紳家。嚙筆書。孳孳弗之解。稍有餘暇。輒集賓朋。雅歌投壺。以自樂。府君曰。可則可矣。苟不以禮自治。何以示悠久。乃稽諸子冠婚喪祭之禮。肄習而行。復擇並舍常稔之田五十畝。焚其質劑。永收其入。以供四時祀事。州里之間。有凶夷。單窶弗自支者。且振而給之。大司徒楚國歐陽文公當世大儒也。義府君之爲人。結爲交友。嘗寄詩以寓其意。至正初。當路薦爲唐州等處民匠提舉司知事。命書旣下。州人士具壺觴以爲壽。府君笑曰。吾秋髮種種矣。尙何情落官職哉。辭弗赴。巫辰之亂。吳楚之變。日格鬪弗休。唯齊鄉受禍最酷。父子相枕藉。

而死。鄉無完家。府君能先事而避。轉徙餘三十所。一門能獨安存。不異承平時。及天下大定。府君退隱雙清精舍。林壑秀美。日斷無來人。府君拄頰看雲。縹緲輪囷。卷舒自如。悠然有會心處。則與高人勝士酣歌互答。有不知夕陽之在樹也。已而遘微疴。卻藥不之御。氣息奄奄。猶力疾命諸子曰。而等當以忠厚繼其家。言訖而逝。時洪武四年七月二十四日也。壽年七十有七。娶彭夫人。生四男子。庭蘭。庭秀。庭桂。庭春。庭蘭蚤世。庭桂今更名進。卽濂所爲賦。思親辭者。入國朝。用上官薦。擢廣信府知事。階將仕郎。請寬賦以恤民。修蘭以化俗。人懷之。孫男五人。觀。恂。惠。憧。惺。越三年二月十九日。藏府君於縣之名教里三峯山下。惟府君之讀書不眩其文。而食其實。故以之治家。則大穰。以之奉親。則悅而愉。以之勵子姓。則飭以修。以之辟地。則能去危而就安。何莫非推其所學也。視彼膠固章句。資爲絺繪之辭。以誣世者。有間矣。銘曰。我經我舒。我已食其腴。我心之匪忤。我將還其樸。智以全其生。禮以悼其薄。有家之穰穰。有聞之章章。有子之鏘鏘。維士也良。而其行为也又方。采掇其英。銘以昭其藏。

元故奉訓大夫江西等處儒學提舉楊君墓誌銘有序

元之中世。有文章鉅公。起於浙河之間。曰鐵崖君。聲光殷殷。摩夏霄漢。吳越諸生多歸之。殆猶山之宗岱。河之走海。如是者四十餘年。乃終。瀕終。召門弟子曰。知我文最深者。唯金華宋景濂氏。我卽死。非景濂不足銘我。爾其識之。卒後三月。吏部主事張學。暨朱芾等七人。奉其師之治命。來請。濂旣爲位哭。復繫其爵。里行系而造文曰。君姓楊氏。諱維楨。廉夫。其字也。裔出漢太尉震。震十八傳至。唐分爲四院。第二院。太師

虞卿生堪。堪生承休。承休生崑。五季時。錢氏有國。崑仕至丞相。自譜爲浙院崑之孫。都兵馬使。伴徙浙水東。又分爲浙左院。伴之子成隱。居會稽諸暨之陽。復爲諸暨人。君之十世祖也。高祖父振。曾祖父脩。以善嗜義聞。人呼爲楊佛子。祖敬。父宏。贈奉訓大夫。知温州路瑞安州事。飛騎尉。追封會稽縣男。妣李氏。追封會稽縣君。宋丞相宗勉四世孫也。當縣君有姪。夢月中金錢墜懷。翼日而君生。大夫公摩其頂曰。夢之祥徵。其應於爾乎。稍長。從師授春秋說。講析辨刺。幾踰百十家。大夫公期以重器。至弱齡。不爲授室。俾游學甬東。粥廐馬以益裝錢。君節縮不妄費。購黃氏日鈔諸書以歸。大夫公驩曰。此顧不多於良馬邪。躬爲裝褫。使之周覽。秦定丁卯。用春秋擢進士第。署台之天台尹。階承事郎。天台多黠吏。憑陵氣勢。執官中短長。先以餌鉤其欲。然後扼吭。使不得吐一語。世號爲八鵬。君廉其姦。中以法。民方稱快。其黨頗蚓結蛇蟠。不可解。君卒。用是免官。久之。改錢清場鹽司令。時鹽賦病民。君爲食不下咽。屢白其事。江浙行中書弗聽。君乃頓首涕泣于庭。復不聽。至欲投印去。訖獲減引額三千。俄相繼丁外內艱。結廬於桐原墓。族屬有酹墓者。植竹筵於前。筵發孽芽。枝葉鬱如也。自是不調訟曹者十年。會有詔脩遼金宋三史。君作正統辯千言。大司徒歐陽文公玄讀之。歎曰。百年後公論定於此矣。將薦之。又有沮之者。尋用常額。提舉杭之四務。四務爲江南劇曹。素號難治。君日夜爬梳不暇。騎驢謁大府。塵土滿衣襟間。有識者多憐之。而君自如也。轉建德總管府推官。陞承務郎。君悉心獄情。必使兩造具備。鈎撻隱伏。務使無冤民。居無何。陞奉訓大夫。江西等處儒學提舉。未上。會四海兵亂。君遂浪蹟浙西山水間。及入國朝。天下大定。詔遺逸之士。脩纂禮樂。

書。頒示郡國。君被命至京師。僅百日而肺疾作。乃還雲間。九山行窩。疾且革。移拄頰樓中。呼左右謂曰。吾欲觀化一巡如何。乃自起提筆。撰歸全堂記。頃刻而就。擲筆曰。九華伯潘君招我。我當往。車馬俟吾且久。遂泊然而逝。似聞數十人從函道登樓。其步履之聲相接。時大明洪武庚戌夏五月癸丑也。年七十五。及門之士。上書於郡守林君公慶。以封塋爲屬。林君欣然從之。擇地華亭縣脩竹鄉干山之原。以六月癸亥。舉柩藏焉。君初聘錢氏。忽遭惡疾。錢父母請罷昏。君卒娶之。疾尋愈。繼鄭氏。陳氏。子男一人。杭。鄭出也。孫男一。某女一。未行。所著書。有四書一貫錄。五經鈐鍵。春秋透天關。禮經約。君子議。歷代史鉞補正。三史綱目。富春人物志。麗則遺音。古樂府。上皇帝書。勸忠辭。及平鳴。瓊臺。洞庭。雲間。祈上諸集。通數百卷。藏于家。初。君爲童子時。屬文輒有精魄。諸老生咸謂咄咄逼人。暨出仕。與時齟齬。君遂大肆其力於文辭。非先秦兩漢弗之學。久與俱化。見諸論撰。如覩商敦周彝。雲霧成文。而寒芒橫逸。奪人目睛。其於詩。尤號名家。震盪凌厲。駸駸將逼盛唐。驟閱之。神出鬼沒。不可察其端倪。其亦文中之雄乎。名執政與憲司紀者。豔君之文。無不投贊願交。而薦紳大夫。與巖穴之士。踵門求文者。坐無虛席。以致崖巖野刻。布列東南間。然其風神夷冲。無一物縈懷。遇天爽氣清時。躡屐登山。肆情遐眺。感古懷今。直欲起豪傑與游。而不可得。或戴華陽巾。被羽衣。泛畫舫於龍潭鳳洲中。橫鐵笛吹之。笛聲穿雲而上。望之者疑其爲謫仙人。晚年益曠達。築玄圃蓬臺於松江之上。無日無賓。無賓不沉醉。當酒酣耳熱。呼侍兒出歌白雲之辭。君自倚鳳琶和之。座客或踟躕起舞。願盼生姿。儼然有晉人高風。或頗加諂讓。亟罵曰。昔張籍見韓退之。退之命二姬合彈。

箏瑟以爲樂。爾謂退之非端人邪。蓋君數奇諧寡。故特託此以依隱玩世耳。豈其本情哉。性疏豁與人交。無疑二賤而賢。禮之如師傅。貴而不肖。雖王公亦篋視之。平生不藏人善。新進小子。或一文之美。一時之工。必爲批點。黏于屋壁。指以歷示客。尤不錄人以小過。黠奴負君金。度無以償。逼君書收券。君笑與之家。藏古名畫。爲西隣所竊。其僮人追執之。君曰。吾業與之矣。無賴之徒。僞爲君文。以冒受金。緡或疑以爲問。將發其姦。君曰。此誠予所作也。不論遠近。皆知君爲寬厚長者云。激者之論。恆謂名者天所最忌。矧以能文名。則又忌之尤者也。所以文人多崎孤坎壘。以終其身。視富與貴。猶風馬牛不相及也。嗚呼。豈其然哉。彼貨殖者。不越朝歌暮絃之樂。爾顯融者。不過紆朱拖紫之華。爾未百年間。聲銷景沉。不翅飛鳥遺音之過耳。叩其名若字。鄉里小兒。已不能知之矣。至若文人者。挫之而氣彌雄。激之而業愈精。其崑立若嵩華。其昭回如雲漢。衣被四海而無慊。流布百世而可徵。是殆天之所相。以彌綸文運。豈曰忌之云乎。嗚呼。君真是已。然君不可謂不幸也。使君志遂情安。稍起就勳績。未必專攻於文。縱攻矣。未必磨礪之能精。藉曰既精矣。亦未必歲積月累。發越如斯之夥也。斯文如元氣。司化權者。每左右馮翼。俾其延綿而弗絕。則其養育以成君者。豈不甚侈也邪。一世之短。百世之長。如君亦足以不朽矣。或者乃指此爲君病。豈知天哉。濂投分於君者。頗久。相與論文。屢極玄奧。聞君之死。反袂拭涕。久之。念君之不可再得。不敢有孤所屬。故爲具記其事。而又爲些辭一章。以代勒銘。庶幾招君歸來矣乎。其辭曰。

魄淵流金。降空青些。結英揚靈。瀆于成些。獨騎麒麟。傷遺經些。衰鉞是非。嚴天刑些。執軋以摧。勢相傾些。

濬發厥辭。益崇微些。芳潤內洽。光精外形些。離方逐圓。班部自寧些。流霆下春。百里震驚些。鸞駕鳥瀾。天機呈些。鐵甲瑠戈。百萬宵征些。茗翹豎堅。媚韶榮些。籠絡萬象。橐籥三靈些。彈壓物怪。晝夜哀鳴些。九華丈人。召還紫清些。白鹿夾轂。五霞駟些。迴風脩脩。雲繩繩些。天人殊軌。誰強撻些。絳府雖樂。毋淪洞冥些。盍乎歸來。返故庭些。

故宋迪功郎慶元府學教授魏府君墓誌銘

洪武三年秋八月。京畿多士。較藝於鄉闈。予時被旨。與魏君潛。與聞考試事。既入院。復同館舍。每閱卷。相與共論定。所見頗脗合。將還。潛跽而請曰。曾大父之歿。七十又八年矣。下棺之石。有竅而無辭。今幸得陪末議者。隸旬。敢藉龜靈。以發其幽光。死且不朽矣。予不能辭。府君諱新之。字德夫。姓魏氏。世居睦之桐廬。曾大父子才。大父演。父國賢。皆隱約田里。以善人稱。至府君。始以力學自奮。與兄升龍。從子雲潭。受書易於鄉先生王公某。已而三人皆薦于鄉。而府君繼擢宋咸濟。辛未進士第。初授慶元府學教授。階迪功郎。未上。轉運司檄府君考試永嘉竣事。同列卽治裝行。府君問故。皆曰。士之被黜者。將生諱。不如避之。府君笑曰。有是哉。毅然獨留。果有一士。頎然而長鬣。揭籬問去取之意。辭色甚厲。府君曰。爾文固佳。如犯不考。何士猶擄。挂弗服。府君曰。某行某字。正係廟諱。吾以墨圈之。今猶在。命左右取示之。士慙沮。衆皆引退。及至官。以濼洛關正學爲己任。推明中庸性道教奧旨。反覆殆無餘蘊。初。鄞士多宗金溪。二陸氏之學。聞府君之學。翕然信服之。學錄劉光。尤所畏敬。光嘗集解孝經。自謂無所憾。府君爲刊正。十有一條。皆有闕

物則民彝之大者。光不覺下拜曰。先生之言。其於聖經深有合哉。鄙人有粥新書者。府君閱之。不忍釋手。粥者曰。君欲默記乎。府君曰。然。曰。所閱幾何。曰。將盡卷矣。曰。能記憶乎。曰。然。遂琅然成誦。不遺一字。人驚以爲神。以書遺焉。浙東提舉黃公震。一見府君器之。遂以文學孝廉薦于朝。會國事日非。不果召。德祐丙子。元兵入臨安。游軍至鄞。鄞學時設兩學教授。號東西廳。西廳教授王棹懼甚。奔告府君曰。吾儕死生。決於今日矣。府君從容答曰。非止今日。有生之初。已定。不若聽之。顏色不少變。及事平。間關歸故鄉。家素單乏。蠶鹽或不繼。府君負薪而炊。扣角而歌。矐如也。所居有垂雲洞。因倡嗜義之士。建垂雲書院。開迪新學。孜孜如不及。講經之暇。與蛟峯方公逢辰。潛齋何公夢桂。盤峯孫公瀆發。爲泉石之游。間賦詩以見其志。學者尊之。號爲石川先生。元至元間。詔王御史某求賢大江之南。縣大夫楊得藻舉府君應命。力辭而不就。其風節凜然。人至今仰之。年五十有二。歿於元貞癸巳某月日。以某年月日葬于柯阜之原。其徒誄之。謂府君精思而陋詭隨之習。知至而黜偏駁之非。自窮而達。不改其操。運去物改。弗涅以緇。蓋實錄云。府君娶王氏。子男子三人。良恭儉。子女子三人。姚某。俞某。張某。其壻也。孫男三人。鈞。鏞。鈞。至正丁亥鄉貢進士。鏞。桐廬縣學教諭。曾孫男四人。潛。溥。激。浩。潛。乙巳鄉貢進士。入國朝爲尙寶丞。階承直郎。府君篤學自信。清脩苦節。以終其身。而尤注意於易。閩人有朱英湖者。精於諸家之說。與府君遇。諸塗。府君知其名。要之抵家。朱歷叩易中難明之義。府君應之如響。旣而府君亦叩以所疑。朱舌強不能下。稽首謝曰。魏君年雖少。實吾師也。嘆息而去。所著有易學蠡測若干卷。又見先儒列卦畫爲方圓圖。乃以己意成三隅圖。

曲盡妙理。門人王德先演而傳之。嗚呼。自唐以來。用詩賦明經爲決科。沈潛之學。常不足勝夫浮華之習。往往爲進士之業者。誇多鬪靡。嗤彼經生爲不知務。夫窮經乃所以致用。豈其然哉。今府君以通百篇之書。第奉常教名州。出處大節。綽有可法。茲非明經之所致歟。予因徇潛之請。序次而銘之。用規沈溺文辭。而棄經弗講者。銘曰。

聖作訓。五典行。開蒙蔀。著光晶。盡稽之。爲法程。性由繕。欲莫撓。睦有士。尊遺經。宋物改。遞巖局。霞作幌。雲爲屏。繳弗緇。節逾貞。非窮研。行何成。世績紛。競華聲。文滅質。實慚名。苟視此。面發頰。柯阜山。八尺塋。序令德。鏤新銘。

元故婺州路儒學教授季公墓銘

濂待罪國史。兼職青坊。日趨大本堂。與晉府典儀劉彬。數相游衍。彬。處人也。其先公諱演。實濂之故人。彬以契家子之故。間來言曰。外舅季教授之死。已十三年。墓石且無文。其子遠居於浙河東垂。姓名無由自通。敢持福建行省員外郎王鏞狀。介彬以請。惟當今名公卿大夫。無不得先生文。以發幽潛者。願畀矜之。按狀。公諱仁壽。字山甫。其先處州龍泉人。後徙居州城中。宋殿中侍御史棠。以骨體著聞。公之十四世祖也。曾祖泰亨。祖文明。父德巽。母某氏。公之父。以學行知名。越郡。凡兩辟不就。公幼漸家學。長益自奮厲。文辭如水湧。而山嶽重。紀至元初。用薦者起教諭慈溪。公爲徵逋租。新禮殿。建教諭廳事。部使者暢公某。行縣。他校官獲罪者相望。唯深器公。命往黃岩。鏞祭器之未完者。慈溪先正。寶章開學士黃公震。著書滿家。

公以狀上府。祠之學官。設課試法。以待後進。鼓舞激勵。唯恐有懈怠。竟有二士。獲江澗文解。人多之。秩滿遷處之松陽。其訓迪學者。一如慈溪。郡守徐君思讓。請公定鄉飲酒禮。公爲斟酌古今。筆爲儀注。徐悅。銳意欲行之。會徐卒。乃罷。陸饒之雙溪書院山長。以親年高辭。時丁元季。州郡多釋縣。藩方大臣。多有辟公起者。公力辭。龍泉湯京。好義之士也。捐田爲義莊。以惠其族。復開義塾。以教鄉子弟。以公爲一郡之望。延爲師。公悉心開道。莘莘如不及。會近臣李國鳳。經略江南。承制得專除拜。憫公位不滿德。特轉教授婺州。公嘆曰。仕所以行志也。志不行。曷若肥遯終身乎。遂放情肆志於雲林煙壑間。儻然如在物外。遂自號爲春谷處士云。初。公承家學。治易賢春秋。通其奧義。及上饒鄭先生原善。來爲郡錄事。公獲從之游。受書詩二家。先生名進士。故公之所造益精。由是四方從之者衆。號爲四經師。後多有知名者。其爲文詞。不事剽竊。而自成一。家。商國忠宣公余闕。過括索而觀之。其稱道不置。公爲學至勤。羣書無不歷覽。覽輒手節鈔之。爲春谷讀書記二百卷。其所著者。易書詩春秋。皆衍義。共若干卷。四書質疑若干卷。策樞通覽若干卷。詩林鉤玄若干卷。弓冶錄三十卷。文集若干卷。兵燹之餘。皆鮮有存者。不幸壽六十有一。以至正壬寅八月某甲子卒。其年九月辛酉。葬于龍泉縣安仁里麻丘灣。先配吳氏。生子二。宗起。宗憲。皆善繼其學。宗憲一名觀。將仕佐郎。漢中府褒城縣主簿。女二。長適彬。今遷承事郎。工部主事。卽速銘者。次適湯。新繼室潘氏。廣東道肅政廉訪司照磨。弼孫女也。生男一。宗義。女一。適湯柱。孫男三。同。紹。慶。子。推人處霄。壤間。有異蚩蚩之徒。以其自立也。所以自立者。非假功名以自見乎。或命與時違。齟齬而不能進。則托辭章。以寫其

所志庶幾古者立言之義。二者之外。則無所容力矣。以公之德之才。於功名乎何有。浮沈庠序中。迨沾一命。亦且歸然老矣。期表著書。惟在乎有言。六丁雷電。又從而取去之。其果何爲耶。如公者。蓋可悲也。雖然。治國有道。政與教爾。而教爲尤重。公雖不及爲政。而位爲人師。橫經講道。露丐後學爲多。其視懷銀黃。垂三組。而無益於人者。賢不肖果何如也。尙奚悲。銘曰。

陰陽雜糅兮。莫測端倪。人生值之兮。萬有不齊。有美君子兮。厥德孔嘉。祿位之卑兮。蔑以振其華。摛文自耀兮。出史入經。鬼神靈異兮。雷霆震驚。忽斥豪英兮。囿于醇熙。敷繹六藝兮。蔚爲人師。日坐皐比兮。唯先民是程。誨言淪浹兮。學維烝烝。師道旣立兮。善人斯多。剗刮染汙兮。丕胃至和。視彼滔滔兮。三組銀黃。徒曠厥官兮。是謂自戕。道隱世澆兮。懷古而悼今。哲人不可作兮。靈然而傷心。麻丘之灣兮。水環而岫張。太史勒銘兮。用播遺芳。

元故處州路青田縣儒學教諭黃府君墓誌銘

府君諱植。字國輔。其先虞姓。居越之上虞。宋建炎間。遠祖從福遷台。臨海之靖安鄉。至汝楫者。避難而以黃易虞。今遂爲黃氏。曾祖玠。宋宗學諭。積而能散。人稱曰佛子。祖居正。朝奉郎。父遷。母陶氏。府君十歲而孤。母夫人授以書詩。輒能省解大意。嚴自脩飭。不與羣兒出遊。家人皆異之。其兄曰樟。曰彬。以文學名。皆爲郡教授。尤屬愛甚。日夕相摩切浸灌。稍長。遂刻意爲學。名聞參出二兄間。甫十七。薦紳美其才。補上蔡書院直學。旣而郡守趙君鳳儀。欲辟爲掾。力辭之。後調青田縣儒學教諭。迄不就。年五十有二。無疾而卒。

府君爲學以六經爲本。以躬行爲務。以文藝爲末。始以此自爲。亦以此淑諸人。問之無不知。考其終身。無所愧於其言。其居家。延師。闢齋。庶教族人子弟之貧者。歲饑。則爲糜道傍。以食餓夫。鄉人爭曲直不能決。相率叩門以質。府君曰。甲理是。乙非。各悅而退。用是學者稱之爲鄉先生。細民稱之爲善人。娶杜氏。於夫於子皆盡道。年七十有二而卒。而六子勳。烈。默。杰。熙。熄。皆士行。六女適陳。又琥。葉。起。予。陳學詩。戴夢祥。周應顯。鮑可殷。又皆不愧於士族。於是知府君之善教也。及府君歿三十餘年。而孫男之多至九人。曰。垣。陸。童。厓。廩。豎。牲。垵。孫女五人。其二亦適胡宗銓。吳貫。而曾孫男又五人。曰。鏡。鑣。鑿。口。鑿。矣。於此又知府君之德厚。而後人之盛未已也。嗚呼。爲善者固不慕乎名。則人何所勸乎。故徇勸之請。敘而銘之。府君卒在元至正甲申五月丙申。葬在庚寅十二月甲申。杜氏之卒在丙午九月丁亥。其合葬以國朝洪武戊申三月某甲子。墓在閩岸之青鼎山云。銘曰。

學弗於文。維本之敦。行弗隨于人。維天之循。維其循乎天。叶有熾子孫。人勿求乎君。盍求諸身。

故龍泉縣學教諭湯府君墓誌銘有序

處之龍泉。有簪纓族。曰湯氏。自宋婺國公載八傳。至望。望生鏞。鏞生濱。濱生龍泉縣學教諭府君諱楷。字文則。三世皆以尙義著稱。元至正間。嘗下令旌爲義門。至府君益厲志。惇行。石抹忠愍公宜孫。御史中丞誠意伯劉公基。御史中丞章公溢。王府參軍胡公深。皆愛敬之。而忠愍公相知尤深。力薦起爲教官。免強就職。未幾輒辭。年五十三。以至正乙巳四月十一日卒。其家。年八月二十日。葬于麗水縣雲和鄉德廣里。

梓坊原有詩文若干卷。思誠錄一卷。藏于家。府君配吳氏。無子。季弟梅次子燧來爲後。燧生二子。綰、績。女一。適王德厚。孫女一。未行。燧嘗以濂銘其諸祖之墓。復奉同郡季宗起狀。不遠千里來徵銘。嗚呼。府君位卑。不得上其行史官。苟墓門之文抑而不與。尙何以爲扶世導民計哉。銘曰。

惟湯受姓。其出自商。以證爲姓。源鴻流長。譜逸宗壇。莫究厥詳。徙于括者。至宋寔昌。簪纓蟬聯。義聞赫奕。府君承之。祖武是式。粵自弱齡。嗜學尤棘。裏糧從師。不憚遠役。下而百子上。而羣經心涵。口詠必啄。其精寒燈在壁。夜分猶青。無末不詠。無本不凝。發爲詞章。奔放莫禦。五色交絢。不可正視。亦持貢函。應書而起。議苟不合。退修於己。吾有天爵。不假外求。秉心制行。期履大猷。自我先人。唯義之述。闢塾建莊。羣族之繇。養或有愆。益田以百。居或亂味。加以塗飾。明揭教條。皦如星日。以究以釋。以衍其澤。往聘碩師。用緝教功。曰優曰柔。式昭式融。春秋釋菜。執禮愈恭。疇意漓俗。獲還瀉風。豈卹吾宗。不達州里。仍歲大侵。我心如燬。我糶我粟。爾哺爾匕。繼以簠牟。惠及終始。元季兵興。海內釋騷。青田羣兇。是讎是哱。彼暴悍者。虎擲鼠跳。欲起應之。屠劉恣驕。君登于庭。曉以順逆。不見禍首。身膏矛戟。妻孥蒙戮。鬼不血食。爾盍自固。以禦寇賊。衆皆羅拜。願如君言。我刀我淬。我柵我完。我謀旣叶。孰敢來干。威聲大振。寇胆遂寒。唯忠愍公。統馭三郡。麗陽遺孽。負逆奸命。公欲刈之。以揚大政。怒如雷霆。疇敢與競。君踞轅門。慷慨陳辭。脅從罔治。渠魁當誅。蚩蚩小氓。惡得盡夷。公因聞納。降者釋之。里之三農。越河種藝。載相與牛。資舟以渡。官有海禁。吏因羈馭。隨步如千。望絕莫赴。君聞靈然。是何忍爲。卽日戒行。囊有長書。徑詣大官。歷斥其非。卒復其舊。民憂以摅。

君性至純。兼以沈毅。惡欲如讐。嗜義如利。服不及華。食無重味。履冰臨淵。惟恐失墜。事親從兄。允爲世模。柔容愉顏。張拱而趨。行孚于家。德則有餘。大衣長裾。見者翼如。歲時烝嘗。尤極愼愼。出就齋室。心存冲漠。洋洋如臨。式是昭格。鄉鄰化之。孝思油若。撫事接物。盎然春熙。揚淑隱隱。欲道之歸。里有斂爭。爰質爰稽。苟聞話言。如聽父師。其形之端。由表之正。况能周急。以蘇羸病。友有寄金。沒于兵穽。家惟一牛。償之弗靳。君德之施。漸漬益真。人爲弗滋。智熄糾紛。及聞其死。孰不沾巾。僉謂斯世。不復斯人。嗚呼哀哉。成周之世。畫區而畀。量夫授地。孰富孰貧。孰有餘利。盎然太和。何有窮匱。阡陌既開。革公爲私。大將連圻。微無卓錫。民散無繫。民宜是綏。仁鄙壽夭。乃政之基。奈何棄諸。藐若蛙龜。不有君子。誰復斯憫。聳善扶義。其利維永。誠愨之心。實重耿耿。菽菹縱橫。申椒之馨。鷓鴣畫呼。長離咷鳴。誰不改容。誰不愷情。歿而不旌。爲善者懲。彼有穹爵。吾棄弗顧。此惟布章。發吾豔慕。大書莖間。表厥中素。此吾直筆。初非諛墓。

元故慶元路經歷劉君墓銘

予侍講禁林。有少年生。持銅刻名印來謁曰。禮。劉氏子也。間承檄行江西。過故人家。得范金圖記一。六面皆有視之。則先生名與字具焉。問所由來。欲以奉先生者。死已久矣。禮竊恐棄置。謹買以獻。予辭謝。不欲煩人生拜。不肯起。予旣勉受之。生又拜且泣曰。禮願有請也。幸先生無拒禮。賴人也。生十年而先子亡。先子之亡。今二十有一年。禮孤也。早。先子之微行。不能悉知矣。所僅知者。倘又不屬立言君子以傳。則禮何以爲子。禮之先子。少有志事功。特以遘時艱難。屈於小官。竟不克施以卒。旣不克施矣。而復不得垂姓名。

於久遠。是生死不遇也。禮竊懼焉。願先生惠賜之銘。君已。又泣且拜。予起立答。領其尋行之辭。會考禮事。嚴久未暇述。生請如是者四。益勤不怠。今年。生除龍江宣課司副。又來速曰。非先生銘。禮不能一日忘而去也。遂序而銘之。君諱明德。字作霖。幼有氣尚。若欲有爲者。不肯躡庸人後。爲舉子業。專攻春秋經。晝夜磨督。不暫輟。傳注數十萬言。歷歷記憶。倒舉可成誦。期以此致功名。嘗曰。使我爲某職。如此。爲某職。當如彼。若素爲之者。至正庚寅。會江西大比。君曰。此非吾時邪。卽束書往赴之。時有司以程式去取。君言時務。落落動人。見者咸縮手出舌。然卒以此不中。君感憤歸。閉戶讀書。益奮勵不衰。攻諸體詩。精敏。數出新語。又善字畫。飄逸有風韻。由是聞縉紳間。廣東宣慰使興都刺監君名。薦爲雷州路儒學教授。君爲教官。立規條戒訓。率先諸生。講說自身及家之道。殷勤懇飭。聽者忘倦。海南之言有師德者。必曰劉先生。劉先生云。君旣善爲職。聲問日著。由雷州超授慶元路總管府經歷。綜挈名實。事集無滯。上下信服之。未幾。東境盜起。勢搖郡邑。君卽解印歸臥於家。脩竹樹田園。爲終老計。至正乙未五月。以疾卒。上距生年延祐丁巳。壽三十九。君之先。真定棄城人。祖浦。隱不仕。父巨。瑞州路總管府推官。遂居贛之贛縣。君娶廖氏。生子男子一人。禮。女二人。禮卽請銘者。能自奮。繼其家聲。旣葬君於贛江之水東原。今以才俊仕。君子謂其能子。銘曰。

志之隆。祿則不豐。才之良。壽或不長。果孰爲之。嗣人其昌。

故贈承事郎大府斷事官尹府君墓誌銘

國朝之制。凡入官者。自七品而至於第一。咸得推恩及其先人。官有崇卑。故其恩有隆殺焉。今刑部尙書尹性。其爲大都督府斷事官時。嘗請于朝。德贈其父府君如某官。階承事郎。母章氏。封宜人。性既虔奉命書。橫置惟謹。復用黃綾。贍爲副墨。具冠服佩綬如法。焚燎於府君墓下。性竊自念。皇靈如天。覆燾九圍。惠澤沛滂。兼被存歿。苟不圖文。勒諸琬琰。何以上昭帝力。下示後昆。乃屬其友鄭君思先。采掇羣行成狀。而徵濂爲之銘。濂按狀。府君諱元良。字子貞。會稽人也。世爲簪纓巨族。曾祖某。祖嗣宗。父恂。元温州路平盈庫副使。妣李氏。府君溫而克毅。卓識異於人。事二親。鞠躬盡瘁。惟恐逆其志。副使君歿于溫。府君不憚二千里之遠。涉濤江而往。艱難險阻。莫不備嘗。雙足爲之皴裂。扶櫬而歸。卜宅兆藏焉。當是時。二弟某。某。尙幼。府君聘致名講師。訓之以經。朝夕督策之。恩意備至。及長。各爲授室。已而乞析爨。甚力。府君止之曰。兄弟同一氣而生。猶手足之爲一體。其可分之乎。弗聽。府君指田之饒瘠者曰。此予之所愛也。指器之苦窳者曰。此予之所嘗用也。盍歸我。腴土嘉具。悉讓與之。聞井以爲難能。先是。府君之從父兄。旣耄且貧。仰食於府君家。二妹亦未有所適。至是。各異居。咸俚俚無所之。幾欲墮淚。性甫七歲。告府君以其故。且曰。非吾父是依。將疇從邪。府君喜曰。爾真吾兒也。正符吾志。遂獨養耄者終身。飭奩貲以嫁其妹。性後入官。尤以廉勤戒之。其言踰千百云。府君雖老。嗜學不厭。六經羣史。罔不研究之。每晨興。挾冊映籀光而讀。稍倦。輒拄頰看雲。出入巖岫間。巖然如在塵外。有嘉賓至。令庖丁治酒。殺相與劇飲。酣觴淋漓。燭不見跋不止也。故爲之媵連者。則曰。尹公其吉人哉。爲鄉鄰者。則曰。尹公信端士也。大抵皆得其驩心云。府君壽七十又

一以洪武己酉正月甲寅卒于家。其年九月丙申葬會稽縣廣陵鄉黃龍山之原。禮也。配卽宜人。男三人。長卽性。近擢今官階通議大夫。次權。次初。女二人。適同郡司馬升金傑。孫男四人。經。質。敏。學。經早卒。女一人。予早聞姓名。知其制行之卓。其居官也。如冰清玉潔。誘以黃金滿囊。弗顧也。今幸與之同朝。又知其精於法家之學。操心平恕。不使有冤民。非府君家教之篤。其能致然耶。若府君者。其可銘已。性今位居六卿之中。於法得加贈。他日榮光下燭。泉壤重榮。又當濡毫爲性紀之。銘曰。

越有君子。篤行于家。涖事必誠。質而不華。事親如天。跬步不忘。洞洞屬屬。唯敬是將。親歿于溫。蒲伏往迎。扶襯夜哭。水爲失聲。鞠育諸季。竭其恩勤。扶翼覆護。如親之存。耄者養之。弱者嫁之。營之經之。以遂我私。春秋旣高。謝絕塵氛。拄頰凝視。山川出雲。賓至如歸。劇飲而譖。夜深月落。聲出戶間。積善之餘。無鬱不舒。有子升朝。朱衣金魚。皇明如天。郵典攸崇。澤漏九泉。予以勸忠。廣陵之鄉。嘉樹壽蒼。太史勒銘。永世其藏。

元故樞巢處士儲君墓銘

宜興有處士儲君。諱能謙。字有大。系出唐監察御史光義。曾祖進之。祖時昇。宋承信郎。監鎮江稅。父文辟。咸淳庚午鄉貢進士。處士在元不仕。名其室爲樞巢。語其子曰。余生無用于世。死必樹吾墓以樞。所以志也。至正四年六月某日。年七十有四而終。處士生宋季。少有能詩名。尤愛黃文節公詩。天未明。擁衾暗誦百餘篇。聲抑揚可聽。其父進士君喜。謂必以文鳴。至長。能力學。闕衍探博。靡所不窺。然其於詩最工也。事父孝謹。父沒。居喪哀。四方士送葬者數千人。直路之地百餘步。草萊盡赭。斥浮屠法不用。閭里化之。御子

孫嚴而能教。庭序之間。不聞譁笑聲。諸生從之游。越月踰旬。輒異於人氣和色莊。望之者畏。親之者悅。人與處者。脫然皆化。交友有過。正容引大義。折之不顧其喜怒。故所友多善人。力排異端。作私論二篇。楮錢辯一篇。文曰雜著者一十卷。詩曰學步邯鄲集者十五卷。樗集集者一卷。處士娶蔣氏。宋潯州守仰祖支孫。先七月卒。以處士卒之歲。七月某日。合葬藏林里淡竹原。先塋之側。子男四人。皆通春秋學。惟賢。元統乙亥。取江浙第四名文解。至正丁亥。復選爲第一。上禮部不利。用例任安定書院山長。惟志。廉州路儒學正。惟仁。常州路豐積庫副使。惟德。國朝自常州府教授擢國子助教。階將仕佐郎。女三人。適同郡蔣立本。趙濟。潘杲。孫男十三人。抑、擻、播、揖、撫、拓、揀、搯、授、揆、振、孫女五人。長適蔣遵。餘未行。初。處士之葬。諸子乞銘于翰林學士危君素。兵亂亡其序。惟銘辭口熟以存。於是危君卒已十有餘年。惟德與余同朝。謂余獲友危君。請補之。乃序而繫以危君之銘。銘曰。

元故徵士周君墓誌銘

君姓周氏。諱自立。字本中。裔出汝南。初遷黃之永安。唐季。有爲袁州刺史者。因家宜春。繼徙廬陵。子孫衆多。又自廬陵分居新喻。天柱山之陽。曾大父鼎臣。宋太學某齋生。大父宗岳。以文學名。江文忠公極禮下之。後用薦者授迪功郎。監廣西經略安撫司庫。辭不赴。門人私謚文範先生。父雲龍。元瑞州路儒學錄。有文集若干卷。傳學者。君自以奕葉爲儒。繼承不易。莘莘問學。雖寒之折膠。暑之鑠金。亦不敢輒廢。下筆爲

文翩翩然成五采矣。父既蚤歿，獨奉母某氏居家，苦貧，備書以奉甘旨。從兄自強，爲廣西宣慰司都事，以書來徵會，欲白上官薦爲廉州文學掾。君笑曰：「吾母老矣，焉用是爲哉？」卽別歸。下帷講授，相從者多以文宅兆而葬。復訓育子女者四，皆至成人。初，君配歐陽氏，有廢疾，手足不能用。君遇之如賓，無一言相加遺。凡十有餘年，乃終。君時正當青年，人絕以爲難。君性溫靜，恂恂若不能言者。至於辨是非利害，恆義形於色，毫髮不少恕。故元夫鉅儒，一見皆器重，恨相見之晚。嘗再踐場屋不利，遂棄去。不幸以至正某年月日卒。享年五十又六。以某年月日窆于某鄉先塋之次。其地曰隆坑云。先室卽歐陽氏，繼室何氏，皆先卒。子一人，孟東。君卒時年甫十四，亦思繼業如君。方及壯，以賢良徵，由翰林國史院編修官遷應天府上元縣主簿。女一人，適同邑劉有大孫二人。鈺能，子侍講蔡林，實與孟東同僚。見孟東精勤而有學，心甚敬之。孟東奉前鄉貢進士梁寅狀，拜而請銘，且繼之以泣。予家食時，自來爲義烏尹，頗與自強交，視孟東，契家子姓也。義不得辭，銘曰：

孝友行于家，既質且葩。又何必金章整綬，而始爲華。我銘斯墳，言則非夸。

故三槐隱士王府君墓誌銘

予以總脩元史，被召來京，與浙江都使者劉君承直會。劉君曰：「承直嘗受經於太和王先生，先生之歿，今年七年矣，而埋銘未有所刻。其子佑將奉狀以請，幸爲文之。」旣而佑復申劉君之言，涕泗而再拜。予旣嘗拜

與之成禮。遂按狀而評。隴成章。其辭曰。君諱以道。字則臣。姓王氏。系出周司徒敬宗。傳於秦武成侯離。生二子。元威。元遷。琅琊威徙太原。二族甚盛。晉丞相導出琅琊之裔。南渡時。家于江左。至趙宋時。有諱崇文者。來知吉州。其從子殿中侍御史贊。實從之。復遷居吉之太和。太和之有王氏。自贊始。殿中君之後。名圭。開禧三年。鄉貢進士。君之高祖也。進士君生叔可。肄業成均。以辭章稱。叔可生本初。本初生性夫。皆爲名儒。則君之曾祖。祖父也。妣劉氏。宋知潭州事天定之孫女。君資稟絕異。自幼學詞賦。組織華縟。見者翕然譽之。已而棄去。曰。此非所以爲學也。欲求聖賢之道。其在遺經乎。於是潛心窮研。晝夜弗之倦。時從祖父遂初自國學上舍生還第。所交多宋季名士。日集其門。相與談前朝文獻。纏纏如貫珠。君從傍聽之。心領神會。至忘寢食。其學遂大進。大德末。君出游中州。主張伯剛家。仁宗出居於懷。李秦公孟侍焉。伯剛往言於秦公。以君爲薦。君獻詩一章。仁宗覽之大悅。君遂極論天下事。曾未幾何。武宗卽位。立仁宗爲皇太子。伯剛邀君同至燕都。君毅然辭之。伯剛寵幸盛于一時。及仁宗踐祚。遂累官至汴梁路總管。復趣君曰。上頗憶君。君若往。爵祿可致也。君辭之如前。君嗜佳山水。間一出游。輒留連不忍去。一日。至洞庭之君山。遇異人。長鬣碧瞳。如古仙人。授以龍虎金丹。經君受而行之。氣志益冲。自號爲三槐隱士。乃於所居種竹鑿池。池上橫以石牀。角巾鶴氅。日息其上。子姓環侍之。談吐餘音。出於水光篔簹影中。其隱趣蓋備備然。時或賦詩以爲樂。韻度間曠。一如其人云。君性至孝。父母皆高年。君率羣從奉觴稱壽。唯恐稍違。其驩暨歿。哀號戀慕。幾欲無生。且悼於友義。族兄弟姊妹未婚姻者。畢之。伯叔之未葬者。藏之。君子多稱焉。至正

末。天下大亂。太和禍尤慘。殺戮到鷄犬。羣寇聞府君名。指君廬相戒曰。此王隱君家也。慎勿毀之。至今獲存。君所著書。有詩集若干卷。丹經新注若干卷。其生。以至元庚寅十月一日卒。以至正甲辰六月二十二日。壽七十有五。以洪武戊申六月十一日。葬于縣之千秋鄉新山大嶺之原。禮也。君娶彭氏。能盡婦道。前君一年卒。子二人。沂。前鄉貢進士。佑。從州縣察舉。試校官京師。上以其才可用。拜監察御史。轉遷廣東提刑按察司事。卽來速銘者。女二人。彭道長。劉以和。其壻也。孫男一人。泰。孫女二人。尙幼。嗚呼。世之有功業者。易於言。而潛德積於躬。而未及試者。則雖竭其形容。或不足以盡之。蓋有跡者可窺。而無跡者難知也。以君言之。際可仕之機。而超然絕去。托於神仙家言。以自溷。則輶於內者爲何如。使出而用世。其勞烈未必不豐碩而焜煌也。抑予聞君之弟。以莊博學而善文。君與其教諸子。以詩書植家。聲光燁然。起搢紳間。是亦爲政之大者矣。奚以必仕爲哉。銘以昭之。聊以白君之志云爾。銘曰。

孰不知舉之。而我則已之。孰不欲彰之。而我則藏之。有崔者山。我心樂之。我書我詩。我子教之。若人之行。君子以之。惟其有之。是以似之。

宋學士全集補遺卷六

故晦巖居士王君墓誌銘

王之受氏凡四。白姬曰媯。曰子曰盧。而姬姓之分復有二。一出畢萬。一出周司徒宗恭。宗恭之族。琅琊太原也。萬之族。則京兆河間也。別有王叔氏。王子氏。王孫氏。雖皆本於姬。又所以別於二族也。其在琅琊者。散居江南。今浙河東西多宗焉。睦之桐廬。有王氏諱璵。字君玉。曾祖宗善。祖叔祥。俱隱遯弗顯。父希曾。爲文儒。君性至孝。母袁氏。疽發於頸。君憂形于色。日烹藥以進。殫諸方。弗之驗。君則泣禱于庭。辭甚凄苦。已而疽決。膿若絮。鈎連不可拔。君吮出之。母輒瘳。同姓有尙俠者。藉權貴人爲意氣。效五陵少年所爲。勢煥煥動人。人豔之。反讓君爲迂。君曰。吾性慤。不能隨俗浮沈。君尤我固宜。俄庚午歲。儉道殪相望。孰不遏糴以微善價。君能出粟賑之。歲丙子。視庚午儉尤甚。君復賑粟如初。或曰。王君非迂也。其樂善人哉。或曰。王君之知。非小夫所可測也。君皆笑不答。所居直香爐峯。濯濯生翠。若屏然。君築重構其下。時列俎豆。集名勝士玩之。嵐光浮動。尊俎間。從容嘯咏。恍不知九衢有游塵也。君積而能散。州里有貸泉布者。久不庚。多取質劑焚去。然質直無僞。民有競者。直於君。君察其情。辭曰。爾過矣。曰。非爾之罪也。各心服而還。不翅訟于賢有司。或強君出仕。君謝曰。幸有舊田廬。食與衣亦僅給。祿非所干也。遂以晦巖居士自號。云年六十。六。以至正丙戌二月己巳卒于家。以庚寅十二月丁酉葬縣之金魚岡。配袁氏。子男子五人。和。義。禮。僑。舉。

皆克繼先志。舉尤知嗜學。當元之季。復能合義旅。以捍鄉井。人德之。子女子一人。適袁采。孫男五人。圭、楨、權、衡。官曾孫男若干人。君卒後。舉奉尙寶丞。魏君潛狀來求銘。魏君謂漢末王彥方。少有行義。鄉里有爭訟者。將質之。或至塗而返。或望廬而還。君之行頗近之。魏君同里人。其言當可信。況君孝於親。仁於鄉。其事有足稱者。苟不使其名昭著。則何以爲行善之勸哉。銘曰。

先親其親。而後仁乎民。其志之殷。吁嗟乎若人。孰不簪紳。子胡爲隱淪。豈命之屯。吁嗟乎若人。故鄱陽劉府君墓誌銘

君諱謙。字友諒。姓劉氏。其先出自彭城。唐末有名汾者。仕至鎮南軍節度使。生十四子。一子曰漢。吞始徙鄱陽。圖譜或至君不知其幾世。君善積居之術。以貨雄於鄉。父母歿。廬墓終喪。事三兄謹慎。三兄或酗酒破產。君屢贖歸之。因自懲以全其家。他族昆弟。析財致訟。久不解。君召而尤之。皆頓首免冠謝。相讓爲善行。已而割田來上。曰。微公我等幾爲吏所魚肉。且失同乳心。敢奉此爲公壽。君笑而麾之。自是鄉鄰有鬪者。赴愬君。得片言。則拜舞去。甚者能自愧。搖手相戒。勿使劉君知。至正末。兵亂。且大饑。惡少年烏合爲盜。椎埋剽掠。無不爲。夜有執火薄君廬者。君倉忙率妻孥遁。泉布悉爲所攘。豪傑德君者。部勒壯士。捕少年屍之。懸首于門。君歸見之。擲于郊。縱其家收瘞。盜聞。置所攘戶外而去。他日。盜益熾。巨室盡燬。獨君家屹然。風日中。君時避地萬斛山。爲盜所執。將榜以求金。忽一人躍出曰。此翁嘗恩我。不可害。不可害。君賴以免。性喜讀書。積至數千卷。爲文辭。貴理勝。不尙浮縟。人稱之。高祖某。宋某官。曾祖某。某官。祖某。某官。父某。

妣程氏配室李氏前君一年卒子男子一德裕。女子二蒙古學教授陸士奇及胡璉其壻也。孫男三人曰仔肩曰鼎和曰吉仔肩以文行名君生於至元乙酉十二月二十九日歿於至正癸巳十一月二十五日壽六十有九卜以是年十二月某日葬于堂鄔山原距君所居僅二里君既葬仔肩持張祠部丁所次狀求埋銘金華山中余以病弗及爲去年春蒙恩召入禁林與仔肩會京師仔肩復申前請爲尤切禮宜銘銘曰

行孚於家而施及於鄉如彼泉流肇於濫觴其始則微其終則彰此爲有德之士之藏雖亡弗亡

故高府君城銘

高府君歿於建業時建業新附人情未安歿之明日其家僮卽具棺斂權瘞西門之外郊瘞已間關往報府君季子暉暉方從軍丹陽將達僮卒于道暉因弗及聞一旦有告暉者曰爾父歿已久矣且卽白軍帥往求之則當時執役之人皆征戍遠方無一人在者暉彷徨西郊外但見白烟涼草叢塚疊疊不知孰爲其親體魄之藏號慟幾絕者數四自念無以慰罔極之恩乃命畫師識府君者追貌其象裝潢爲轆軸事之如生雖若可以自解然終未足以盡其誠於是請國子錄張君丁件繫府君之行以成書謁予豫爲之銘他日招魂旋其鄉欲具衣冠葬之且勒銘貞石以示子孫於無窮焉余不敢辭府君諱薰字伯舉姓高氏濟南棗州人曾大父溫金經略副使大父玉元至元中從大將平江南遂隸名於平江十字翼萬戶府軍籍久之以功補其府鎮撫父珪隱遯不仕妣韓氏府君姓疏朗讀書傳頗通大義輒棄去喜騎射遇駭

馬必傾貨市之。挾弓矢，跨行如飛。既而中正鵠不失毫髮。觀者嘖嘖嗟賞。以爲有將家子之風。然居家守於禮度，不敢稍自遠越。其事母夫人，飲食必親調。衣衾則視時燠寒而進退之。同里閭而居者，多豪俠之子。刳腴擊鮮，日夜痛飲，以示侈靡。府君過而弗睨，唯見餓夫單人，輒解袍衣之，輟膳啖之。唯恐有不及。癸酉歲，儉大疫，且四起，道殣相望。府君時買櫓積藏之。府君嘗以泉布貸諸人，人久不能償。府君曰：彼非負我者，特爲貧所迫故爾。取其約劑焚之。其於物有恩類如此。至正中，江淪行中書察知府君才行，命隨蕭將軍捕寇海上。府君屢建奇略，將軍不能聽。府君噤不發一辭，已而寇不可制，方悟不能用府君也。府君寡言笑，與人交，不爲翕翕熱，久而益親。人自不忍厭去。嘗築室曰進齋，監察御史孟公昉爲之記。人因以進齋號府君云。府君嘗教其子曰：我家近於海濱，以弓馬植門戶。田桑供衣食，雖不多讀書，家法素謹，至今弗敢墜。爾曹益務力善，毋爲祖考羞。使他人稱汝爲善士。我死目亦瞑。不然，雖日宰百羊，馬饗吾，吾將不食而吐之矣。世以爲名言。府君娶懷孟馬氏，生三子：長某，次桂榮，歿于兵。次卽暉，國子助教。府君享年六十，卒於某年月日，葬於某年月日。墓在某縣某鄉某山之原。嗚呼！戎馬擾攘之際，人得令終者鮮矣。縱得令終，卽其棺斂而藏之者尤鮮矣。縱得斂且藏，得有賢子孫追慕而不忘者，鮮之又鮮矣。縱有子孫日道慕之，其有狀其善行，求文以刻諸墓門者，則又絕無而僅有者也。府君之死，固爲不幸，今有令子若暉者，汲汲圖文，以托府君於不朽。府君似可以無憾矣。銘曰：

其名則武，其行則儒。其內則嚴，其外則舒。其超然拔萃者歟，其確然有守者歟。

故熊府君墓誌銘

熊以王父字爲氏。蓋本於楚鬻熊之後。至曾孫繹。成王封於丹陽。丹陽今之江陵枝江也。其後徙於南昌。若太常卿遠。臨江尉曜。戶部郎中執易。皆南昌人。執易爲右補闕。與陽城同上疏。極論裴延齡之姦。君子多之。其裔孫某。復徙居於臨川。某生釋。好施與。貧病無告者賴焉。性嗜浮屠氏說。嘗捐田七千三百畝。畀其徒。其徒以居士號之。三傳至宋迪。功郎公琦。迪功生待問。亦迪功郎。待問生鄉貢進士紹祖。進士實生。府君諱本。字萬卿。一字萬初。幼穎悟。經史一覽輒成誦。父子自爲師友。時家已窶。無藏書可觀。每假於薦紳家。懸燈夜讀。至夜分。弗自休。年十五入鄉校。習科目之文。私試數占前列。十八卽下帷講授。郡之俊乂多從之。一時名士如澹軒孫公轍。天脩熊公朋來。麟洲龍公仁夫。文安揭公侯斯。皆交相推譽。或折輩行爲忘年交。翰林學士承旨張公燾。方爲郡學錄。尤與府君意氣相傾。會輒流連竟日。唯恐其別去。已而以尙書貢于鄉。再不利。乃歎曰。場屋失得。是有命焉。我不敢必也。苟窮經以飭諸躬。其有不在我者乎。吳文正公澄。倡道於崇仁山中。南北學者翕然景附。府君遂負笈徒步往從。摘經中所疑七十二條。反覆詰難。吳公一一答之。中其肯綮。府君爲之喜而不寐。間論古文尙書。麀齋數千言。援據精切。辭意超卓。吳公器之。謂非時輩所能及。宋季時。須溪劉先生辰翁。以文辭名一代。人爭慕效。瀾倒波隨。府君獨疑其怪僻。非文章大家。因究極原委。著之簡編。實于虞文靖公集。虞公以與己意脗合。亦器之。如吳公。且以涵養問辨爲學文之源。是勗。府君自此以講學摛文爲務。視世之榮利。如烟霞變滅。絕不足以涸之。向之俊乂來學。

者。至是益衆。府君舉聖賢之大指。諄諄誨誘。咸卓然有所立。雖其後更名他師。而篤實有實行者。則府君之所啓也。其遇子弟。嚴威儼恪。終月不見其有笑容。夜則危坐。令其誦書。雞初號。則趣之起。風雨不少廢。府君之伯仲凡三。析財別爨已久。及父母歿。喪祭之費。頗鉅。府君悉力自任。不以煩之。女弟一人。未有所歸。亦擇名族而資遣之。然天性仁厚。或以虛僞相加。壹接之以誠。而人自不忍欺。至於處義利之間。絲不苟也。生平不屑理家政。優游肥遯。不知戶外有山川之險。舟車之勞。每夕命觴徐酌。哦古詩數章。陶然自適。如鴻飛冥冥。了無繫累。會四方兵亂。長子鼎。爲校官廬陵。音問不通。府君憂之。往往形諸咏歌。一日。徧過故人門。薄莫言還。復張燈而飲。飲微醺。以鼎不在左右。悵然就寢。是夜大雷電。以風鼓撼樓牖。作伊軋聲。府君披衣而起。命蒼頭奴負階。親升而闔之。既降。忽呼曰。予足輒矣。奴以肩翼之至地。府君右手倚肩。左據階之齒而終。時至正癸巳歲二月四日也。享年六十有六。娶黎氏。鄉貢進士天桂之孫女。能齊家。內外整飭。府君得脩業而無費者。黎氏力也。後十有一年卒。生三男子。長卽鼎。入國朝。累官山東道提刑。按察副使。今遷中奉大夫。晉王相府王傅。次曰渙。將仕佐郎。開封府長津縣主簿。季曰晉。女二。一適趙激。一適龐舉。早卒。孫男四。曰綿。曰起。曰繩。曰昂。孫女一。未行。府君歿後三年。丙申之歲七月六日。始卜葬於金溪縣苦竹鄉之富塘原。其所著書。有讀書記二十五卷。經問四十卷。讀史衍義若干卷。舊雨集五十卷。虞公爲之序。謂其雜著本理而敷暢。典雅而不阿。人以爲實錄。外有朝野詩集五百餘卷。吳山錄三十卷。仁壽錄一百卷。吳山卽記。吳門問辨之所得者。仁壽。則手錄虞公之文也。今年春。予與鼎會京師。乃奉祠。

部主事張君孟兼所造事狀。徵予銘。夫自吳公纘承伊洛之緒。於將墜之餘。完經翼傳。抉祕闡幽。所以化導其徒者。多成德達材。出而用世。固顯融于時。其有隱于州里。橫經陳義。使人厲士君子之行者。亦往往有焉。若府君者是已。嗚呼。師道立則善人多。濂於吳公徵之銘曰。

咸口之里。紫氣蜿蜒。篤生偉人。大道日降。一綫之傳。凜乎將墮。勇撤其蔽。所觀者全。行知尊聞。罔間南北。疊跡重肩。從者如雲。君鼓其篋。摳衣而前。無疑弗馴。雅與難測。孰鉤其玄。百篇之文。矧於羣經。孔疏鄭箋。曷其繽紛。蒙葑斯揭。日星乃懸。有光燉燉。屏斥詭誕。以絕蔓延。以表孤存。化行里州。太和莘綿。郁其成紋。其養也定。乘化而旋。奚啻詘信。有子而令。珪組蟬聯。遺澤之新。仰睇飛雲。俯臨逝川。誰不嚶呻。惟行之粹。惟石之堅。勒文墓門。

呂府君墓銘

公姓呂氏。諱民順。字國安。贛州興國人。曾大父某。大父宏略。父志熊。妣易氏。公生八歲。戍將萬夫。長過其家。憐公黠慧。抱負膝間。問曰。爾能偶句乎。曰。能。因出七言試之。卽應聲成對。一坐皆驚。稍長。以力本尙義。稱家用益裕。無物不周。然好與賓朋游。每逢令節。必折簡邀致。肆筵宴饗之。酣暢淋漓。雅歌投壺。必盡歡而後止。歲甲申。大厲爲人災。朝疾而暮卽瘞。有一室盡喪者。積屍縱橫。無人具棺斂。公患之。與閭右大姓謀。俾道家者流。禳而除之。公齋戒沐浴對。越七晝夜。儼若有臨其上者。厲氣爲消。邑宰失刺不花。敬愛公甚。唯公言是聽。未嘗干以一髮私。鄉民謝氏爲強寇所誣。搆獄。案具將上。公從容一言白其冤。謝獲免。終

身不令謝知之。俗好競渡。當五月五日。造船爲龍形。飾以五采。鳴鉦鼓。鼓譟奪赤旗以爲樂。觀者如堵。公訶子姓曰。是非君子之道也。禁勿往。往輒有罰。公蚤喪父。言及每垂涕。事母夫人。唯恐違其意。卒以孝聞。愛弟民瞻。一日不見。則愀然不樂。民瞻天遺孤。以仁年甫十四。公鞠之育之。逾於己子。以仁復卒。生二子尙幼。公爲保抱。搆持使守其先業。迄今有成。公生於至元癸巳八月二十日。歿於至正乙酉十月某日。瀕歿。精神不亂。呼水起盥手。端坐而逝。享年五十三。以明年丙戌某月日葬於縣西九峯山之原。禮也。公妻劉氏。諱淑仁。同縣清德鄉人。生二女。前卒。繼室亦劉氏。諱福真。亦同縣人。家於寶城鄉。四子震。復。鼎。益。三女適劉平可。李永堅。張良貴。良貴妻少房歐陽氏出。孫十人。女四人。予躋法從時。復實爲丞奉常。相與交游極驩。復間請銘公之墓。予謂公孝以奉親。仁以及物。禮以馭下。皆可以無憾。宜勒銘墓門。使百世之下有知公者。銘曰。

世遠道散。俗乃分。孰能障之。狂瀾奔。夫君屹立志有存。制行如古。食絕羣。有不信者。徵斯文。

故麗水葉府君墓銘

括之葉氏。世居松陽卯山。至唐銀青光祿大夫越國公法善。始以道術顯。宋初有諱備者。從卯山遷麗水之東里。又至崇信軍節度使。贈檢校少保。夢得始以政學者。夢得字少蘊。世稱石林先生者也。府君諱元顥。字子西。先生之十世孫。氣宇凝懇。沈酣於六籍。而旁溢諸史百家。折衷羣聖人之說。故其學粹然。不雜以他歧。端居若惴。喜怒不形于色。一動一靜。咸檢押無違度。雖經鑠石流金之候。未嘗離冠衣而處。下帷

講授弟子執經者環立左右。府君爲敷釋奧旨。攝其粗疎。入於密微。無不盎然充足。若蒙大霧而行。不知身之沾潤也。然其躬行尤力。在父母側。和婉其聲氣。進退有容。恆恐弗勝。其依戀慕愛之情。津津然洋溢於外。暨歿。哀毀骨立。幾至於滅性。終身孝慕不衰。四時祭享。必極其豐腆。獲一珍品。不薦。不敢食。遇諱日之臨。設席奠酒漿。蓬豆菹醢。哭盡哀。追想容聲。覺日乃已。延平守項君棣孫。鄉友也。每稱之曰。吾交人多矣。生事葬祭。求無愧古昔者。惟吾子西耳。人聞之。無異辭。家雖貧。殺衣縮食。葬宗黨十餘喪。有告急者。輒視其有無給之。過庭之間。尤善於訓迪。嘗曰。吾家自石林。益衍書詩之澤。接武繩繩。至今十餘世矣。吾祖吾父。挺然於其中。尤以種學績文自任。其遺編所存者。可見已。故鄉旦之評。必曰。儒紳之聯軌者。東里葉氏也。吾朝夕以思。唯寐始忘之。爾等毋怠事。累吾無以見先人地下。諸子聞之。更相勸勵。皆爲文行士。里閭取府君以爲則焉。年既高。幅巾大衣。踞蹠於烟霞泉石間。嘯詠自娛。其樂道循理。一出乎性分之正。士大夫多慕嚮之。故相率號之爲樂隱翁。一旦遘疾。復呼諸子謂曰。吾今幸得全歸矣。生不離父母。死安可倖去之乎。爾當歸吾骨先墓之側。魂魄或有知。當謹執饗具之禮。死且不恨。言訖而氣絕。至正甲辰十二月十二日也。壽六十八。以某年月日葬。墓在喜康鄉上黃之原。曾祖懿生。祖泰亨。宋太學生。父浚。母某氏。娶趙氏。先九年卒。生四子。宗道。守禮。寅清。宜壽。守禮以明經貢銓。曹拜監察御史。予雖不識府君。幸與御史中丞青田劉先生游。先生盛稱府君歷世相仍之懿。未嘗不以爲襲簪紱者不難。而能傳經業者爲難。豈惟所習有轉移。或不同。蓋亦有天道焉。自非畜之深。發之遠。未易以致於斯也。善人之報。吾將於府君

徽之雖然。府君。端人也。善士也。孝足以奉親。行足以厲俗。學足以覺後進。古所謂鄉先生歿則祭之者。其在斯人歟。其在斯人歟。銘曰。

括之顯族。棄最有聞。奕世書詩。以逮于君。式遵遐軌。載揚清芬。隱趣恬漠。文氣鬱燼。內外脩飭。寤寐克勤。彼鼓篋者。從之如雲。揚確古訓。辯詰道原。爾杞爾梓。我鋸我斲。小大異施。期集于勳。天道謂何。少微夜昏。八尺之塋。上生蘭蓀。采以釀酒。用酌君墳。

連州黃府君墓誌銘 有序

湖之德清縣令黃以貞。自造大父府君行狀。徵余爲塚上之銘。余以耄辭。繼捧幣而進。余益以諛墓受金爲嫌。辭然以貞請之益切。或至於灑泣。孰無父母也。不覺爲之感傷。因返幣而敘之曰。府君諱慧。字志高。黃氏。廣東連州人。世居城南龍津門上。曾祖某。祖某。父梁。宋大理評事。母蔣氏。府君疑重端慤。壹以誠遇人。發言求嘗弗踐。善貨殖之道。致家殷盛。或倖於素封。然立心仁恕。出內布帛。權度如一。不敢高下其手。衆物驟貴。輒殺直以平之。人有奇窮不自振者。具羞服以起之。雖釋老氏其宮弊壞。爲之葺補。嚴飾所費甚夥。弗靳也。歲序之間。又率循其教。藏法事。設醮祠。爲民徼福。其天性嗜善類如此。州里之人賴之。一則曰寬厚長者黃君也。二則曰寬厚長者黃君也。年七十又八。不幸以元至正己丑九月五日。以一疾不起。上距所生之歲。剛宋咸淳壬申也。卒後之明年。庚寅某月日。葬于州西高良鄉之原。旣而寇侵兆域。堪輿家謂不利。復以某年月日。改瘞小木山之陽。禮也。府君配文氏。婦德母儀。皆有可稱。子男一人。懋。女二人。

歸李某某。孫一人。卽以貞明經脩行。由陽山教官。召試吏部。選授今官。階陞承務郎。以政事聞。曾孫男二人。某某。昔者李文公習之。自爲其祖實錄。乞銘於昌黎韓公。其言有曰。先祖有美而不知。不明也。知而不傳。不仁也。後世論者。未嘗不美習之之孝。今以貞之行。當無愧於習之。特以余文非昌黎。無以慰其請。不能不飲然也。雖然。徇孝孫之志。發潛德之光。尙可以人而廢之乎。於是忘其鄙陋。爲序其事。而造銘曰。以誠勤物。其行孚於人也。以善遺後。其德參于天叶也。孫枝茂軌。其進欲凌雲也。本根發舒。碩大且蕃也。無善不報。皦皦若朝暾也。太史勒銘。樹之于墓門也。

廬陵劉徐生墓銘

翰林編脩官振唯。奉詔攝御史。行縣北藩。舟泝黃河。忽夢內兄劉徐生。相逢里中。穫溪上。脫冠命酒曰。徐生與弟爲結髮友。恨輸先著鞭耳。其情曠甚。及覺。悵然興懷。賦楚辭一章。擊楫而歌之。暨還南京。將寫辭以寄。或有告者曰。徐生亡矣。唯不勝其悲。居亡何。徐生之父。作書遺唯曰。徐生相從至郢者久。遣歸謁先塋。竟溺景陵之深川。越九日。得屍。又八日。旅殯郢城東子胥臺下。嗚呼。肺肝盡割裂矣。老身將何以能存耶。自造權厝誌一通。幸請銘金華宋先生。嘗見徐生。頗愛焉。當不靳於辭。卽弗靳。徐生不死矣。唯泣爲余言。余也不敏。無以塞其父之悲。頗聞徐生日記萬言。爲文有奇氣。頃刻風雲變化。雷春雨澤。有不可測度者。而古今詩尤嘉。人稱爲詩伯。州里器之。謂廬陵有二俊。其一唯也。唯舉進士。河南第一人。入仕于朝。徐生益自愛祕。期久積而大振。方岳重臣及部使者。咸遇以賓禮。欲辟爲屬。辭弗就。見唯受經於余。亦

欲負笈來相從。今死矣。豈直其父與唯之悲。余亦爲泣下霑襟。何也。牛毛非不多。而麟角獨能專也。嗚呼。生死之機。伊誰執之。而顛倒若是耶。嗚呼。徐生。字子卿。卒時實洪武八年三月十日。年二十有六耳。曾祖某。祖某。父說。以進士起家。官承事郎。安陸府通判。母蕭氏。妻曾氏。二女皆在幼。其父俟報政返骨。葬廬陵。永豐之故鄉。且爲立嗣。嗚呼。徐生之卒。爲善者或懼矣。夫。銘曰。

將鬯而遏之。莛不如蕢。方出而折之。麟不如麇。爾之生也。不幸絕類之已而已。而大化之冥茫。吾將尤誰。故永豐劉府君墓誌銘。

府君諱庚金。字奇相。姓劉氏。世家廬陵之永豐。劉爲江右簪纓之貴。自唐迄宋。擢進士第者。後先相望。入則登臺省。出則蒞郡邑。人稱爲名門。曾大父某。大父某。雖不與仕版。而皆能繼書詩之業。父某。宋季嘗舉于鄉。試南宮。輒不利。用特恩授新淦丞。母周氏。府君八歲。善屬文。未加冠巾。五經誦之。甚習。年旣長。執經來從者。戶外之屢常滿。多有去爲名進士。唯府君累踐場屋。卒就擯斥。時學校多私試。府君漫起應之。卽在前列。元至治癸亥。又臨試期。府君試以上古之書。旣而獲在選。升名春官。陳論過高。知貢舉者疑不敢取。繼以龍飛恩例。中書署爲吉州路儒學正。丁內艱而歸。泣血三年。未嘗見齒。雖祥琴斯御。諱日之至。必反袂拭淚不已。府君性忠厚。遇異母兄奇可。尤盡和孺之樂。每聞將授衣。問周夫人曰。兄之衣何如。夫人曰。已先授之矣。及夫人歿。葬祭之禮。獨盡瘁爲之。不忍毫髮煩其兄。銓曹稽其年勞。轉臨江路儒學教授。命旣下。而府君病且革矣。遼陽等處儒學提舉劉君岳申。名重當世。與府君交。二十年如一日。其稱府君。

有曰。溫柔而慎密。明辨而近恕。優優乎有士君子之風。識者謂爲實錄。府君爲文無宿構。下筆滔滔。頃刻龍蛇滿紙間。似欲飛動。郡縣大夫士慕其聲光。踵門求見者無虛日。平生嗜酒。飲至數斗不亂。拱手端坐。而爲禮益恭。此皆人所難者。生於乙酉二月十三日。歿於元統甲戌九月十五日。享年五十。以至正丙戌十二月二十二日。葬于折桂鄉烏江金牛臺之左。禮也。府君配某氏。子男子四。宜立。宜明。俱早世。宜謹。元江西行中書省左右司都事。宜正。入仕國朝。爲起居注。轉僉浙江提刑按察司事。子女子二。柔嘉。適傅若曾。柔恭。歸彭宗徐。孫男五。服孫。思紹。見珠。海珠。釋珠。孫女三。徐元。袁同。其壻也。一幼。未行。宜正。字貴道。今以字行。其爲左史也。余方司業成均。相與論文甚驩。迨出使瀾部。詣余拜且泣曰。昔者先大父嘗自念言。自十三世祖司空府君以來。多決策發身。而獨愧以特恩入官。所以戒飭先君子者尤力。先君子丕承前訓。唯寐少忘之。卒以儒而成名。及其終也。而呼宜正兄弟戒之曰。吾才非不如今人。而致於此。命也。爾曹當自勗。以文學亢厥宗。卽亢厥宗。吾死。目亦瞑。貧賤不足論也。宜正時始十齡。已深知其言之悲。幸夙夜戰兢。不致顛隕。獲從士君子之後。忝被官使。至今三十九年。而墓木且拱。懸綽之碑。未有所刻。豈非至闕歟。願先生文之。予憐其志。而不敢辭。銘曰。

家有世科。子才又多。胡負志而媿嬰。命也奈何。命也奈何。

呂府君墓誌銘

府君姓呂氏。諱文福。字壽卿。其先光州人。宋季。光爲極邊。戎馬蹂踐。無寧歲。遂避去。金剛臺上。尋遷黃之

黃岡爲黃岡人。曾大父某。大父某。父某。妣某氏。府君幼喪父。鞠於大母谷氏。大母性嚴厲。夙夜飭導。必期底於有成。府君年十四。從事法家之學。稍長。唐律義疏。皆精原其意。比類相從。支分脈貫。必允契乎人情。遂以抑剛茹柔洗冤澤物爲己任。時承平日久。未易得祿食。乃俯首試吏巡檢之司。會部使者申公簡夫。持節淮西。聞府君名。召與計事。衆咸愕曰。壽卿之名。何以達上官之聽乎。府君笑不答。黃州守脫因不花。及萬夫長脫脫。皆怙勢受賄。貪墨之聲載道。府君白曰。不去此稂莠。禾稼安得而茂乎。申公然之。皆捕寘于獄。正之以罪。申公名震淮西者。府君之力也。陞麻城縣吏。邑民被強盜所掠。訴之久。未克獲。元律。獲強盜至五者。捕一官。里豪陳翼。徼其利。縛賂和尙等。賂麻城尉。煨煉成獄。文上縣。縣懼尉與守有連。不敢問。府君知其冤。竟平反之。縣令長搖手相戒曰。毋生事。腕可斷。此牘也。不敢署也。府君從容抱案。歷階而升。請曰。明公卽宜署人命至重。豈玩戲具耶。令長相顧。遲回不決。府君曰。不署。則己當申郡司獄。直達憲府矣。於是不得已。從之。活者五人。已而厭煩。罵杜門不出。忽野峻台出。綰郡章。野峻台名臣趙魯公子也。尤愛敬之力。辟爲其府吏。伶優趙良卿。以利誘民家女子。教之歌舞。用媒銜上官。執權行賄。無所不至。府君又曰。不去禍本。其能清政源乎。白。府公悉傳於法。從良者數十人。董彘歌以爭田。誤傷人至死。議者欲當之重辟。董辭輒不伏。訴于慮囚使者。使者漫不經意。疑不決者幾十載。府君知其冤。竟爲白之。俄遷蘄州。未幾。卽辭歸。謝絕人事。築存初堂園中。延明師儒。教子爲舉子業。一飲一食。必與師俱。時大母猶在。程勸尤篤。嘗刻日晷於碑。戒家奴授食。惟恐後。師亦感其禮遇。有知無不告之。四方號士大夫以術業遊者。久

館之弗厭。瀕行必有贈遺。人稱爲黃之名塾云。至正壬辰。黃陷于盜。府君攜家走南昌。尋爲僞漢所據。僞漢之謀士多府君之弟子。欲邀致之。府君執手嫚罵。衆知其不可而止。入我國朝。其子熙出仕。爲縣浙水西。府君防閑訓迪尤篤。蚤出。則世肩鑿其戶。莫歸。必歷叩其所行事。且曰。某事當如斯。不當如斯。諄諄千百言。弗止。熙受教爲清白吏。府君事母孝。遇人也以惠。嫗友不能婚嫁者。助之。死無葬者。爲給柩槨。雖屢求弗厭。性剛直。或有過。皆必面折。不少恕。然遠近皆推爲吏師。後學者森森立。左右獄辭鈎連。有不可決。君片言之間。如庖丁刺牛。皆迎刃而解。與之遊者。皆敬而憚焉。不幸以洪武庚戌三月二日卒於鎮江丹徒縣寓舍。壽七十二。以是年五月九日葬縣東大慈鄉馬鞍山之原。禮也。元配葉氏。先十三年卒。繼配姚氏。子男一人。卽熙。嘉議大夫。吏部尙書。孫男三人。謙。讓。安山。女一人。李希顏。其婿也。予聞之。魏文侯時。有李悝者。撰次諸國之法。爲法經六篇。漢蕭何增之爲九。自時厥後。世益代增。直至三百有餘。爲之章句者。十有餘家。家數十萬言。凡斷罪所當由用者。合二萬六千二百七十二條。七百七十三萬二千二百餘言。嗚呼。律豈易言哉。自非府君才識之明。斷決之審。孰能中其肯綮者哉。是宜銘銘曰。

法乃司命。懸於重輕。脫不獲於簡孚。將枉物而傷生。故慘覈者。類貽於陰禍。而哀矜者。必兆於尊榮。嗚呼。如府君者。其殆善用而得其平者歟。

梅府君墓誌銘

府君諱致和。字彥達。姓梅氏。梅本子姓。其先梅伯。爲殷紂所廢。周武王旣伐紂。封伯諸孫黃梅。號曰忠侯。

遂以梅爲氏。世居楚。鄭間。後避新室之亂。散處閩中。其因仕而占籍宣城者。則府君十七世祖諱遠者也。十世從祖詢。仕宋。至翰林侍講學士。出知許州。九世祖堯臣。字聖俞。以詩名天下。氣完力餘。演肆而老勁。王文康公見之。嘆曰。三百年無此作矣。初從父廕。補太廟齋郎。累遷尙書都官員外郎。以終。自是子孫浸盛。咸繼藉乎詩書。多有擢進士第者。文物蓋彬彬云。曾祖某。祖師哲。父德明。妣汪氏。文節公澤民之。女弟也。府君生而俊朗。嶷然異羣童。稍長。大父授以上古之書。輒能講其說。操觚屬文。五采翮翮。然可觀。大父歿。復從文節公學春秋。爲舉子業。已而兼通易與詩。鄉先達張君師曾兄弟。問學雄深。人號爲二張。每奇府君。折輩行爲忘年交。過從講索。殆無虛日。府君聞譽四流。僉謂場屋之先登者。必府君也。數戰藝數不利。府君歎曰。吾之文。非不如今人。彼藉吾殘膏賸馥者。取青紫如拾芥。而吾乃轆轤若是。非命也夫。非命也夫。於是棄去。肥遯於城南。益取春秋而研精之。辨其世變。要其指歸。著春秋類編十二卷。名門右族。慕豔其聲光。爭欲聘致爲弟子師。府君以親老謝不往。而問道考德者。日相踵于門。府君悉攝其悞疎。入於密微。而後已。廉訪使者。東平王公士熙。燕南吳公鐸。咸來諮詢治道。府君以風俗盛衰。人心臧否爲言。二公深加敬歎。每有疑難。必下禮質之。元末政亂。烽火相連。方嶽重臣。有來鎮楚邦者。屢遣使者聘府君入幕府。參贊軍事。府君知其不足輔。辭不赴。初。侍講都官二墓。及祭享之祠。皆爲豪有力者所侵。宗人屢訴於有司。賂遺旁午。歷十二春秋。不能決。府君力白部使者。復之。府君家素貧。事親盡禮。及沒。三年不御酒肉。鷄初鳴。衣冠坐堂上。秉燭達旦。令子弟奴隸。各從其事。無敢惰者。故能充拓其先業。宗族鄉黨。皆遇之。

有道人有不平。赴愬於庭。府君片言直之。皆心服而退。至正乙未。府君避兵寧州山中。明年丙申四月二十五日。竟以一疾不起。享年五十有七。又明年戊戌某月日。返葬於郡南長安鄉盤石之原。從先兆也。府君娶崔氏。子男子三。長士熙。以學行入仕。知大同渾源州。以政事聞。今陞陝西承宣布政使司正理問。次煥。次鼎慶。皆蚤世。子女子三。長歸同郡劉安義。餘皆先逝。其著書。所謂春秋類編者。與耕桑十卷。毀于兵。士熙蚤夜痛心疾首。力欲繼先緒。既於故址堂。扁之曰存畊。復持史官朱芾所爲狀。拜予禁林。請銘其下棺之碑。予嘗過宣城。郡守楊君觀。出郊而迎。同登疊嶂樓。眺陵陽。敬亭之勝。慨然動景行先哲之思。梅氏爲宛陵望宗。因訊其後裔。何如。楊君遽以府君爲對。欲求見之。已作土中人久矣。今覽狀。知府君羣行鑿鑿可稱。而又能護先冢於三百餘年之後。君子之澤。孰謂其不深長也哉。是宜銘銘曰。

惟宜之梅。族望焯焯。世多顯才。有盛無衰。入講禁垣。出典大藩。大藩言言。繼之惟艱。孰昌於詩。震撼四夷。位則孔卑。名譽交馳。澤流至今。有嗣其音。秉心淵沈。如百鍊金。我胄我經。我文我兵。旗幟精明。莫能先登。命也奈何。芝生巖阿。既采且歌。委委蛇蛇。繡衣焜煌。諮詢憲章。告以否臧。肯矯而亢。苟非其人。掩耳不聞。亂如絲棼。誰贊爾軍。厥志未終。遶此閔凶。下有幽宮。馬鬣其封。穹碑勒銘。炳若丹青。載揚德馨。來裔是徵。

故陳府君墓誌銘

靖江王府伴讀陳發。痛其父母俱亡。屬于學子。評騭衆行。成書謁余於詞垣。且拜且泣曰。先子居閩縣。客授將樂伍氏。不幸以疾終。伍氏爲殮。且殯。發年幼。弗克奉柩歸葬。與弟英。奉母夫人朱氏以居。家甚窶。夫

人嘗泣曰。爾父之骨塗殞異鄉。魂神無知則已。脫有知。月苦霜凄之夜。寥寥將焉依。吾一念及茲。淚滿枕上。而繼以血。爾等宜自強。庶有以遂吾志。夫人親治絲枲。坐發兄弟膝下。手授書使讀。讀至雞初號。乃已。發亦謹識之。期允蹈夫人之言。時天下大亂。干戈充斥。發間行至將樂。中道爲亂兵所掠。陷虎口數四。夫人以爲無相見期。及發遁還。夫人撫頂曰。吾以汝發死矣。今幸一見。其天也耶。圖欲再往。俄夫人又不幸。以發發痛心疾首。將欲無生。今獲事賢王於藩邸。奉令南旋。隻影徒步。走三千里。躬負先子之骨。臥起與之俱。既抵家。與夫人合葬阮山之陽。言訖。嗚咽流涕。既而又曰。發之先。光州固始人。五季末。來遷閩縣。有諱套者。再遷長樂。傳九世。至德瑜。復返閩縣之嘉興里。德瑜。長樂儒學教諭。有文行。學者號爲端質先生。教諭生大父諱棣孫。至先子。皆儒學子。承藉遺休。而用志不分。遂通上古之書。期以取功名。已而齟齬輒棄去。而精研堪輿。歷數之學。方嶽大臣薦爲邵武校官。謝不受。先子生平有大志。不得少見事爲。齋志以死。發大懼德聲不遠聞。然聞不聞。在執事爾。願哀矜。賜之銘。言訖。又復嗚咽流涕。余聞發言。爲惻然傷之。爾父爲志士。而發顧不得爲孝子矣乎。宜爲銘。君諱廷臣。字以忠。壽四十九。以至正辛丑七月二日卒。其葬之日。則今洪武乙卯正月十三日也。銘曰。

其志之彊。時則匪臧。軋而或傷。有子之良。亦可謂之不亡。

徽州羅府君墓誌銘

府君諱旦。字希明。姓羅氏。其先出於祝融之裔。受封于羅。子孫遂以羅爲氏。始於房陵。繼遷豫章。長沙間。

歛之有羅。則又自豫章而分。其居西鄉。在宋爲著姓。有諱汝楫者。政和二年進士。官至龍圖閣學士。知嚴州。以終。生六子。曰顯。曰頤。曰頌。曰頤。曰頤。曰頤。皆曄然有文。願字端良。尤號雄深雅健。爲當時所稱。有爾雅翼。新安志。鄂州小集等書傳于世。府君蓋龍圖之裔孫。累傳至諱綺者。官承節郎。娶某氏。有子四人。而府君最幼。季兄迪祿。乃馬氏所出。娶汪氏。年十九而亡。無子。馬氏傷之。請於承節君。命府君爲之後。遂禰其兄而祖其父。府君事馬氏如大母。奉汪氏若生已者。歲時坐二母堂上。帥婦子奉觴爲壽。邕邕如也。其處同氣間。尤盡禮。訥然似不能言。諸兄有酒。而或使氣凌轢之。府君笑曰。兄真大醉耶。兄慙而去。疏遠人困厄不能生。府君飯之二十年。及其終也。復爲斂。葬之。推而達於州閭。貧不能蔽手足形。造櫬橫以給之。鬪爭弗解。將赴愬於有司。具蓬豆酒漿。呼而平之。社祠壞。民禁禳無地。偃偃號諸野。爲屋而像之。環秀橋。敗往來者危。顧視不敢度。倡衆市巨木。構之。春和木氣萌。農父入山刈新條。以糞田。刈者家單。往往不食。而作困頓道上。役僦人昇。掉糜食之。府君之好施。不特此也。四方宦游有過歛者。皆假館于府君。久而彌恭。瀕行。復有所贖。士大夫言及府君。必同辭稱之曰。惠人。惠人去。至正辛卯。斬盜起。蔓延至歛。府君謂諸子曰。國家養育汝曹久矣。今大盜攻城邑。正赤心報上時也。汝曹毋以老身爲念。當思爲破盜計。於是諸子募健兒數百人。整其隊伍。部領詣轅門。請自效。旣而盜日熾。家竟以此蕩毀。至正丙申春。府君避兵山谷。盜兵卒至。執府君。褫其所服衣。府君罵曰。天子何負於汝。而反耶。行將作菹醢矣。罵不絕口。盜怒。以戈春之。府君墮澗中。時諸子在軍。無知者。惟一女奴侍側。扶至家而卒。正月二十六日也。享壽六十三。府君

娶吳氏諱月字德明休寧人閑禮法甚得婦道亦以其年十二月十八日卒年視府君而加二齡子男三人守正宣明祖安宣明仕於國朝累官將仕佐郎知淮安府山陽縣事以治化稱然孝行醇至嘗割股肉以起府君之疾女子五人適汪道原吳履仁程欽文汪士傳吳宗善孫男十人斗應潤祖謙童儀童山陽童喜童貴童貞童州童添童曾孫男七人茂保萬保忠保恕保憫保羅漢保賀保府君卒之明年某月日與吳氏合窆里之官倍山禮也人之號丈夫者身都重祿而無毫芒之可紀徒見其須鬣森張而已冠服委蛇而已是果何爲者哉府君以一韋布之士其行乃彰彰如是孰得孰失當必有辨之者矣宣明久與予游素知府君之事遂爲之銘曰

惠利之施無間親疎是爲仁之推赤心徇國白眼冒賊斯乃義之激吁嗟乎羅君非行之絕倫曷以致吾文吁嗟乎羅君

故蔣府君墓銘

余官詞垣時編脩蔡玄與蔣敬偕來玄代敬致辭曰敬舊從游於句曲伯融孫先生伯融總兵於括而歿於王事敬痛其師之亡而其詩不傳今采輯成編將刻諸梓願爲序以冠篇端予私自念近時爲師弟子者一轉盼間如不相識然若敬者亦可謂之知義者矣意必其有所自頗竊識之及余致政還山敬持元進士東原牛繼志之狀請銘其先府君墓狀中述其家三世以孝聞則其所涵濡者深矣宜乎敬之制行不忘其師也府君諱成字公輔蔣其姓也其先爲汴人宋建炎初扈蹕南渡遂家建業之錦繡里曾大父

某大父某。父某。字秀之。母郭氏。閨闈肅穆。可爲女中師。府君生而夙異。不與恒兒同。少長。事親曲盡其孝。敬一。隨步之間。常恐親之飢且寒。盼盼焉。懸懸焉。若無所寓身。見親破顏一笑。輒喜劇。不知手足之舞蹈。士君子咸曰。公輔之祖若父。篤於倫品。人競稱之爲純孝。而公輔又能繼之。吾聞孝子之家。其後必昌。庶有望於斯人歟。府君非惟能孝也。其友二弟。甚至庭無間言。仲弟彬。爲泰州吏目。先三年卒。季弟順。先一年卒。府君竭力經營。其後事甚悉。府君非惟能友也。與人交。務崇信讓。難雍雅雅。絕不與物競。唯恐傷之。不幸以洪武七年五月十日卒。享年五十又九。其年六月八日。葬于城南撥雲山之原。禮也。娶劉氏。子男子一人。敬。其字爲行簡。爲人謙慎。重然諾。一時名士。多與之遊。子女子二人。長蚤世。次適徐信。孫男一人。眞童。孫女一人。在室。予聞孝者。羣行之冠。冕人有行之者。則百善至。而百邪去。府君能繼先人遺蹟。而益有光焉。以增夫名教之重。此而不銘。惡乎銘。銘曰。

才豔而考。裁雲剪霞。未能振德之華。恪遵天經。篤行于庭。斯可通于神明。昧昧思之。孰爲重輕。讀銘者。當蹶然而興。

故仙居陳府君墓誌銘

古者。鼎有銘。銘者。自名也。自名。以稱揚其先祖之美。而明著之於後世也。嗚呼。孝子慈孫。欲顯於親也。尚矣。後世不銘之於鼎。而以懸棺之石代之。不自署名。而假諸能言者述之。其事雖殊。而其心一也。台之仙居。有陳瑜者。自縣諸生。選入太學。與予兒中書舍人璉。交甚洽。瑜方被旨。覈實征稅於安吉。而以父憂還。

瑜思有以顯其親。走湖州。謁教授童君冀。據其孝行成狀。復持殘書。走青羅山中。請予製銘。樹之於墓道。蓋瑜之先。本金華人。六世祖始遷。而予與童君。皆世占金華之籍。鄉人之言。當取信於世。此瑜之意。尤加勤者也。予何敢辭。瑜之父諱嗣。字自得。母夫人青年喪夫。以貞節自持。自得養之。無不竭其衷。夫人春秋高。沉疴在苒。陰虧不足以制陽。痰液膠澁。口鼻間氣弱。不可出。鬱塞無以自暢。自得跪床下。噙而吐之。日以為常。嗚呼。汚惡人之所難近。自得為之。若易易然。非其心誠愛親者。不能也。斯事且爾。則凡謹衣之煖。寒藥之降。升食之蚤莫。宜不言而可諫矣。嗚呼。人子之身。親體所分也。何敢有焉。身且不敢有。則凡痒疴疾痛。舉切于心。生養死藏。必誠必信。而無錙銖之不盡焉。如自得者。殆將無慊於茲也。使自得享有爵位。則移而達之事君也。必忠。惠民也。必仁。臨下也。必寬。惜為時命所拘。而所及者。不過振其宗。媿。卹其比鄰而已。可勝嘆哉。孔子之教。以孝為天經地義。諄諄然著之於經。予學孔子者也。自得孝行有如是者。烏得不揚之章之。以為世勸乎。自得性嗜學。幼時厄於單窶。晝則注意米鹽細務。夜則燕薪誦書。逮長。家寢饒。遇有可矜。輒施與不靳。鄉黨稱為善士。生於元延祐乙卯正月十四日。歿於國朝洪武戊午三月二十三日。壽六十四。卜以明年己未某月日葬於某山之原。曾祖儼。祖淳。父宏義。母陸氏。元配王氏。先卒。繼室薰氏。子男子三人。長瑜。有文學。溫溫然如玉。即來徵銘者。次璞。次琳。皆業儒。子女子二。適某某云。銘曰。家享千金。埒於封君。苟子道無聞。愧於七尺之身。三組銀黃。為卿為郎。儒味其天常。筋骸雖彊。而人心已亡。君子哉。若人。篤孝於親。瑞世之珍。鳳凰麒麟。悼史造文。勒石墓門。以揚清芬。以勗其後昆。

永康徐府君墓銘

君姓徐氏。夔友。龍名。與字也。金華之永康。所居邑也。諱興。諱盛。及正孫者。曾祖。祖考也。翁氏。妣也。祇祇翼。翼人。不見其怠容。兵亂。家貨傾。瘁心勳力。營度綜覈。卒完以充。歎歲發餘粟。振里閭。溫而恭。好禮而文。遇士友有恩。其德也。七十有九壽也。元至正壬辰十二月二十四日卒之時也。明年十一月十六日葬之期也。元統癸酉九月二十七日卒者。其配盧氏也。六十者。盧氏壽也。甲戌十二月二十日。盧氏葬也。義鄉岡谷之原。墓所也。道弘。道惠。道杜。子也。張某。呂某。塔也。儔。俊。供。侖。福。寧。偉。孫也。椿。桔。棠。根。棋。晉。本。儀。禱。敬。曾孫也。今爲國子生。授保定稅課司副使者。棠也。去君之卒一世矣。棠不敢忘。而圖銘以傳。其志事悲也。余與君同郡。雖欲辭。不得而辭也。銘曰。

善蓄躬。豈必名耶。全壽終。奚以榮耶。德其豐。厥膺隆隆。殆將興耶。

象山王君墓銘

國朝平。四明。蘭山。民爲亂。寇象山。虜縣令丞。據縣。及縣大姓王君剛甫。散家貲。率敢勇士。襲其營。破之。執縛魁。曾數十人。跪于庭。罵曰。汝寇郡縣。囚命吏。劫平民爲害。罪當死。遂斬之。散其餘黨。迎令丞以歸郡。以其狀聞。詔賜白金二十兩。縣圖其破賊狀于鳳躍山佛寺之壁。是時。朝廷聞亂。發近兵。誅之。兵及境。欲屠從賊者。會君已誅盜。兵乃解。象山民數百。環君拜曰。微君。吾邑幾以不義死。由是君名聞浙水東。君諱某。剛甫。字也。其先祖某。自昇遷閩。復自閩徙象山。曾祖諱子俊。祖諱文盛。父諱芝。季父芑。無子。君以父命後。

之君祖父皆善士。世以貨聞。至君尤敦厚有氣量。爲學務達大意。能操縱斂散。貨愈多。然好周施。喜士人稱其義。元季嘗以通蒙古書薦爲慶元路蒙古字學錄。盜起黃巖。江浙行中書省檄君攝東門巡檢司事。攝六年。盜畏不敢一人登陸。及君去官。東門被兵。民追思君。歌慕之。年六十有八。以洪武十二年正月某日客死於京師。識君者咸悲傷之。君娶葉氏。宋丞相夢鼎曾孫女。繼董氏。許氏。子男二人。用鼎好學通詩。用益。君卒後乃生女四人。其二適林文孟。林起宗。二在室。孫男一曰帖。銘曰。

古重巨室。齊于世臣。望大聲隆。可以鎮民。民或思亂。伺隙以動。呵而止之。俯伏震恐。豈若細人。勞而少功。勢卑言輕。其誰肯從。海島之間。萬室蟄蟄。煮海樵山。易化難熟。世當治平。不敢躡騰。或逆其情。據扼阻兵。乘亂未弭。嘯呼以起。火矢風艘。入寇東鄙。君曰島竈。自投釜中。沸湯方然。汝計已窮。怒叱壯士。盜不可長。縛斬軍門。以取峻賞。天兵東來。欲剗穢腥。聞難既夷。飛書大庭。函金走驛。一日千里。旌爾義勇。以勸來者。父老相攜。環拜于塗。非君有爲。幾受盜污。鳳躍之山。圖畫君像。此則其藏。過者稽顙。

李信甫墓銘

建業有篤行士曰李君諱汝成字信甫。居家能惠其鄉。信其朋友。游京師。卿大夫皆重之。勸之仕。不聽。竟歸賈六合市上。物價減。恒市人之半。客遺錢五十緡而去。遣人追之。不及。抵其家。授之人以田宅來粥。于直視物倍。問故。則曰欲子孫久守之也。年七十。以元至正戊子八月日卒于家。君娶郝氏。再娶吳氏。年五十無子。或謂施金飾浮屠像。當得子。既而夢神人授二粟。後十年。連得二子。長曰讓。次曰疑。郝生一女。適

句容王某孫男四人曰某某某君之先太原人曾大父某徙潤大父大振遷建業縣曰上元里曰李岡大振曰此符吾姓宜居遂居之通術數父義亦善士子疑好學行義儒生稱之以某年月日葬君子某所來請銘疑言不妄古所謂視其子知其父者疑與君之謂耶銘曰
不及汲於名終以善稱不斷斷於得終以貨贏人維其然故有合乎天噫彼力爭而智取者曷不視乎斯阡。

麗水黃府君墓銘

元至正中天下方晏然麗水黃君與可獨憂以爲大亂將起著書十篇言政治闕失甚悉曰能用吾言庶可掾不然莫及矣會朝廷遣使者宣撫四方君卽詣使者上之不聽歸臥于家後數年亂果作山東李國鳳經略江南見其書歎曰經濟器也致書辟之卒不起年八十以終君諱許與可其字上世多仕宋不大顯七世祖太學生師恩與兄讓財以義稱祖國華父昶年十七舉于鄉補太學上舍生君蚤孤知自刻厲讀書攻舉子業試弗利棄不復視慨然慕聖賢之學習五經約知其說尤深於易旁通諸家言目別彙分咸得其統緒狀貌敦碩髯垂至膝下談辨今古事得失成敗如身預而目覩者部使者行縣執賓主禮請見奇其才數欲薦之謝不從惟惟所學與其徒相講授性剛嚴逢人不能爲卑辭媚色不憚其心者遇諸塗不正視然養母恭敬溫和極能適其喜怒母卒廬墓左右壁之下遂別號石壁山人讀四書著類觀讀易著大意讀書詩著繡斷他若制度文爲之說咸有所述所爲文通若干卷其於義理蔚如也未卒時自

爲挽詩。謂將死。既而病。歎曰。生而無愧。吾榮也。死而無虧。吾寧也。遂卒。時至正壬寅四月二十八日。後六年。爲吳元年。丁未十一月某日。葬于葉術。君娶魏氏。子男二人。文彬。文奎。女一人。適梁某。屠出也。孫男四人。曰夢池。夢庚。夢裴。庶孫。夢池以能文辭名。仕皇朝。爲秦府紀善。階將仕郎。女一人。適湯住。曾孫男四人。曰綸。維。綱。緯。君沒。葬已久。夢池持狀以書拜泣曰。先祖既不得志於當時。尙不圖其存於後世。是生死不遇也。烏乎其可。余曰。君雖不顯其身。而有孫以昭揚之。斯亦可謂有天道哉。銘曰。大亂之生。其端孔微。不有君子。孰爲蒼龜。未形而言。昏愚攸諱。幸冰未泮。視如平地。政闕教墮。安能久存。天塞其聰。有言莫聞。言之在予。從違者人。人之方迷。聖賢所難。叶遺書不亡。冢孫是紹。載德昭聲。是謂天道。

錢唐沈君墓志銘

司馬遷謂儒者之道。博而寡要。遷蓋自謂也。非所以論儒者也。夫自唐虞以來。載籍世有。欲盡而窮之。信若博矣。苟得其道焉。一言可用之終身。而行於天下。奚謂寡要哉。然近世師喪經晦。爲士者以強記多識爲高。而昧於力行。問之。則無不知。措之於政。則患不能。於是遷之言。若可信矣。吾嘗私病之。以爲儒者之道。豈以多識強記爲哉。亦論其行與事而已。其行誠非也。雖多識強記。烏足謂之儒。其行誠君子也。爲身則端。爲家則和。何暇計其餘哉。吾以是求士於今之世。生者樂與之交。不幸而歿者。亦樂爲之銘。若錢唐沈君者。固余之所願有述焉者也。君諱禮。字仲和。沈其姓。錢唐其所居。少喪父母。劉貧不能自存。挾其弟

妹歸金華康氏。君獨泣曰：我沈氏嫡也。我去沈氏鬼安所求食乎？願謂弟妹汝善事母。我將求孟飯歲時。洒先人墓上。勿餒我先人爲也。母子相抱持。慟哭而訣。君家居素善書。以應四方之求。至君益刻若節縮。廣致奇異罕有之書。列度左右。身處其中。晝夜研索。遇格言偉論。可見於行事者。則執筆書之。坐右歲久。至無虛處。每日省觀。期不愧於古人。行一善則喜。否則若不能自容。其家人事之終身。而不見其恃言戾行。其同里之人服之。有所爭訟。必就而取正。凡求書於君者。視其色。聞其言。未嘗不歎以爲君子人。而君常以不得養母爲戚。元至正中。欲徒步往求。而浙水東西兵亂。不果。及道頗通。而母死矣。故君尤過哀焉。平居多疏食。不啖葷肉。祭享之日。悲慕如初喪者。君尤善教子。次子新民。年十七入國朝。由鄉貢進士爲太學生。君遺書多至數十通。皆勉之以忠國事上之道。瀕終。告其長子貴誠。猶以孝友爲言。嗚呼。是非儒者之行耶。君之卒。以洪武九年七月十二日。葬以是月二十日。墓在錢唐城西之金崗山。年五十有一。曾祖某。祖某。父某。娶王氏。能輔君爲善。二子貴誠。新民。一女適姚某。新民嘗從余學經。來請銘。余嘉君行。故不辭銘曰。

儒道廣博而周通。小無不在。大靡窮。擴布天下。敍一躬。得之成德。推建功。彼胡不知。訐以攻。非儒之敵。乃其庸。沈君好學守厥中。六經諸子爲垣墉。聞義則喜。善則從。敦愿不伐。持敬恭。家化里閭。服且宗。使躋于位。積愈崇。抱德孔多。壽不豐。天實嗇之。匪其凶。刻辭昭潛。鎮幽宮。

莆田方時舉墓銘

余始銘莆田方君應元之墓。則知方君有二賢子。其長諱槐生。字時舉。尤以文名。心固識之。後聞時舉以郡守辟爲郡校師。人尤稱之。余愈熟其名。而以及見之爲恨。然頗自意。余官京師。去莆不甚遠。以時舉之才。校師豈足以老之哉。余雖耄。見之必有日。及余引年告歸。有以狀徵銘。署其後曰文煢者。則時舉之子。省其狀。當銘者則時舉。而時舉以洪武六年六月六日已死矣。及考論其死。故編民有怨其郡丞者。誣訟之于部使者。辭蔓連時舉。已白其誣。遣歸。及上官疑其獄有賊。再逮之。時舉恐。遂拜辭孔子廟。及其先祠。遍與朋友訣。夜半。給其妻子就寢。沈井中。嗚呼。其可哀也乎。按狀。時舉。儒者也。少資稟過人。受業于進士方君德至。及鄉貢進士鄭君桂。通春秋書詩三經。年二十。輒爲人師。善講說。爲文辭。元至正中。方岳大臣交章以學行隱逸薦之。不起。擢爲漳州路北溪書院山長。不赴。授泉州路儒學教授。卒不從。及國朝以校師辟。辭不獲。乃就職。爲師七年。惟以推所學淑髦士爲務。恬不以祿薄勢卑動其心。嗚呼。時舉之所守如此。豈非君子哉。時舉嗜義如飢渴。蔡忠惠公襄之祠。林文節公光朝。劉文定公克莊之墓。皆圯壞。時舉請于有力者葺完之。其先宋光祿卿偕。爲郡名人。則祠之于學官。晉江知縣深道墓爲盜發。則治而瘞之。其族祖族父及外王父母。四喪未舉。則葬之。莆之郡乘。自宋南渡以降。廢而不脩。則陳于上而脩之。其家譜牒未備。則備之。嗚呼。時舉之所爲如此。豈非君子哉。時舉謹愨有禮。平居未嘗去衣冠。出言秩秩有章。與人交。薰然和。翼然恭。悠然久而不變。聞人善。則揚之不置。有不愜意者。必論折之。使合理而後已。其務德如此。而年僅四十有五。寧不誠可哀乎。與時舉同時之人。有學不若時舉。文不若時舉。言論不若時舉。

而都顯位。享豐祿。得上壽以死者矣。而天獨窮時舉之身。又闕其壽。豈非命也耶。然命者出於天。惟君子能安之。而小人皆反之。安平命以行。而所遇有橫逆者。雖夭猶壽也。雖賤猶貴也。以能全其天也。不能安乎命。所爲戾乎天。而僥倖得福者。雖壽猶夭也。雖貴猶賤也。以棄其天也。然則時舉雖不獲一命。不登下壽。而所受於天者。白于鬼神而無愧。質于聖賢而可徵。又何足悲乎。辨而銘之。所以慰時舉。亦以慰其子也。時舉娶朱氏。故宦族。二子。長卽文煇。次文烜。二女。適柯廉。龔璠。曾祖諱寓孫。宋某官。祖諱塾翁。父則諱應元。其世見應元墓銘。茲不著。時舉之葬。以某年月日。墓在某山之原。銘曰。麟或死于斤豚。或被繡紋。天道莽莽。孰知其門。命之方屯。雖賢哲莫伸。自昔皆然。豈獨乎君。君勿尤乎人。惟命是信。我銘君墳。以列清芬。以告鬼神。以貽爾後昆。尙其不泯。

南海高君墓銘

廣州南海之蟾溪。有士曰高君瑛。字季卿。年六十有四。以今洪武十年十月三日卒于家。其存時。南海人稱其爲長者。旣沒。舉邑聞之。咸哀痛曰。長者亡矣。其冢子彬。居金陵。聞訃。哭服喪。來請銘曰。先考之德多彬。不能悉舉。縱悉舉。恐人以彬私其親。不之信。言之公者。莫如衆人。衆人知先考者。莫於南海人之悉也。南海人之稱先考者。彬亦不能盡言。惟常稱曰。長者長者。彬自少聞而熟焉。願有以昭之。使弗失墜。又曰。先考居家。寬惠愛人。貧者有以濟之。患難者隨力所至。必卹之。故人稱長者不虛口。惟先生哀焉。夫長者之名。莫盛於漢。或曰。以其有長民之德。可爲人長。故云。或曰。其德和善化人。如長養萬物之爲。故云。或曰。

君子之別稱。其義之重如是。在漢時。大臣惟曹參、周勃、稱長者。萬石君之流。亦可爲長者。其他以蕭、韓、張、陳之功業。不得以長者稱。賈誼、董仲舒、司馬相如之文章。亦不得以長者見稱。其不易以許人如此。高君一布衣。人交口以長者稱之。則其德足以化人而然。不可以位論輕重也。自古國家。必以用長者而興。蓋其敦厚。可以鎮俗。和易。可以近民。其所爲若遲鈍。而知大體。似無能而有遠效。非刻薄輩。徼目前功者比。故賢者貴之。若高君者。未嘗有祿位。且感人若是。使稍假之位。其功德豈少哉。是宜銘之。以爲流俗勸。君曾祖某。祖寶錄。寶錄之兄天祿。仕宋季。爲茶鹽司提舉。父與立。母黃氏。娶李氏。先十六年卒。子男三人。冢卽彬。次曰晉。蚤死。次曰宏。女三人。二適邵伯齡、黃仲賢。一在室。孫男若干人。孺節某。孫女若干人。彬尙氣節。元季嘗集民爲兵衛其鄉。旣而遷金陵。將以某年月日歸葬君于某山之原。銘曰。漢治尙質。多任長者。淳風茂德。化成天下。長者之化。喬嶽大川。莫知其功。生物資焉。世頽俗壞。小智利口。取效目前。追恤其後。我思高君。長者是銘。告爾子孫。維德之程。

周君墓銘

周君諱德驥。字仲良。其先汴人。宋靖康亂。諱詢者始遷杭之新城。曾祖諱曾。國學生。授迪功郎。祖諱藝。父諱誠。孫母汪氏。君少喪父。能自力學問。事母貧無以養。去就吏。得祿以奉母。及母患危疾。遂棄歸。躬調煮藥物。問所苦好而順適之。晨夕涕泣。叩額籲天。夢神語以禳祭之法。亟如其言。疾果愈。念母已耄。絕意不復謀仕。有薦之者。不應。惟日以求母豫悅爲事。食必俟母舉筯然後食。夜俟其就寢然後寢。見其色和卽

喜以告妻子。或有憂戚。輒懼。自外歸。倘不見母。驚走問故。家人曰。在臥所。趨床下。問體安否。安則悅。否必如疾在身。終日不食。平居必稱名。有間起而對。髮班白。未嘗言老。及母年八十餘。終。君哀號踊擗。過者不忍聞。居喪治葬。咸如古禮。君有兄。亦老。病足。不良行。嫂喪。明無子。事之如父母。元末兵亂。奉兄嫂以逃。不辭勞動。沒皆卜地葬之。入服其行。稱其爲孝弟。及年五十八而卒。復以節孝私諡之。君娶武都章氏。其孝儉如君。年六十。哭君過哀而終。生一子。昉。養君如君事母。一女。嫁白釧。側室龔氏。遇盜不屈死。生二子。一天。一死于亂。昉旣葬君。來請曰。先子之卒。以元至正己亥三月四日。吾母亦卒於後十五日。初合葬潘村先隴之左。今洪武甲寅正月三十日。復遷葬于昌西鄉下汪山之原。而墓石無辭。敢請銘。余曰。節孝君之行如古人。固宜有後。昉真其人也。烏可以辭。銘曰。

人咸樂乎生。而愧於苟生。人咸惡乎死。而尙於有名。生以孝稱。其生不苟。死以孝名。其死不朽。昉以爲之子。是謂天道。而余以銘之。告于悠久。

故義士胡府君壙銘

府君諱嘉祐。字玄祚。姓胡氏。其先出於文定公安國之裔。有諱志寧者。宋宣和初。來知婺之永康縣。遂家焉。令爲永康人。曾祖某。宋通直郎。祖時孫。父文。字質甫。皆隱德弗耀。妣張氏。府君幼失怙恃。巍然思自樹立。蚤夜孜孜。無毫髮自懈意。卒使貲產逾於前人。然積而能散。遇貧饑不能自存者。多與之泉布。無靳色。人有急難。百計救之。至勢不可爲乃已。以信接物。如金石弗變。里黨有期約。咸屬府君。一聞府君言。則曰。

胡玄祚斷不可欺矣。歲丁酉，括蒼盜起，殺官吏，焚府庫，蔓延至永康。浙水之東騷動，縣達魯花赤曰也速達而聞府君有奇才，即薦上海右憲府廉訪使劉公禎，亟召府君與語，大悅。命府君集鄉里健兒，給以鎧甲，俾領之以殄寇。府君勒成部隊，教以攻戰之法，頗可用。一旦寇大至，府君列陣于占田，衆寡不敵，遂死之。是歲二月二十三日也。江南行御史臺聞其事，遣使致奠材。士大夫亦嘉府君之義而悼其不幸，多爲詩文以傳。府君得壽四十有八。元配章氏，無嗣。繼室趙氏，宋格庵先生順孫五世孫女也。子男四人，裕、禔、祿、禔。女二人，長初適鄭某，次禎未行。孫男二人，榮祖、正祖。孫女三人，忠、昭、清，皆幼。裕等既以丙午之歲九月壬午葬府君於鯉溪山之原，復具府君羣行，徵予銘而納諸玄堂之南。初，予受經於凝熙先生，聞人夢吉始識府君。蓋府君之女兒實歸先生，而先生之女又適府君之子裕。府君之事行，故先生數道之以厲人人。予頗得與聞之，惜乎府君百不一試，而竟賫志以歿。然而君子有取之者，其捍衛鄉井之心，皦皦然不可誣也。人孰不死，君死於義，可以無恨矣。銘曰：

人孰不死，得死則難。此惟義士胡君之甚，千載之下，過者式焉。

故王府參軍胡君妻項夫人墓誌銘

余授經青坊時，龍泉胡楨嘗以伴讀侍皇太子研席。楨因得從予游。今年春，予以總脩元史被召來京，尋入禁林爲學士。時楨已擢宣武將軍，僉處州衛指揮使司事。間以其先府君王府參軍深墓上之銘來屬予。予既已爲之，楨復泣曰：先子之行，幸托見於文字間，而先母未之有述。幸先生憐之，敢奉姻家兄章存厚

之狀以請予。義不敢辭。按狀：夫人諱某，字某，姓項氏，處之龍泉人。父某，母某氏。生十有七歲而歸于參軍。參軍同邑人。其父珏，爲征東行省左右司員外郎。夫人既歸之明年，參軍卽往省覲，遂補其省掾史。越九年始歸。初，員外府君娶趙氏，生參軍及二弟潭、海。趙氏既亡，繼室李氏生某。恐夫人與家政也，使居於外。夫人無以自給，與媵人日事機杼。風雨瀟瀟，青燈明滅於一室間，人不能堪。夫人則怡然處之。父母憐其勞動，將奪其志。夫人指庭前水曰：「俟此水西流，吾志卻當改耳。」不聽。娣姒之間，或譏諍之，或勸轢之，夫人皆不答。員外君歿，參軍自海外護喪歸葬。夫人祖跣出迎，哭。參軍持夫人泣曰：「吾爲親故，不獲與夫人居。夫人備歷諸艱，而能完節以待予，其與古之義烈何殊也？」夫人曰：「此婦人常事耳，何足上勤君子之念慮。其後終不自言。」至正壬辰，中原兵起，浙水東州郡漸至繹騷。參軍從蕭將軍剪除鄉郡羣盜，間歲一來歸。夫人攜子女，間關寨柵中，亦能自安。如獨居時。己亥冬，處州內附。參軍朝京師，上奇其才，命爲右司員外郎。於是參軍迎夫人以來，時夫人已有疾，挾醫以從行。暨至，念及鄉里，鬱鬱不自聊，疾愈篤。遂卒於清溪之寓舍。實辛丑七月某日也。享年四十有二。壬寅，返柩於處州，擇麗水某鄉某山爲冢。以十一月某日葬焉。夫人性淑而行勤，參軍有志事功，視生產作業之事蔑如也。其補綴缺漏，締構生理，唯夫人是賴。及夫人死，參軍銜命在處州，又不能視其襲斂。每對予言，涕泗爲之漚然。夫人生二子，長卽楨，次曰樞，一女曰章。其壻卽存厚，御史中丞盜之季子也。夫自陰教不行，婦人女子能不易節改操者，何其罕也。間有以禮自持，欲起古人而效之者，人方羣訕而衆侮之。又何習俗之不美也。有如夫人之行，可不彰著以爲世勸。

乎。是宜銘銘曰。

猶歟夫人。始終一節也。羣言沸騰。卒莫之奪也。相厥夫子。有偉其烈也。乘化而盡。又何怛也。千載之下。尙視茲貞碣也。

故茶陵貞母陳夫人譚氏墓誌銘

共姜守義。賦詩以自誓。孟母訓子。斷機而示警。貞節昭乎閭範。誨言翼乎陰教。傳芳往古。垂則方今。況乎百世之下。聞風而起。勵志於蚤齡。收榮於暮景。其操若金石而弗渝。其訓類冰蘖而加飭。昂厥令子。爲時名臣。有若貞母陳夫人者。其亦卓乎不可及已。惟夫人諱某。字某。姓譚氏。譚爲茶陵鉅族。真隱遺曹。雲陽之山。如翠旗之開張。紫微之峰。若鐵馬之馳突。勢綿延而蟠結。氣網緼而鬯達。清淑所鍾。嘉徵攸賴。故夫。人之生也。髫稚之年。婉慧絕品。剪綴之工。不學自能。絲枲之習。共事惟謹。特鍾愛於親闈。蚤擇配於君子。時則有如陳府君。諱某。世載徽美。生同里閭。雅稱詩書之府。允爲簪纓之裔。盟言旣訂。童幼來歸。祥禎之應日臻。溫煦之福自至。逮及笄齡。益增遐識。祇事舅姑。備敬養之道。敦睦夫黨。致雍肅之義。主中饋。知修潔之方。佐蒸嘗。盡怵惕之敬。見稱耆長。表厲宗門。不幸年甫三十。遽隕所天。澧水秋竭。嘆蘭蕙其可馨。嶺松冬槁。恨女蘿其焉托。未亡之稱。弗絕于口。一醮之義。不改其節。有子曰某。賦資穎拔。稟識剛明。寤寐羣經。欲明體以適用。參錯諸稅。思致君以澤民。元之季世。四海興戎。乃崎嶇於兵間。尋盤旋於江表。適值聖主龍飛。羣雄川赴。慶風雲之嘉會。喜魚水之相逢。試以檄文。辭意雄偉。聽其談辨。籌策深弘。遂署爲東曹。

掾當大將四征之日。正羽書交馳之時。酬答整暇。事無凝滯。會淮安納款。奉命徵兵。甫高郵之斯屆。俄僞吳之見塾。抗論弗屈。陳義益高。因讐服其強悍。獲遣還於朝署。由是入贊省垣。出掌邦憲。協恭而庶政。惟和震盪而百壬自避。其典守劇府也。剗累政之極弊。登難集之積賦。政令所及。精采一新。其參預機務也。立經陳紀。期底隆平之治。獻可替否。益盡匡弼之忠。泊乎執法中臺。澄清諸道。白簡糾劾。而物無遁情。赤墀敷奏。而廷無留議。蓋持己清白潔。如冰雪。遇事果決。捷如風雨。所以姓名達于寰宇。政事書于竹帛。信無愧古之名臣者矣。先是。兵燹方張。母子睽隔。皇上錄賢念功。俾從間道迎養。賜之以金緡。居之以室廬。恩寵便蕃。焜煌無比。勳薦紳之慕豔。形騷人之歌咏。僉謂夫人德積于躬。祿被嗣續。身具膺於五福。養不減於三牲。安受尊榮。以及考終。衣食賻襚之厚。棺槨宅兆之佳。亦云備矣。夫人曾祖某。祖某。父某。妣某氏。所生三子。長卽某。中奉大夫。御史中丞。次曰克寬。壯年而夭。次曰復克。荷家政。一女曰慕貞。未嫁而亡。夫人以洪武辛亥十有一月戊午。歿於京師之寓舍。壽六十九。中書省臣以其事聞。特降勅旨。俾歸葬於故鄉。發引就道。祭以牲牢。哀榮之禮。允謂兼至。明年壬子某月日。柩還。用堪輿家言。卜地於某山。以某月日窆焉。禮也。予竊聞之。人材固因山川而生。山川必籍人材而顯。瞻此茶陵。舊稱良郡。得名肇自於漢侯。高隱但聞於唐哲。年祀雖遐。簡冊靡載。終無宏偉之才。符此高深之氣。惟中丞公。生逢景運。展謀猷才略。以佐興王之業。用忠貞鯁亮。上結萬乘之知。勳伐炳朗。聲華赫奕。理應有待。名始不誣。庸因造銘。并紀嘉績。使知枝葉敷腴。必有資於本。支流暢達。必遠藉乎源云爾。銘曰。

雲陽之山聚靈孕釐篤生賢母蔚爲女師其一侃侃德容溫溫令則尊章是共先後惟式其二中道遭屯良人棄捐哭聲摩雲血淚迸泉其三爰從青年以迄白首抱節自誓終天獨守其四寒燈夜織秋稗晨炊棲志益勵茹苦若飴其五欲亢其宗唯迪厥子熊膽成丸雞聲趣起其六積學既富受材復雄竟乘青雲去從真龍其七臬司騰英藩府效績如鳳斯鳴如鷹斯擊其八三預政路司憲臺端正氣一暢姦膽自寒其九綵衣趁庭牲鼎就養天寵日加人榮莫讓其十慶綬福履年覬期頤風木不停薤露增悲其十一非有母儀曷成令胤勒銘巖阿以表貞正其二

故胡母歐陽夫人墓誌銘有序

夫人諱汝圓字某姓歐陽氏世爲太和人父宗周母江氏夫人年十七歸同里胡濟川濟川素爲閩右族其遠祖有諱篋者在宋時以明經及第爲南城丞逢國大慶獲封其父諮迪功郎母歐陽氏孺人贊書中有福榮之言遂取以名其堂楊文節公實爲作記夫人佐濟川治家政內外咸舉至於科繇之事尤加之意適至正壬辰兵亂江西行中書檄濟川充里之早禾市巡檢爲禦寇之計早禾當龍泉永新安福之衝兇豎出沒靡常一障之責誠有難勝任者夫人佐之輸楮幣數萬於公家募驍勇植柵柵相率固守如此者十有餘年卒能全其宗族詩禮絲麻如承平時夫人之力居多視彼強家大姓殲於羣寇者相去不翅萬萬夫人事姑樂氏甚孝敬及嬰疾而亡濟川與仲子子璘方受事于穎夫人含泣視事凡棺衾襲斂暨賓祭百須之物無不具俟濟川還始殯焉初樂事姑陳氏盡禮今夫人之事樂亦如之議者謂如崔山南

家云。夫人自歲癸卯辟地武山陽。至于乙巳。江西州郡悉平。夫人隨濟川還故里。室廬已燬。於是相與經營。構祠堂以奉胡氏四世神主。割腴田以充祭祀。而曾祖姑蕭氏墓在梵安寺傍者。亦措產俾浮屠主之。爲癸燈之須。其奉承先志而不知所急。類如此。其戒飭子孫。必令取則於先世。且曰。昔文節公記爾家之堂。有迪教勸業。樹家亢宗之言。爾曹不可不勗。吾亦歐陽氏也。爾能勗之。則福榮之名。未必專美於前矣。夫人素有痰疾。至是加劇。以洪武庚戌四月壬申卒。年五十有五。子男三人。子瑛。子璘。子瑀。皆克盡子道。子瑛先夫人而卒。孫男五人。相授。祖授。宗授。孔授。仙授。女三人。適某某。子璘卜以某年月日葬于某山之原。前葬以鄉先生王君沂所爲狀來徵銘。先生以文學知名當世。狀之所述。其言宜可信。爲之銘曰。

故秦母夫人金氏墓誌銘有序

監察御史秦君文綱再拜而請曰。惟墓之有銘。尙矣。莫原其所始。所可見者。殷比干之銅槃篆文。漢光武時。梓潼扈君之墓。輒。大概以久託體魄爲祝。母夫人之歿。于今三十又五年矣。玄室之刻。旣愆于前。懸繆之碑。幸具。又不勒其淑範於後。揆諸古義。有或爽焉。輒自造筆行一通。件繁而鱗次之。願吾子爲之銘。濂不敢固辭。謹按狀。夫人姓金氏。諱某。字妙清。蘇之嘉定人。父某。妣某氏。夫人幼而孤。朝齋莫鹽。時有不給。卽能惕厲。安於紡績織紉之事。雖寒之折膠。暑之鑠金。不敢自暇自逸。日處閨內。人未嘗識其面。久之。族媼媪御。無不合辭稱其賢。同里秦府君某。游學燕都。還擇配未就。聞夫人之爲。請具六禮焉。府君遂贅女。

氏夫人主饋。非精鑿弗御。烝嘗賓燕。悉中條序。一言一行。皆思麗于矩度。無違越者。生丈夫子四。長卽文綱。次某某。女子二。適某某。孫某。女某。合若干人。重紀至元己卯四月庚戌。以疾卒家。壽年僅四十三。夫人存時。諸子絕幼。唯文綱稍長。力使從名薦紳游。且曰。是子也良。吾將期其名。遂而身立爾。及文綱以文學奮揚于時。致位清顯。而夫人之墓木已拱矣。嗚呼。婦人之行。不出閨門。往往因其子賢而名彰聞。有若夫人。素行固嘉。人何由知之。今因文綱有立。大夫士咸相謂曰。是良御史者。何人之子也。其父母之賢。有以訓之成乎。於是夫人之譽。洋洋乎盈耳矣。文綱以道事君。益竭其忠告之誠。爵祿當益崇高。他時鸞誥載頒。賁及泉壤。夫人之名。愈足以不朽矣。夫人之墓。在縣之某鄉某山之原。葬以某年月日。蓋與府君同兆域云。銘曰。

承天矩兮。循純熙和。惠其衷兮。有侃其儀。積衍柔嘉兮。女中之師。熊膽和丸兮。勵其令兒。豸冠朱衣兮。符我素期。宜福其榮兮。闔胡悴之。墓木樅森兮。涼颺凄其名。在弗磨兮。墓門有碑。

處州教授吳君妻丘氏孟貞墓銘

孟貞。出陽穀丘氏。世爲名胄。有諱某者。能挽強命中。夜樹火二百步。矢一發。應弦火滅。元至元中。從襄感公陵都帥師平宋。辟爲征南元帥府奏差。積勞行陣間。例可得一官。辭遂留居括蒼。娶錢塘遠氏。生一女。卽孟貞。復以貞爲名。始成童。輒哭父。佐諸兄奉母盡孝。以劉向列女傳自隨。指貞行者曰。期無媿此可矣。性恬靜。不樂侈靡。粉黛綺執之屬。悉斥去。唯節序稍一御焉。同縣吳君世昌。字伯京。年始加布。以明經領

江浙行中書文解。閩右族爭以女歸之。不聽。聞孟貞爲人。乃委禽焉。旣歸。奉尊章和先後。一周旋矩矱中。無踰節者。六親交譽之。伯京女兄行有期。冠服什器或闕。孟貞挈己所有者爲助。尊章春秋高。內政悉孟貞所治。同爨三百指。洪纖之費。皆入念慮間。不侈不陋。咸安之。伯京爲寧海校官。孟貞侍姑往。而舅留于家。寧海多鮭。蛙之屬。味頗甘脆。孟貞先寄而後奉姑。及歿。哀傷骨立。幾至滅性。孟貞視己子。與羣從中親之子同。日聚家塾中。執經諷誦。羞服如一人。不能辨其親疎。至正丙申。歲大儉。斗米或至錢千。道殣相望。孟貞縮食以振族姻。人尤以爲難。壬寅。兵洊起。孟貞避地青田。徙少微山中。語及兵革。每驚怖。已而深入。周阮林樾。蒼茂。目斷無來人。孟貞恆鬱鬱不樂。矯首思西歸。得疾不起。至正甲辰七月十又五日也。其年十一月二十四日。奉柩旋葬南明山。年五十七。生二子。長公顯。孫男二。維。綸。女四。綠。綠。繪。綉。先卒。孟貞質直無僞。不妄言笑。人有過。嘗怒詰之。一旋踵間。煦如陽春。故僂腰亦無怨者。晚唯喜讀易。篤於教子。懸燈而坐。不至夜分不休。伯京。宋太常少卿安國之五世孫。太常使金被拘。七年而不變節。還知袁州而終。伯京以文學紹前人。入我國朝。擢處州府儒學教授。孟貞葬後之八年。當洪武辛亥。從善應州郡辟舉。以尙書試藝銓曹。擢編修翰林。轉工部。水部主事。階承事郎。從善久與予游。乃以從弟朝列大夫。知廣平府事公達所爲狀。徵予銘。嗚呼。孟貞雖讀書。予知不敢於薦紳之家矣。孟貞之制行。反章章若此者。其果何如哉。其果何如哉。銘曰。

繫夫人有令姿。斥綺紈。攻書詩。匪空文。行必隨一周旋。悉中規。協宗嫗。如春熙。施則均。忘其私。才有爲。內

政治兵禩興西東馳心鬱搖久弗舒竟觀化入於機南明山靈氣滋體魄寧闕于斯

魏賢母宋夫人墓銘有序

魏夫人宋氏諱秀英世爲蒲圻簪纓家父諱某別號俊齋母某氏年及笄歸同縣魏君雲瑞奉尊章盡道中外多之君姑卒擗踊哭泣幾欲無生絕酒肉弗御者三載其母沒亦如之此夫人能孝也魏君旅死齊安夫人瞻望弗及含泣遣冢子載柩還或曰屍涉江蛟龍必覆舟曷若焚骨而遵陸乎夫人曰焚屍之俗起菟胡函夏無是也棄夫體烈焰中逆天孰甚焉弗聽尋扶櫬歸或又曰櫬幸歸矣然不宜入內陰陽家謂犯大殺違之不祥夫人曰吾夫也使居于外魂無知則已設有知能自安乎遽出擁入中堂朝夕哭奠毀瘠弗支此夫人知禮也里有鬻甲客豪族周乙家勢鴟張甚鬻語周曰魏君死子絕幼且孺家多良田園吾善效魏君書僞爲質劑示之無不得者周行其言夫人怒令冢子辨於縣官久不直夫人檢魏君手書數通爲左驗周雖効魏君書終不近事因暴白此夫人有識也夫人寡居久家益向落恬然能自安嘗立諸子於庭誨之曰汝父已逝獨老身之存內難未已而外侮又至一婦人撐支寧得幾何汝兄弟苦學宜嘗熊膽丸分陰是競庶幾有成若逐牧猪奴嬉戲則予望孤矣諸子因惓惓自修此夫人善教也夫人既老諸子卓然有立構新廬以奉之含飴弄孫熙熙然自寧君子謂爲苦節之亨至正庚寅十又二月忽暈眩仆地已而起曰吾將不久於人世命舁棺至以水實之恐其有滲漏也又命懸衣衾於樺櫨有餘悉分之親愛者除夕連飲椒觴談笑自如明日乃辛卯歲元旦夫人出坐堂上子姓親戚各爲壽畢欣然曰

我明日將逝。不復與爾輩獻酬矣。爲我謝某媪等。各強食自愛。至期沐浴更衣。端坐如平時。呼仲子謂曰。吾年七十有六。壽亦足矣。雖死何憾。語畢而逝。其年十一月十五日。權厝魏君墓左。游卜黃蓋湖東之某山。以洪武某年月日遷葬焉。夫人之子三人。孟季皆夭。唯仲子觀顯任。近自蘇州守擢參知四川行省政事。尋以蘇爲劇郡。詔還舊職。孫男曾孫男皆濟濟滿庭。其名皆見濂所撰魏君墓銘。茲不書。濂聞死生之際。最人之所難。雖平日號知道者。未免顛倒而錯繆。如夫人者。乃能炯炯不亂於垂絕之時。非其所養之醇確所見之高明。得臻爾邪。宜其著於羣行。有犬異於人也。嗚呼賢哉。濂也不敏。與夫人之子觀游。視夫人猶母。而又同出於子姓。墓文之屬。不於濂是托。將安之乎。濂因采狀中所列。序而銘之。銘曰。伊夫人世簪纓。秉純慤。絕驕矜。奉尊章。竭敬誠。協人紀。則天經。夫君亡。涕泗零。犯長江。揭舟旌。蛟龍避。波濤平。奠柩車。奠兩楹。遏羣詭。聳衆聽。執鴟張。作梟鳴。侵吾疆。蝕我垆。辨質劑。白狂醒。外難弭。內教興。丸熊膽。稽汗青。成令胤。佐明廷。享脩祐。至高齡。齊物我。一死生。忽坐亡。遽遺形。伊夫人。乘德并。勒貞石。歇休聲。

故陳母林夫人墓誌銘有序

人子於親。孰忍死之哉。所以不死之者。論著善行。使爲法於後嗣也。斯墓石勒銘之所由始歟。莆田林夫人既歿。其子熙。因比部主事林士衡。持狀來徵文。濂雖不敏。寧不一操觚以慰孝子之情也歟。夫人諱道外。林氏。其姓也。唐邵州刺史蘊之後。其先居莆田之朱倉。至五世祖彥高。始別遷郡城之南。曾大父少偉。宋迪功郎。仙游縣主簿。父節元。仙游縣典史。母陳氏。夫人性柔惠。一動一言。皆不違繩尺。年十四而孤。而

三弟儼然也。夫人蚤作爲櫛總之。又從而飲食之。母氏爲之悅。十九歸同郡忠門靖逸處士陳君高。奉尊章以禮。處先後以和。族媼媪御。莫不贊喜。凡主饋。非精鑿弗敢進。烝嘗賓燕。悉中條序。必潔必豐。尤不能自暇逸。箕帚烹飪之事。咸親洩之。時挾媵人蒔園葵。畜雞豚。唯恐有不及。所獲穀羞。上諸耆長。已則食淡。雖不至飢。弗卹也。舅姑歿。執喪如禮。卜葬壺山中崖路。陡絕。歲一展省。春秋已高。不憚往。林氏六世大墓。在縣之文賦里。宰木相望。每值暮春。躬持象錢。寓馬焚祭之。祭畢。涕泗交流曰。予弟及諸姊妹皆亡矣。林氏且無後。今廬存者。唯老身爾。自度筋枯力殫。何能久在人世。卽百歲後。子孫有能祭吾家之先者乎。復泣告其族子某書院山長履曰。我父粗有不腆之田賦。其入猶可供粢盛。爾幸爲主之。毋使林氏爲若敖氏之餒鬼也。其忠厚惻怛之意。油然而見於言外。聞者哀傷焉。夫人生四男子。長焰。漳州路儒學錄。前卒。次卽輝。煒。照。皆能文。輝。煒。出後諸父。照。連江縣學教諭。女二。一爲比丘尼。一適蘇隆祖。孫男四。奎。習科舉。學沒于兵。璧。以詩經試銓。曹。擢爲景州吳橋縣主簿。階將仕郎。歸。居尙幼。孫女三。曾孫男一。欽。夫人晚遭世難。忠門居第。燬于兵燹。而食貧特甚。夫人能自安。且曰。貧乃士之常。何慍也。壽七十七。以洪武六年閏十一月辛卯卒于壺山寓舍。欽實承重。照扶攜爲位哭。弔者無不盡哀。七年十一月某甲子。合葬夫兆。其地在南力里赤崙之原。禮也。自襲斂。逮于窆。其經費實煒終其事。云濂聞閭閻之家。其風氣之所漸漬。雖子女子亦。有度越於人者。此無他。書詩之澤。浹髓淪肌。愈遠而愈不忘也。有若夫人。其奉上也。孝。其遇下也。惠。其律己也。儉。其蒞事也。勤。且惕然於春露秋霜之慘。終身而不衰。可不爲女中之師乎。銘以昭之。庶

以悼彝倫也。銘曰。有熾夫人。葆醇熙只。芙蓉爲冠。佩蘭蕤只。閭內之政。飭且治只。上嚴孝敬。下則慈只。出門聘望。冢壘壘只。宰木成林。動涼颺只。霜露之感。我其悽只。孰知衰暮。窮以羈只。樂夫天命。恆自持只。觀化而歸。亦奚悲只。赤崙之原。南力墟只。駿發幽潛。勒貞辭只。後千百載。以爲期只。

故上虞魏君妻馮夫人墓志銘

上虞魏君道全。既喪其妻夫人。哀悼不置。乃自撫羣行。爲書一通。遣其子倫。來浦陽江上。徵予述隧道之銘。嗚呼。夫婦爲五倫之始。生則愛恤。歿又能致思。而圖其不朽。庸非盡其道者邪。是可銘已。夫人諱淑貞。姓馮氏。越之餘姚人。父諱伯玉。熙行素洽於鄉。娶魏氏。生三女子。夫人其季也。賦資柔慤。父母尤所鍾愛。非簪纓之家不行。時魏君之父諱壽康。實唐文貞公徵二十四世孫。又以貴雄于時。書詩俎豆之習。翕然播于儒林間。文獻黃公潛。內翰柳公貫。著作李公孝光。咸相與過從。釀酒賦詩。至浹日始去。其子弟彬彬雅馴。亦重爲昏姻。未嘗輕就。聞馮氏有賢女。乃以禮聘歸之。夫人既至。孝事尊章如孝親。友娣姒如女兄。弟敬夫如見大賓。匡補贊助。無所不致其情。臨諸子如嚴師。一動一靜。悉規之以準繩。不使尺寸踰越。夫人雖生富貴家。自幼不樂紛華靡麗之飾。澹然能自安。年踰五十。猶服勤絲枲不衰。馭僕人媵女。亦各有法。恩義並至。退無後言者。閭里貧窶之人。苟有稱貸。多不責其償。月旦之評。謂夫人嚴而能恭。儉而能惠。信不誣矣。生四子。長泰。次倫。以才學推擇爲中書宣使。轉補直省舍人。次樟。蚤夭。次良。夫人生於元延祐。

元年二月二十二日卒於國朝洪武九年四月十六日享年六十有三。明年十二月十七日葬於縣北四十五里伏虎山之原。禮也。嗚呼。自古以來公侯卿大夫下逮士庶人家無不資內助以爲治。所以順陰陽辨內外一上下也。傳記之所載蓋班班可考不誣。後世此義或乖遂致巧言如簧而數倫害政反爲家禍。君子每爲之慨焉。永歎有若魏君名閔之後防範固有異於人亦由夫人左右之力爲多。予甚嘉其行特製銘辭被諸金石以厲世之爲人婦者。銘曰。

夫人之行貞而醇。相家有道惟孝勤。翽翽色養先見聞。推此以達和氣殷。秩然有序天則均。服循組紉忘明暉。素執視作錦繡文。如此儉德久且馴。陽陰順軌榮光臻。死生有如晝夜輪。聞之孰不心酸辛。青山鬱盤類虎蹲。松柏丸丸夾墓門。護此靈魄千載存。後人慎勿摧爲薪。

姑蘇林君母墓銘

姑蘇林君以義請銘其母張夫人之墓。其容戚然。若有所遺。余問曰。夫人始卒耶。則曰。吾母年五十有四。以元至正丙戌二月十三日終。今三十餘歲矣。然則夫人鮮子孫耶。則曰。吾母生四男。曰以仁。以義。以信。以誠。二女。適某某。孫男十有二人。孫女十人。曾孫男女又十人矣。非鮮也。然則懼其無聞於後世耶。奚爲爾戚戚也。曰。吾母事吾大父母。如子事父。敬吾父猶大賓。撫子與孫也。愛而能節以禮。其御媪媵也。未嘗厲言暴色。其可稱者甚衆。得其人而書之。則傳矣。吾非懼是也。吾之所甚戚者。吾不忍言也。余固問之久之。則泣而曰。蘇之俗嗜浮屠法。喪親以燼骨水瘞爲貴。吾昔無聞知而徇於俗。卒後六日。奉柩化於吳江。

之東門外。遂之垂虹亭。觀音閣下歸骨焉。時未知其不可也。于今而後。知其不可也。噫。已莫逮矣。每念及于茲。心腑摧裂。而不知天地之廣。吾身遑遑乎若無所容也。噫。誠莫之奈何矣。昔有葬衣冠之禮。吾嘗聞焉。吾母遺衣存。吾已卜地於長洲白馬澗南之高景山。將以今洪武某年月日歸葬。所以慰吾心焉耳。不合於禮。吾不暇計也。惟先生刻文於墓左。以塞吾悲。且俾後人毋蹈吾之過焉。嗚呼。先王之禮。亘萬世而無弊者。揆諸道而合。驗乎心而安也。世遠教微。外夷他說。得以亂之。於是先正之意亡矣。然行其說者。未嘗不安之也。而林君獨能惕然不憚于心。天性之存。其何可泯哉。孝子仁人。欲盡事親之道者。視乎林君。亦可以知慎矣。夫人諱妙清。林君父名某。林君通醫。有儒行。選爲某官。銘曰。夫人衣冠葬于是。孝子刻辭昭厥美。嗟哉後人慎由禮。

故鄭貞婦賴氏墓志銘

貞婦。汴賴氏子。故爲聞人家。宋南渡後。有仕于溫者。遂遷焉。父諱某。母某氏。貞婦生有淑質。父母慎擇配。偶會深之鄭君信。與其妻王氏。亦寓于溫。素稱有家法。其子曰誠。字文質。復俊爽。異常倫。俾歸之。貞婦年二十矣。貞婦奉尊章無違禮。身蹈儉素。不習流俗侈靡事。三族以爲能。生二子。德善而鄭君自李陽河巡檢遷廬之稅使。乃徙合肥。居久之。鄭君歿。反葬于深。王氏念之弗置。欲歸省丘墓。誠飾板輿。送其還。未幾。主氏歿。誠亦以衰毀終。深之宗人曰。是母子者。不欲忘其鄉土者歟。盡同葬焉。因相地下。時成禮。貞婦聞之大慟。幾絕。卽服惡笄服。朝夕哭奠。人有慰之者。輒對曰。我未亡人耳。尙何言。誓不再適。以樹立鄭氏之

門如此者五十餘年。如嚴霜烈日。可畏可仰。善旣不幸早夭。刻意訓德。從名儒遊。迄于有成。今擢太醫院判官。階保冲大夫。世稱其爲有子。貞婦生于至元壬午四月五日。卒于至正辛丑七月十七日。壽八十歲。二子唯有一存。孫一人。素。孫女二人。適太原護衛鎮撫金華吳翰。舒城宋謙。曾孫一人。天保。德念母恩。如天之罔極。欲圖不朽於文字間。介安次王普狀。徵余爲之銘。銘曰。鄭婦之行。可謂貞矣。其恆如松之不變。其潔類玉之無瑕。所以得令子以昌其宗。嗚呼。此非易所謂安節之亨者乎。

故樓母吳氏墓銘

予旣銘先友樓蘆君之墓。樓君妻吳氏復卒。其子仁與恕。泣而請曰。先母極孝于姑。姑年耄。氣逾弱。左右手不能用。先母夙興持櫛。具以往。請姑坐榻上。親理髮。施膏沐。訖。鞠躬揖而退。旦旦如之。雖遇寒之折膠。暑之流金。不廢。復聞宗老言。爾母之賢也。胡可及也。蘋蘩之薦。無不蠲潔。閫內之政。無不雍順。與臺媼御之賤。未嘗聞叱咤之聲。相爾父治家。不卹勞動。時粥環釧。以佐饗賓之費。彼知飾珠玉。侈衾衣。以相夸詡。其視婦道爲何事。世非無女婦也。如爾母者。幾何人。仁等日夜腐心。恐斯言聞者。鮮也。盍若登之於文乎。敢以墓上銘爲請。予曰。吾母陳淑人。其賢與爾母正類。常思樹表墓道。而一時故老凋喪。竟無從求文。爾之情爲可矜。實與予同也。因不敢以荒陋爲辭。嗚呼。爾母固賢矣。使爾兄弟自言。終涉乎愛私。今則出於宗老之口。其有不誠者邪。嗚呼。爾母殆得陰之正德。而無幽吝之氣者邪。金之精者聲必宏。以爾母之賢。

又何患不遠聞邪。吳氏諱正，字德貞，義烏人。吳樓世通昏嫗，父泗，母穎。吳氏年二十一來歸，享壽七十又九。以洪武丁巳十二月二十五日卒。其月二十九日合祔夫墓。在縣之某某鄉西山之原。三子：仁、恕、愿。仁、恕皆從子受經，良儒也。一女，適將仕郎鄱陽縣主簿方良玉，孫一椿，女二，適吳榮、丁宗元。云銘曰：女位乎陰，孰乘乎陽。婦德惟柔，孰亢乎剛。苟不失厥常，乃家之慶。叶西山之岡，是爲賢母之藏。後千百年，慎毋變更。

鄭母蔣夫人墓志銘 有序

鄭母蔣夫人諱某，字某。其先居光之光山。五代末有諱光者，徙毗陵，再徙鄞。今爲鄞人。光生宗霸，宗霸生侃。侃生贈金紫光祿大夫浚明，光祿生崇寧某，甲子進士某，官贈宜奉大夫琰，宜奉生通判台州，贈中奉大夫榘，中奉生南昌通判贈太中大夫如愚，太中生峴，嶠，峴慶，元丙辰進士，刑部尙書，寶章閣學士，階正奉大夫，嶠隱居弗仕。夫人之曾大父也。大父遜父某，號處士善孫，妣趙氏。夫人生簪纓家，進退皆有度。處士愛之，不肯與凡子。初處士之女弟歸同郡某，路學錄鄭方叔，生某路，教授覺民，覺民字以道，居弱齡時，文行煜煜流聞。處士喜曰：吾久擇壻，無踰此甥也。遂歸之。夫人既至，事舅姑甚恭謹，衣之煖，寒食之早，莫成懸懸入念慮。唯恐有弗及，姑患眯目，教授君日候床下，以舌舐之。夫人必與俱，問姑所欲爲而退。姑歿，舅春秋高，臥疴不能興，在衽席者數年。夫人烹鍊藥劑，候火性剛柔，必盡其功，乃進。久而愈虔，舅常謂人曰：吾聞孝婦當產佳兒，有若蔣婦，其子將亢吾宗乎。舅既歿，教授君令譽日廣，貴人家暨閭里之族，競以

厚幣聘爲塾師。家政悉仰於夫人。夫人不動聲色。具有條序。米鹽細故。日親澆之。而不憚煩。雖貧賤患難。有不恤也。教授君有妹。適趙某。生一子一女。病手足拘攣。殊苦甚。夫人遣介候問。無虛月。及卒。鬻環釧爲其棺斂。且不避塗潦。送之葬所。未幾。其子亦卒。斂之如其母。竭力嫁其女於士族。中外皆稱其賢。教授君歿。夫人哀慟。幾致隕絕。戒從者治葬具。必誠必信。無毫毛可憾。旣葬。歲時躬自省視。且將結廬墓左。以俟同穴。一旦無疾而卒。洪武三年十月十九日也。壽六十九。四年十月五日。祔葬教授君墓。墓在鄞縣西與山之原。初葬教授君時。啓殯而雨。執紼者衣爲盡溼。夫人泣曰。雨不克葬。書于春秋。故在廟未發之時。得爲雨止。今旣在塗矣。如之何。異日獲從夫子。使果雨也。其必少止矣乎。及是。天日清明。送者縞素哭泣。盡哀而去。人以爲遂夫人之願云。夫人子男子三。長曰駒。義烏縣學教諭。次曰眞。鄉貢進士。臨濠縣學教諭。皆以文學稱于時。季曰鳳。某縣主簿。子女子二。一適同郡劉濬。一適天台葉亮。元季兵禍作。死於節義。孫男五。翁昇。同昇。東昇。允昇。復昇。孫女三。皆幼。惟四明宦族。莫久於蔣氏。重珪疊組。幾與宗室相始終。故其賢女之可書。有如此者。禮義涵濡之功。誠不可誣哉。濂與故太史危君素游。備聞教授君之行。與夫人之賢。教授君之墓。危君嘗銘之。獨夫人未有所傳。前年之冬。扈從皇太子游荆山。眞迎拜道左。惓惓以爲言。今年春。蒙恩致政而歸。駒復來謁。哀情如眞。有過不及焉。濂故特書其世裔之詳。俾勒於墓碑。以見君子之澤。久傳而不斬。庶可少爲流俗之勸。嗚呼。夫人亦可謂之有子矣。夫銘曰。

其德肫肫。其行以孝聞。其訓子熾。然而文。其無忝伐閱之子孫。

